

Ekwo

Mbulembu

Mbulembu

1 ¹Lẹ mbulembu bẹ Chileke meru igwe bya emee eliphe. ²Ophu eliphe enwedu ugbugba; ophu o dudu iphe, no iya nu. O buerupho mini echiphe l'ekameka; teme eli mini ono nodu agbakota ochii. Unme Chileke nodu erwuphe l'eli mini ono kwapho.

³Oo ya bu; Chileke su: "G'iphoro du." Iphoro bya adu. ⁴Chileke bya elee enya huma l'iphoro ono du ree. O bya edokaha iphoro ono yee ochii. ⁵Chileke bya agua iphoro ono "eswe"; bya agua ochii ono "enyashi". Nchi jihu bya aboju. Ono buru mboku ke mbu.

⁶Oo ya bu; Chileke su: "G'iphe nodu l'echilabo mini; no-buha mini ono ebo." ⁷Tobudu iya bu; Chileke bya emee iphe dobe; o no-buha mini ophu no limeli yee ophu no l'ali ebo. O du g'o pfuru. ⁸Chileke woru iphe ono gua "akpaminigwe". Nchi jihu bya aboju. Ono buru mboku k'eto.

⁹Chileke su: "Ge mini ophu no le mkpula akpaminigwe nokobe l'ekalanu; ge ka kpohuru nku gbafuta iphe." O du g'o pfuru. ¹⁰Chileke gua eka ono, kpohuru nku ono "ali"; bya agua mini pho "eze-enyimu". Chileke bya elee ya enya bya ahuma lo du ree.

¹¹Chileke su: "G'ali fushia iphe, dzu ndzu: iphe, ami meyi; yee oshio mi g'ophu nonu fushigbaa g'o du l'ugbugba nkiya." O du g'o pfuru. ¹²Ali bya efushia iphe, dzu ndzu; ephe bya amishia meyi; ophu nonu nodu amishigbaa g'o du l'ugbugba nkiya. Chileke bya elee ya enya bya ahuma lo du ree. ¹³Nchi jihu bya aboju. Ono buru mboku k'eto.

¹⁴Chileke su: "G'iphe, echi echichi du l'akpaminigwe g'o dokahaje eswe yee enyashi. Teme ephe egoshije teke bu ogge iphe; waa mboku; waa teke bu apha agbaru. ¹⁵Teme g'iphe ono, echi echichi ono, du l'akpaminigwe ono chije le mgboko." O du g'o pfuru. ¹⁶Chileke bya emee iphe, echi echilabo, paru eka apaa. Ophu ka shii be o meru g'o chije leswe; ophu ka alwa ali be o meru g'o chije lenyashi. O bya emefukwapho kpokpode.

¹⁷Chileke bya eworu phe dobe l'akpaminigwe g'ephe mee g'iphóró dú lẹ mgboko. ¹⁸G'ephe chije l'eswe yee ẹnyasi; teme waa g'ephe dokaha ìphóró yee ọchii. Chileke bya elee ya ẹnya bya ahuma l'ọ dú ree. ¹⁹Nchi jihu bya abọhu. Ono buru mbọku k'eno.

²⁰Chileke bya asu: “Ge mini kprofuta anu, dú igwerigwe g'o buru lẹ mini; ẹnu awata ephe l'eliphe lẹ mkpula akpaminigwe.” ²¹Oo ya bu; Chileke mee eze anu, bugbaa l'eze-enyimu; mekpoo iphe, dzu ndzu, awu awuwu; o buru lẹ mini l'udu iya l'udu iya; waa ẹnu, ephe l'eli g'ephe ha; ọphu nonu l'ugbugba nkiya. Chileke bya ahuma l'iphemiphe ono dú ree. ²²Noo ya; Chileke bya agoru onu-oma nu phe; su: “Unu zu azuzu zu-jia mini, nọgbaa l'eze-enyimu; ẹnu azu ja mgboko ejiji.” ²³Nchi jihu bya abọhu. Ono buru mbọku k'ise.

²⁴Chileke bya asu: “G'eliphe kprofuta iphe, dzugbaa ndzu l'udu iya l'udu iya. G'anu, bu iphe-edobe kprofuta; waa anu ọphu awu l'ephe; waa anu, bu l'egbudu. G'ọphu nonu kprofutagbaa l'ugbugba nkiya.” O dú g'o pfuru. ²⁵Chileke mee anu, bu l'egbudu l'udu iya l'udu iya; me anu, bu iphe-edobe l'udu nkiya; mekwapho anu ọphu awu l'ephe l'udu nkiya kwapho. Chileke bya elee ya ẹnya bya ahuma l'ọ dú ree.

²⁶Tobudu iya bu; Chileke su: “G'anyi bya emee nemadzu g'o yee anyi; mbu g'o dú g'anyi dú. G'o buru onye-ishi; g'ema, no l'eze-enyimu; yee ẹnu, ephe l'eli; yee anu, bu iphe-edobe; yee eliphe l'ọphu; waa iphe, bukpo anu, akpu wuruwuru l'ali nodu iya l'eka.”

²⁷Oo ya bu; Chileke woru nemadzu mee;

o yee ya; o buru ge Chileke dú bu g'o meru iya; o dú.

O buru nwoke lẹ nwanyi be o meru.

²⁸Chileke bya agoru onu-oma nu phe; su phe: “Unu zu azuzu kabaa shii; unu zu-jia mgboko kapyabe iya ẹnya. Unu aburu ishi: ema, bu lẹ mini; yee ẹnu, ephe l'eli; yee iphemiphe, bu iphe, dzu ndzu, akpu wuruwuru l'ali anodu unu l'eka.”

²⁹Noo ya; Chileke su: “Iphe, bu iphe, aako akoko lẹ mgboko; waa iphe, bu oshi, ami amimi l'ọphu be mu nukotaru unu g'unu rije; g'o buru unu nri. ³⁰Anu, nokota lẹ mgboko-a; waa ẹnu, ephekota l'eli; mekpoo iphemiphe, awukota l'ephe; mbu iphemiphe, dzu ndzu g'ephe ha be mu nukotaru irwu eswa g'o buru nri phe.” Iphemiphe dukota g'o pfuru.

³¹Chileke bya elee ẹnya huma iphemiphe, o meru. Ephe duebekota rengurengu shii. Nchi jihu bya abọhu. Ono buru mbọku k'ishii.

2 ¹Noo g'e gude mee igwe; yee eliphe; me iphemiphe, no iya nu. ²Tobudu iya bu; o betashia lẹ mbọku k'esaa; Chileke jeebekotawaa ozi ono, o shi eje ono. O buru lẹ mbọku k'esaa ono be o tutaru unme ozi, o jekotaru. ³Chileke goru onu-oma nu mbọku k'esaa ono; bya emee ya; o dú nsọ; kele oo mbọku ono be o tutaru unme eme iphemiphe, o meshiru ono.

Ádamu yee Ivu

⁴Waa g'e gude mee igwe; yee eliphe; teke e meru iya baa.

Teke Chipfu, bu Chileke meru eliphe; yee igwe be ⁵o to nwedu iphe, aakò akòkò shiwa a du l'alì; ophu o dudu irwu, erwuje l'egu ophu kpò-fu-tawaru nu; noo kele Chipfu, bu Chileke te eshidu mewaa g'igwe dzeje mini l'eliphe. Teme ophu o toko nweduru onye a-koje ali. ⁶O buru iji be o shi anoduje akwa gude agba ali l'ophu mini. ⁷Oo ya bu; Chipfu, bu Chileke bya egude eja, shi l'alì kpua nemadzu; bya ekuru unme ndzu ye iya l'imi; onye ono bya aburu onye dzu ndzu.

⁸Chipfu, bu Chileke bya eworu mgbabu gbaa l'uzo enyanwu-awawa le Ede nu; bya eworu nemadzu-a, o meru-a dobe l'eka ono. ⁹Chipfu, bu Chileke mee g'oshi, dulaje iche iche fushia l'alì ono. Oshi, du ree ele enya; bya atso utso eriri. O buru l'echi mgbabu ono be oshi, emeje g'a nodu ndzu no; waa oshi, emeje g'a maru iphe, du ree; yee ejo-iphe.

¹⁰O buru l'alì Ede nu be nggele, agba mini le mgbabu ono shi asoshi. Nggele ono bya agbaa eno le mgbabu ono. ¹¹Epha nggele ke mbu bu Pishonu; o shijaru echilabo ali Havila l'ophu; eka mkpola-ododo no. ¹²Mkpola-ododo, no l'alì ono du ree. Etse, eshi mkpo, bu iya bu bedelomu nodu iya; teme mkpuma, aswa du, bu onikusu nodukwa iya pho. ¹³Epha nggele k'ebò bu Gihonu. O shijaru echilabo ali Kushi l'ophu. ¹⁴Epha nggele k'eto bu Tigrisu; yebedua soru shia uzo enyanwu-awawa l'ibiya ke Asiriya. Epha nggele k'eno buru Yufuretu.

¹⁵Chipfu, bu Chileke bya eduta onye ono je edobe le mgbabu Ede nu g'o jeje iya ozi letaje iya enya. ¹⁶No iya; Chipfu, bu Chileke bya atuaru nemadzu ekemu su ya: "Rijekwa akpuru oshi, nokota le mgbabu-a mo du ngu ree; ¹⁷ole nanu ophu i tii rijedu bu oshi ono, emeje g'a maru iphe, du ree yee ejo-iphe; kele mboku, i riru iya be i-nwuhukwa."

¹⁸Noo ya; Chipfu, bu Chileke su: "O to dukwa ree ge nwoke ono nodu nwekiniya iya. Mu e-metaru iya onye n-yemeka, gbaru iya nu."

¹⁹Oo ya bu; Chipfu, bu Chileke gudechaa eja, shi l'alì mee anu; waa enu, ephe l'eli bya achitaru iya Adamu ge ya maru iphe oo-gushi phe. O buru iphe, Adamu kuru iphemiphe ono, dzu ndzu ono be ephe wataru azaza. ²⁰Oo ya bu; Adamu bya eworu epha gushia iphe-edobe l'ophu; me enu, ephe l'eli; me anu-egbudu g'o ha.

Obenu le Adamu te enwedu onye n-yemeka, gbaru iya nu, a cho-vuru iya. ²¹Oo ya bu Chipfu, bu Chileke bya emee oke mbenya tu Adamu. O nodu eku mbenya ono; o bya ahata iya okpu-egara; bya egude anu-ehu rwachita iya. ²²Tobudu iya bu; Chipfu, bu Chileke bya egude egara ono, o hataru l'ehu nwoke ono mee nwanyi; bya edutaru iya nwoke ono.

²³Nwoke ono su:

"Onye owa-a bu okpu ophu

shi l'okpu mu;
 bya aburu ogwehu,
 shi l'ogwehu mu.
 Iphe, ee-ku iya bu 'nwan yi';
 noo kele e shi l'ehu nwoke
 wofuta iya."

²⁴Noo iphe, meru g'o gude nwoke je l'ahaje nna iya; haa ne iya; ephe le nyee ya atugba; buru ogwehu lanu.

²⁵Nwoke ono yee nyee ya ono tuko gbaru oto; ophu iphere adudu phe.

Adada nemadzụ

3 ¹Agwo bu anu, shi kakota eregede l'anu-egbudu, Chipfu, bu Chileke meshiru l'ophu. Noo ya; o su nwan yi ono: "Chileke ?o sukpooru g'o to dushi akpuru oshi, no le mgbabu-a, unu e-rije to?"

²Nwan yi ono su agwo ono: "Anyi e-riekwa-a akpuru, shi l'oshi, nogbaa le mgbabu-a. ³O kwa akpuru oshi ophu no l'echi mgbabu be Chileke suru g'anyi te erishi; mbu g'anyi te emekwa iya aka ememe ophu; l'anyi -denyi iya aka be anyi a-nwuhukwa."

⁴Agwo obu su nwan yi ono: "O to dukwa anwuhu, unu anwuhu. ⁵O chia le Chileke maru le unu -ria ya; enya asahu unu; unu adu ge Chileke; maru iphe, du ree waa ejo-iphe."

⁶Nwan yi ono bya elee enya l'akpuru oshi ono; bya ahuma lo du ree k'eriri; bya amakwapho mma ele enya; teme o nodu agukwa iya pho egu g'o ria akpuru oshi ono maru iphe. O wota iya ria bya anukwapho ji iya, ephe l'iya tuko nodu l'eka ono; o rikwapho. ⁷Enya tuko sahuchaa ephe-nebo; ephe maru l'ephe gba oto. Ephe dzukobe ekwo oshi figu nmaru.

⁸Ephe numa ukporo Chipfu, bu Chileke le g'oojephe le mgbabu ono le ge pherephere uzennyashi ezi; ephe je eworu onwophe woharu Chipfu, bu Chileke lazụ oshi, nogbaa le mgbabu ono. ⁹Chipfu, bu Chileke bya ekua Adamu; su iya: "?Bu awe be i no?"

¹⁰Adamu su iya: "Mu numakwaru ukporo ngu le mgbabu ono; mu je eworu onwomu domia l'eka ndzu agu mu; kele mu gba oto." ¹¹O su iya: "?Bu onye suru ngu li gba oto? ?Ti riakwaru nu akpuru oshi-a, mu suru gi ti rishi-a?"

¹²Adamu su iya: "O kwa nwan yi-a, i doberu mu l'iya l'eka-a be woru akpuru, shi l'oshi ono nu mu; mu ria."

¹³Chipfu, bu Chileke bya ajia nwan yi ono su iya: "?Denu g'o nwuru i meru iphe, du nno?"

Nwan yi ono su: "O kwa agwo gbaberu mu eregede; mu je erinaa ya."

¹⁴Chipfu, bu Chileke su agwo: "Eshinu i meru iphe-a be

"Iphe, bukota iphe-edobe;
 me anu-egbudu l'ophu

- buepho gubedua be a turu onu.
 Ii-wata awu l'epho.
 O buru eja, shi l'alì be ii-rije
 gbiriri jasù g'ii-no-beru.
- 15 Mu e-me g'unu le nwanyi-a
 buru ohogu; awa nkengu
 yee ke nwanyi-a
 a-bukwarupho ohogu.
 Oo-zopya ngu ishi;
 gubedua emeka iya iphe
 l'ichirupfu okpa.”
- 16 Nwanyi ono be o sùru:
 “Mu e-me g'iphe-ehuka,
 duru ngu l'apa epho-ime ka shii.
 Ii-jeje iphe-ehuka teme l'i nwua nwa.
 Ji ngu a-noduje agu ngu egu;
 o buru iya be ii-nodu l'eka.”
- 17 O su nwoke ono:
 “Eshi ophu i kwetaru ngaberu nyee ngu
 nchi je eria akpuru oshi ono,
 mu sùru g'i ti rikwa ono be
 I meakwaru; alì buwaru iphe,
 mu turu onu.
 Ii-jeje ozi mkponwu ehu teme
 l'i seta nri, ii-ri.
 O buru g'ii-je iya bu ono gbiriri
 jasù g'ii-no-beru.
- 18 Alì a-wata efushiru ngu ejo eswa;
 waa obvu;
 teme o buru akpuru-iphe,
 mitaru legu a-bujeru ngu nri.
- 19 Ii-kuta ephuru phee teme l'i ria nri;
 gbiriri jasù i laphu azu l'alì;
 eshi ophu o bu eja shi l'alì be i shi.
 Oo eja shi l'alì be i bu;
 o bukwarupho l'aja shi l'alì ono be
 ii-laphu azu.”
- 20 Tobudu iya bu; nwoke ono gua nyee ya ono Ivu; noo kele oo-buru ne
 oha l'ophu.
- 21 Chipfu bu Chileke bya eworu akpo-anu mee ekwa nmabe Adamu yee
 nyee ya. 22 Noo ya; Chipfu, bu Chileke bya epfua su: “Nta-a be nemadzu du-
 waa g'anyibedua; mbu o mawaru iphe, du ree; bya amaru iphe, bu ejo-iphe.

G'ò tọ wotafuanu akpuru oshi, emeje g'a nọdu ndzụ ria nọdu ndzụ ojejoje.”
 23 Oo ya bụ; Chipfu bụ Chileke chifu iya lẹ mgbabu Édenụ; g'o je ejeahaa ozi l'alị, bụ ẹka e shi wota eja kpua ya. 24 O chifuchaepho nemadzụ lẹ mgbabu ono; ọ bya eje l'uzo ẹnyanwu-awawa kẹ mgbabu Édenụ ono; bya eworu ojozi-imigwe, bụ Chierobu dobe iya; bya edobe iya ogu-echi, charu gbarara; teme o nọdu egbu swiiswiiswii iphu lazụ g'o chee ụzo, e shi eje l'oshi ndzụ pho nche.

Kénu yele Ebelu

4 1 Adamu bya ejepfu nyee ya, bụ Ivu; ọ tsuta ime; bya anwua Kénu. Ivu sụ: “Chipfu yewaru mu ẹka; mu nwua nwa nwoke.” 2 E mechaa; ọ bya anwua nwune iya, bụ Ebelu.

Ebelu buru onye nweru aturu; waa egbu; Kénu buru onye akọ opfu. 3 A nonyaa; Kénu hata mebyi iphe, shi l'alị gude je g'ò nụ Chipfu. 4 Obenu lẹ Ebelu hataru aturu ivuzo, aturu iya nwushiru gbua; bya ebuta iya ẹka ọ tsuru ẹba; je anụ Chipfu. Ebelu yee iphe, ọ nuru dụ Chipfu ree; ọ nata iya. 5 O jika Kénu yee iphe, ọ nuru iya. Ehu ghuaahaa Kénu egbu; o woru iphu gbanwube.

6 Chipfu sụ Kénu: “?Bụ gunu kparu iphe, ehu egbu ngu egbu? ?Bụ gunu meru g'o gude i gbanwube iphu? 7 O -buru l'i meru iphe, dụ ree; ?taa nata dụ ngu tọ? Obenu; l'ò -buru l'i ti meduru iphe, dụ ree; makwaru l'iphe-ẹji pfiwaru l'onu mgbo ngu; ọ nọdu agụ iya egu g'o nweru ngu. Ole ọ bụ; kapyabekwa iya ẹnya!”

8 Tọbudu iya bụ; Kénu sụ nwune iya Ebelu: “G'anyi je l'egu.” Epeh je-shia; epeh ruwepho l'egu; Kénu zupyaabe nwune iya Ebelu gbua.

9 Noo ya; Chipfu sụ Kénu: “?Denụ nwune ngu Ebelu?”

Ọ sụ: “Mu ta amakwa. ?Mu echekwanu nwune mu nche?”

10 Chipfu sụ iya: “?Bụ gunu be o gude i mee egube ejo-iphe owa-a? Gebekwa! Mee nwune ngu ono gbekwa l'alị echiku mu lẹ mkpu. 11 E -shi ntanu-a be i buwaa onye a turu onu. Alị ono, saru onu ngua mee nwune ngu ono jikawa ngu. 12 I -kọo alị be ọ tọ dudu iphe, iimeta iya. Ii-noduepho agba oso-ndzụ aghaphe phururugbada lẹ mgboko.”

13 Kénu sụ Chipfu: “Iphe-ehuka ono, i suru ge mu jee ono karikwaru mu ẹka. 14 Nta-a, g'ichifuwa mu l'alị-a; k'ophu bụ l'edomiwa mu edomi l'iphu ngu-a; teme mu buru onye agba oso-ndzụ aghaphe phururugbada lẹ mgboko-a; be onye humaru mu nụ e-wokwaru mu gbua.”

15 Chipfu sụ iya: “O tọ dudu nno; ọ -duru onye gburu gube Kénu; eewota iphe, e meru ngu mee onye obu mgbo esaa.” Chipfu bya eworu iphe-ohubama mee Kénu; k'ophu ọ tọ dudu onye humaru iya nụ eje iya egbugbu. 16 Oo ya bụ; Kénu tugbua lufu l'iphu Chipfu; je eburu l'alị Nodu, nọ l'uzo ẹnyanwu-awawa Édenụ.

Eri Kénu

17 Kénu bya ejepfu nyee ya; ọ tsuta ime nwua Inoku. Kénu nweru mkpukpu, ọokpu teke ono; o woru mkpukpu ono kua epha nwa iya ono, bụ

Inọku. ¹⁸Inọku nwụta Iradu; Iradu bụru nna Mehujielu; Mehujielu bụru nna Metushelu; Metushelu bụru nna Lameku.

¹⁹Lameku lụa unwanyi labo; onye lanụ aza Ada; onye ophuu nọdu aza Zila. ²⁰Ada bya anwuta Jiabalu; o bụru iya bụ nna ndu ebujeru l'ulo-ekwa; bya aburu ndu ese akanya iphe-edobe. ²¹Epha nwune iya bụ Jiubalu; yebedua bụ nna ndu akpoje ogumogu; bya aphụ upyi. ²²Zila bya anwutakwapho nwa nwoke; epha iya bụ Tubalu-Kénu. Yebedua bụ onye gude ope yee ígwè kpushia ngwa, dū igwerigwe. Tubalu-Kénu bẹ nwune iya nwanyi bụ Nama.

²³Noo ya; Lameku sụ unyomu iya:

“Ada; waa Zila;
 unu gebekpọdapho!
 Unubẹ unyomu Lameku;
 unu numa opfu mu!
 Mu gburu nemadzū;
 kele o mekarū mu iphe.
 Oo nwokorọbya,
 gburu mu ọnyá bẹ mu gburu.

²⁴O -buru lẹ Kénu bẹ a gwataru
 ugwo-ochi iya ugbo esaa;
 ge ke yebe Lameku bururo
 ukporo ugbo eto l'ugbo esaa!”

²⁵Noo ya bụ; Adamu byakwa bya ejepfu nyee ya ozo; o bya anwua nwa nwoke; bya eworu iya gụa Setu sụ: “Chileke nwaru mu nwa nwoke ozo, a-nọ-chi ọnya Ebelu; eshi ophu Kénu gburu onye k'ono.” ²⁶Setu bya anwutakwapho nwa nwoke; bya eworu iya gụa Enoshi. E shi teke ono ndiphe wata eku epha Chipfu.

Eri Ádamu

5 ¹Owa-a bụ g'e gude deshia epha ndu bụ oshilokpa Ádamu; waa iphe, ephe meshiru.

Teke Chileke meru nemadzū bẹ o meru iya o dū ge Chileke dū. ²O meru nwoke yee nwanyi. G'o mecharu pñe bẹ o byaru agoru onu-oma nū pñe bya ekua pñe “nemadzū”.

³Ádamu nochaepho ukporo apha ishii l'apha iri; o nwuta nwa nwoke, yeru iya nū; bya adū g'ọ dū. O woru iya gụa Setu. ⁴A nwuchaa Setu; Ádamu bya anofua unu apha labo. O nwushikwapho unwoke yee unwanyi tsobe Setu. ⁵Mkpako apha, Ádamu noru bụru unu apha labo l'ukporo apha ishii l'apha iri; bya anwuhu.

⁶Setu bya anoo ukporo apha ise l'apha ise; bya aburu nna Enoshi. ⁷O nwuchaa Enoshi; bya anofua unu apha labo l'apha esaa. O nwushikwapho unwoke yee unwanyi tsobe Enoshi. ⁸Mkpako apha, Setu noru bụru unu apha labo l'ukporo apha ise l'apha iri l'ebó; bya anwuhu.

⁹Enoshi bya anọọ ụkporo apha ẹno l'apha iri; bya aburu nna Kėnanu. ¹⁰Q nwuchaa Kėnanu; bya anofua unu apha labo l'apha iri l'ise. Q nwushikwapho unwoke yee unwanyi tsoke Kėnanu. ¹¹Mkpako apha, Enoshi noru buru unu apha labo l'ukporo apha ise l'apha ise; bya anwuhu.

¹²Kėnanu bya anọọ ụkporo apha ẹto l'apha iri; bya aburu nna Mahalalelu. ¹³Q nwuchaa Mahalalelu; bya anofua unu apha labo l'ukporo apha labo. Q nwushikwapho unwoke yee unwanyi tsoke Mahalalelu. ¹⁴Mkpako apha, Kėnanu noru buru unu apha labo l'ukporo apha ise l'apha iri; bya anwuhu.

¹⁵Mahalalelu bya anọọ ụkporo apha ẹto l'apha ise; bya aburu nna Jiaredi. ¹⁶Q nwuchaa Jiaredi; mbu Mahalalelu; bya anofua unu apha labo l'apha iri. Q nwushikwapho unwoke yee unwanyi tsoke Jiaredi. ¹⁷Mkpako apha, Mahalalelu noru buru unu apha labo l'ukporo apha ẹno l'apha iri l'ise; bya anwuhu.

¹⁸Jiaredi bya anọọ ụkporo apha ẹsato l'apha labo; bya aburu nna Inoku. ¹⁹Q nwuchaa Inoku; bya anofua unu apha labo. Q nwushikwapho unwoke yee unwanyi tsoke Inoku. ²⁰Mkpako apha, Jiaredi noru buru unu apha labo l'ukporo apha ẹsato l'apha labo; bya anwuhu.

²¹Inoku bya anọọ ụkporo apha ẹto l'apha ise; bya aburu nna Metusela. ²²Q nwuchaa Metusela; yee Chileke bya aswia oswi ụkporo apha iri l'ise. Q nwushikwapho unwoke yee unwanyi tsoke Metusela. ²³Mkpako apha, Inoku noru buru ụkporo apha iri l'ẹsato l'apha ise. ²⁴Inoku be yee Chileke swiru oswi. A nonyaa; a huma-buhu iya; o buru Chileke kutaru iya.

²⁵Metusela bya anọọ ụkporo apha tete l'apha ẹsaa; bya aburu nna Lameku. ²⁶Q nwuchaa Lameku; bya anofua unu apha l'ukporo apha iri le tete l'apha labo. Q nwushikwapho unwoke yee unwanyi tsoke Lameku. ²⁷Mkpako apha, Metusela noru buru unu apha labo l'ukporo apha iri l'ẹsato l'apha tete; bya anwuhu.

²⁸Lameku bya anọọ ụkporo apha iri le tete l'apha labo; bya anwuta nwa nwoke. ²⁹Q gua ya Nuwa su: "Oo-du anyi obu l'akanya egu-a, anyi ese l'ali-a, Chipfu turu onu-a." ³⁰Q nwuchaa Nuwa; bya anofua unu apha l'ukporo apha tete l'apha iri l'ise. Q nwushikwapho unwoke yee unwanyi tsoke Nuwa. ³¹Mkpako apha, Lameku noru buru unu apha l'ukporo apha iri l'ẹsato l'apha iri l'ẹsaa; bya anwuhu.

³²Nuwa bya anọọ unu apha l'ukporo apha ise; bya aburu nna Shemu; waa Hamu; waa Jiafeti.

Ugbo Nuwa

6 ¹Nemadzu nodu aka shii eje le mgboko; a nodu anwushiru phe unwada. ²Unwu Chileke huma unwada nemadzu l'ephe ama mma; bya atugba je alugbaa phe. ³Chipfu su: "Unme mu ta anoduhedu l'ime nemadzu jasuru; noo kele o buepho anu-ehu mmanu. E -shii nta-a be iphe, nemadzu a-noje bu ukporo apha ishii."

⁴Ndu gbarụ oke mkparawa nọ lẹ mgboko lẹ teke ono; bya anọkwaru iya rọ kwaseru; mbụ lẹ teke unwu Chileke jepfuru unwada nemadzụ; ephe bya anwushiaru phez unwegirima. Ephe bụ ndu e shi maru epha phez teke ndiche l'okpehu, shi dū phez nū.

⁵Chipfu bya elee enya hūma g'ejo-ememe nemadzụ habewa shi lẹ mgboko; l'iphe, obu phez anodujeepfo ari bụ g'ephe e-shi mee ejo-iphe tekenteke. ⁶Ọ buru aphụ tsoru Chipfu lẹ ya meru nemadzụ lẹ mgboko; teme ọ nodu egbu iya egbu l'ime okpoma. ⁷Chipfu sụ: “Mu e-meepfo gę nemadzụ, mu meru dobe l'eliphe chihu. Nemadzụ a-chihu; mę anụ; mę iphe, awụ l'epho; waa enu, ephe l'eli; kele ọ buwaa aphụ tsoru mu lẹ mu meru phez dobe.” ⁸Obenu lẹ Nuwa bę dū Chipfu l'obu.

⁹Waa oshilokpa Nuwa.

Nuwa bụ onye bue ya pho bụ onye pfuberu-eka-oto; ophu uta adudu iya l'ehu lẹ ndu teke ono; teme ephe lẹ Chileke swia oswi. ¹⁰Nuwa ono nwutaru unwegirima unwoke eto, epha phez bụ Shemu; yee Hamu; waa Jiafeti.

¹¹Teke ono bę mgboko mebyishihuwaru l'atatiphu Chileke; bya aburu iwashi jiru iya. ¹²Chileke hūma gę mgboko mebyihubewaru; noo kele ndu bu lẹ mgboko mebyishibewaru onwophe. ¹³Oo ya bụ; Chileke sụ Nuwa: “Mu abyawaa eme gę nemadzụ l'ophu chihu; noo kele iphe, jiru mgboko bụ iwashi; ọ buru phez kparụ iya. Sụ-a; mu abyawaa phez emebyishi; mebyishikwapho mgboko. ¹⁴Oo ya bụ; je egude oshi gofa kua ugbo; tubushia ya omulo omulo l'ime iya; gude unwu dachishia ya ime; yee azu. ¹⁵Waa g'ii-gude kua ya baa: ugbo ono a-dū ukporo nkwo-eka iri l'ise l'ogologo; oša iya aburu ukporo nkwo-eka labo lẹ nkwo-eka iri; l'ọ bya adu ukporo nkwo-eka lẹ nkwo-eka iri l'eli. ¹⁶Lị bya akụ-chia eli ugbo ono akụ-chi g'ọ dū nkwo-eka lanu a -gbe l'igburonu iya. Lị bya eworu mgbo ye lẹ mgbureku ugbo ono; teme l'i kua ya g'ọ dū mkpopfu eto. ¹⁷Mu e-gude utso bya lẹ mgboko bya erigbushikota iphe, dzu ndzu, nọ igwe lẹ mkpula; mbu iphemiphe, e meru ememe, atụ unme. Iphemiphe, nọ l'eliphe a-buru mkpurupyata. ¹⁸Obenu lẹ gubedua bę mu lẹ ngu a-gba ndzu; l'ibahu l'ugbo ono; unu l'unwu ngu; waa nyee ngu; waa unyomu unwu ngu. ¹⁹Lị bya ahoo iphemiphe, dzu ndzu ebo ebo; okee lẹ nyee; dobe ndzu l'eka i nọ. ²⁰Enu, ephe l'eli a-dū ebo ebo dū l'udu iya l'udu iya byapfuta ngu; unwu anu; yee anu, awu l'epho adukwapho ebo ebo byapfutakota ngu g'i dobe phez ndzu. ²¹Ibaya ahoo nri l'asa iya l'asa iya dobe g'ọ buru nri, unu l'ephe e-rije.”

²²Nuwa bya atukoepfo iphemiphe ono mekota gę Chileke suru g'ọ mee ya.

7 ¹E mechaa; Chipfu sụ Nuwa: “Bahụ l'ugbo ono; unu lẹ ndibe ngu l'ophu; noo kele ọo gubedua kpoloko bę mu humaru bụ onye pfuberu-eka-oto l'ogbo-a. ²Hota anu, a ta sodu nsọ esaa esaa; okee lẹ nyee. Lị

hota anu, aaso nso ebo ebo; okee le nyee. ³Lì bya ahota enu esaa esaa; okee le nyee; dobe phe ndzu le mgboko. ⁴A -noephopho ujiku esaa nta-a be mu e-dze mini le mgboko ukporo abali labo eswe l'enyashi; gude mebyishikota iphemiphe, dzu ndzu, mu meru dobe le mgboko.”

⁵Nuwa bya atuko iphemiphe, Chipfu suru go mee mekota.

⁶Nuwa ono nowaru unu apha l'ukporo apha iri teke utso ono byaru le mgboko. ⁷Nuwa; yee unwu iya; waa nyee ya; waa unyomu unwu iya bya abahu l'ugbo ono; g'ephe gbalaru utso ono. ⁸Anu ebo ebo l'ophu a ta sodu nso; me ophu aaso nso; me enu; mekpoo iphe, awu l'epho; ⁹okee le nyee byapfuta Nuwa bya abahu l'ugbo ono, bu iya bu ge Chileke pfuru iya. ¹⁰A nochapho ujiku esaa ono; utso bya le mgboko.

¹¹O be l'apha, kwe Nuwa unu apha l'ukporo apha iri; le mboku, onwa k'ebo dūepho l'abali iri l'esaa; ogba mini ime ali gbafushihu; teme a guhahia enya mini k'akpaminigwe. ¹²Igwe dzee mini le mgboko ukporo abali labo eswe l'enyashi.

¹³O buru mboku ono gedegede be Nuwa; yee unwu iya, bu Shemu; waa Hamu; yee Jiafeti; yee nyee ya; waa unyomu unwu iya ephe n'eto tukoru bahu l'ugbo ono. ¹⁴Anu-egbudu, dulaje l'udu iya l'udu iya; me anu, bu iphe-edobe, dulaje l'udu iya l'udu iya; me iphemiphe, bu iphe, awu l'epho, dulaje l'udu iya l'udu iya; me enu, dulaje l'udu iya l'udu iya; mbu iphemiphe, furu nkù be ephe l'ephe tukoru bahu l'ugbo ono. ¹⁵Iphemiphe, e meru ememe, dzu ndzu du ebo ebo byapfuta Nuwa; bya abahu l'ugbo ono. ¹⁶Anu, wubakotaru l'ugbo ono bukotaerupho okee le nyee iphemiphe, dzu ndzu; egube ono, Chileke suru Nuwa l'oo-du ono. E mechaa; Chipfu gu-chia ugbo ono gu-buru phe ye l'ime iya.

¹⁷Ukporo abali labo be utso ono byakotaru le mgboko; mini ono nodu aka shii eje; o nodu apali ugbo ono ephekerephe le mgboko. ¹⁸Mini ono nodu abyaepho ke kulakula le mgboko; ugbo ono nodu ese eli l'eli mini. ¹⁹Utso ono byaa shii le mgboko; bya atuko ubvu, no igwe le mkpula gbamikota. ²⁰Mini ono byaa shii; k'ophu o gude nkwo-eka iri l'ise kakota ubvu l'eli. ²¹Iphemiphe, eme ukporo le mgboko lakota l'iyi. Mbu enu; waa anu, bu iphe-edobe; waa anu-egbudu; iphe, kukotaru le mgboko; yee nemadzū. ²²Iphemiphe, no l'eli mgboko, dzu ndzu, atū unme l'imi nwushikota. ²³Iphemiphe, nokota le mgboko be e mebyishikotaru. Nemadzū; me anu; me iphe, awu l'epho; me enu be e mebyishikotaru le mgboko. O buerupho Nuwa yee iphemiphe ono, ephe l'iya tukoru nodu l'ugbo ono wafuru.

²⁴Utso ono doru le mgboko noo ukporo abali esaa l'abali iri.

Alala utso ono

8 ¹Obenu le Chileke nyataru-a Nuwa; waa anu-egbudu; me anu, bu iphe-edobe, ephe l'iya tukoru nodu l'ugbo ono. O bya emee ge

pherephere wata ezizi lẹ mgboko; mini ono wata alala. ²A zachishia oḡba mini ime alì phọ; bya aguchishia ẹnya mini akpaminigwe phọ. E buchia mini, shi l'igwe mee; igwe dzebuhu mini. ³Mini ono nọdu alakpọepho lẹ mgboko. A nọepho ụkporo abalì ẹsaa l'abalì iri; mini ono lawaa shii. ⁴Ọnwa k'ẹsaa duẹpho abalì iri l'ẹsaa; ụgbo ono je je ebvuru l'úbvú Araratu. ⁵Mini ono nọdu alakpọepho jasụ l'ọnwa k'iri. Ọ bụru lẹ mbọku mbụ l'ọnwa k'iri ono bẹ e beberu hụmaahaa mkpakponu úbvú.

⁶A nọkwapho ụkporo abalì labọ; Nuwa bya aḡuḡhaa windo, o yeru l'ụgbo ono; ⁷bya atufu okpoko-ọhà. O je etsoru rwupheahaa l'eli; gbiriri jasụ mini tashihu lẹ mgboko. ⁸Ọ bya atufu ndo g'ọ maru ?mini ono tahụgbuwaru l'eli alì? ⁹Ọphu ndo ono ahụmaduru ẹka ọo-zọbe ọkpa; noo kele mini nọkwadu l'eli mgboko. Ọo ya bụ; ọ lapfu Nuwa l'ụgbo ono ọzo. Nuwa machia ẹka nwuta ndo ono ye l'ime ụgbo ono ọzo. ¹⁰Ọ bya anọkwaa ujiku ẹsaa; bya agbẹkwa l'ụgbo ono tufu ndo ono ọzo. ¹¹Ndo ono lwatashia l'uzenyashi; ọ takpuru ẹkwo oshì olivu ọphúú gude lwa. Nuwa maru lẹ mini tahụwaru l'eliphe. ¹²Ọ nọkwaa ujiku ẹsaa ọzo; bya atufukwa ndo ono ọzo. O -rwua l'ọgiya ono; ọphu ọ lwaeduru azụ lwapfuta iya.

¹³O be gẹ Nuwa nọrwuerupho unu apha l'ụkporo apha iri l'apha lanụ; lẹ mbọku, ọnwa mbụ dụ l'abalì mbụ; mini ono tashihuwaa l'alì. Nuwa bya ewofu iphe, e gude kuchia ụgbo ono; bya ahuma l'eli alì kpọhuwaru nkụ. ¹⁴O rwua lẹ g'ọnwa k'ẹbo dụ l'ụkporo abalì l'abalì ẹsaa; alì kpọhukotawaa nkụ.

¹⁵Ọo ya bụ; Chileke sụ Nuwa: ¹⁶“Unu lufuta l'ụgbo ono; gụ lẹ nyee ngu; waa unwu ngu; waa unyomu unwu ngu. ¹⁷L'ichifuta iphemiphe, dzu ndzụ, unu l'iya nọ l'ẹka ono: ẹnu; mẹ anụ; mẹwaro iphemiphe, awụ ẹpho l'alì; g'ẹphe bya azụa azụzù zụ-jia mgboko; ẹphe anwushi unwu aka igwerigwe l'ime iya.”

¹⁸Ọo ya bụ; Nuwa bya afuta; yẹ unwu iya; yẹ nyee ya; waa unyomu unwu iya. ¹⁹Anụ l'ophu; mẹwaro iphemiphe, awụ ẹpho l'alì; mẹ ẹnu l'ophu; mbụ iphemiphe, eme ụkporo lẹ mgboko shikota l'ụgbo ono futagbaa l'udu iya l'udu iya.

²⁰Nuwa bya akpuru Chipfu ọru-ngweja; bya ahata anụ; yẹ ẹnu ndu k'ophu a ta sọdu nsọ; bya egude gwee ngweja-akpo-ọku nụ Chipfu l'ẹka ono. ²¹Chipfu numaepho ishishi iya, atso ntumatu; o pfua l'ime obu iya sụ: “Mu ta abyaedu egude opfu ẹhu nemadzụ tubaa alì ọnu; kele iphe, nemadzụ anọdujekpọepho arì l'obu iya e -shi lẹ nwata buẹpho ẹjo-iphe. Ọphu mu abyaedu emebyishibaa iphemiphe, mu meru ememe, dzu ndzụ; ẹgube-a, mu meru-a.

²²“Jasụ gẹ mgboko a-nọ-beru bẹ
teke akọbe iphe l'alì a-dụ;
teke akpata iya akpata adụ.
Teke oyi atsu a-dụ;

teke okpomoku du;
 adukwapho.
 Onanwu a-du;
 udzumini adukwapho.
 Eswe a-du; enyashi adukwapho;
 ophu o du-buhubaedu.”

Ogbandzu Chileke yele Nuwa

9 ¹Chileke bya agoru onu-oma nu Nuwa yee unwu iya; su phe: “Unu zua azuzu; kaba igwerigwe; unu azua zu-jia mgboko. ²Unwu anu, nokota l'eliphe; waa enu, ephe l'eli; waa iphemiphe, awu l'epho; waa ema, bu le mini l'ophu be ndzu unu a-nodu agukota; ephe atsu unu ebvu. G'ephe ha a-nodukota unu l'eka. ³Iphemiphe, dzu ndzu eme ukporo a-bukotaru unu nri. Oo ge mu nukotaru unu oshi-omi l'ophu bu ge mu nukotakarupho unu iphemiphe l'ophu.

⁴“Ole g'unu ta atajekwa anu me mee ndzu nodukwadu iya l'ime ehu. ⁵Mee ndzu unu be mu a-ji aji iya. Teke o shi anu l'eka mu ajikwaa ya pho aji iya. Nemadzu -gburu nwibe iya be mu a-jikwapho aji iya.

⁶“Onye gburu nemadzu bukwapho
 nemadzu be e-gbu yebdua.
 Noo kele Chileke meru nemadzu;
 o du g'o du.

⁷A -bya l'ehu ke gubedua; unu jaa ajaja ka l'otu; unu azua azuzu zujia mgboko.”

⁸Tobudu iya bu; Chileke su Nuwa; yee unwu iya, ephe l'iya tukoru nodu l'eka ono: ⁹“Nta-a be mu l'unu waa oshilokpa unu ndu ophu no l'iphu gbawaru ndzu. ¹⁰Teme anyi l'iphe, dzu ndzu, unu l'iya shi tukoru nodu gbakwapho ndzu; mbu enu; waa anu, bu iphe-edobe; waa anu-egbudu; iphemiphe ono, unu l'iya tukoru shi l'ugbo futu ono; mbu iphemiphe ono, bu l'eliphe ono. ¹¹Mu l'unu gbaakwaru ndzu. E tee gudebaekwa utso erigbushi nemadzu l'ophu ozobaa. Ophu utso, e-mebyishibaa mgboko-a l'ophu abyaedu agbabaa.”

¹²Chileke su: “Waa iphe, egoshi ogbandzu ono, mu l'unu; waa iphe, dzu ndzu, unu l'ephe tukoru nodu l'eka ono; waa ogbo ophu no l'iphu agba bu owa-a. ¹³Mu wowaru eko-mini mu dobe l'akpaminigwe; teme oo-bujee-rupho iphe, egoshi ogbandzu mu le mgboko l'ophu. ¹⁴Teke igwe rwuru erwurwu; o gbaa eko-mini ono; ¹⁵mu a-nyata ogbandzu mu l'unu; waa iphe, dzu ndzu l'ophu, dulaje l'udu iya l'udu iya. Mbu le mini ta abya-baedu abya utso bya erigbushia iphe, no ndzu ozo. ¹⁶Iphe, bukpoo teke eko-mini gbaru l'urwukpu; mu a-huma iya nyata ogbandzu ojejeje ono, Chileke yee iphe, no ndzu, dulaje l'udu iya l'udu iya, no le mgboko gbaru ono.”

17Ọ buru iya bu Chileke su Nuwa: “Ọo iphe-a bu iphe, egoshi ogbandzu ono, mu l'iphemiphe, dzu ndzu, no l'eliphe gbaru ono.”

Unwu Nuwa

18Unwu Nuwa, shi l'ugbo ono lufuta bu Shemu; waa Hamu; waa Jiafeti. Ọ buru Hamu bu nna Kėnanu. 19Ọ buru shita l'unwu Nuwa unwoke ẹto-a be nemadzu shiru dzuru mgboko l'ophu.

20Noo ya; Nuwa bu onye emebe iphe l'ali; bya eworu opfu-vayinu ko. 21O rwua ujiku lanu; o ngua mee, shi l'akpuru vayinu iya ono. Ọ wata iya atsutsu k'ophu o gba oto je azee l'ulo-ekwa iya. 22Hamu, bu nna Kėnanu je ahuma nna iya eka o gba oto; bya eje epfuaru iya unwune iya ephenebo ophu no l'etezi. 23Shemu; waa Jiafeti bya achita ekwa kobegbaa onwophe l'ukuvu je lazụ lazụ je aphukpute nna phe ono, gba oto ono. Ephe woru iphu ghaa l'ibe iya ozo gephe ta ahuma nna phe l'eka o gba oto.

24O be teke mee tsubuhuru Nuwa; o tehu bya anuma iphe ono, nwa iya ke nwata meru iya ono; 25o su:

“Kėnanu be buakwaa
onye a turu onu.

Ọo-buru ohu ndu bu ohu
l'eka unwune iya.”

26O sukwapo:

“Ge tua Chipfu, bu
Chileke ke Shemu epha!
Ge Kėnanu bukwaru
ohu Shemu!

27Ge Chileke mee ge
Jiafeti jaa ajajà!
Ge Jiafeti buru l'ulo-ekwa
Shemu!

Ge Kėnanu bufukwarupho
ohu iya!”

28G'utso ono byachaaru be Nuwa nufuaru ukporo apha iri l'esa l'apha iri. 29Mkpako iphe, Nuwa noru buru unu apha labo l'ukporo apha esa l'apha iri; bya anwuhu.

Àjàjà ohamoha

10 1Waa oshilokpa unwu Nuwa, bu Shemu; waa Hamu; waa Jiafeti baa. Mbụ l'a nwushiru phe unwegirima le g'utso ono lachaaru.

Eri Jiafeti

2Unwu Jiafeti bu Goma; waa Magogu; waa Madayi; waa Jiavanu; waa Tubalu; waa Mesheku; waa Tirasu.

³ Ẹnwu kẹ Goma b̄uru Ashikenazu; waa Rifatu; waa Togarama.

⁴ Ẹnwu kẹ Jiavanu b̄u Elisha; waa Tashishi; waa ndu Kitimu; waa ndu Rodu. ⁵ Ndu ono b̄u p̄hẹ b̄u eri Jafeti. Ọ b̄uru p̄hẹ bẹ iphe, bukpoọ ọha, bukube eze-ẹnyimu gbẹ l'ẹka jakashia. Ọha ono g'ẹp̄he hakota nwegbaar̄u oke al̄i yẹe opfu-al̄i nkep̄hẹ; waa ipfu ipfu nkep̄hẹ.

Eri Hamu

⁶ Ẹnwu Hamu b̄u Kushi; waa Ijiputu; waa Putu; waa Kėnanu.

⁷ Ẹnwu kẹ Kushi b̄uru Seba; waa Havila; waa Sabuta; waa Rama; waa Sabuteka.

Ẹnwu Rama b̄u Sheba; waa Dedanu.

⁸ Kushi b̄u nna Nimurodu, b̄u onye mechaar̄u bya ab̄uru eze ojogu l'eli-phe. ⁹ Ọ b̄u onye ike d̄u l'achi nta l'ip̄hu Chipfu; noo iphe, meru g'o gude a nodu anmajẹ ẹtu su: "Onye-a d̄u gẹ Nimurodu onye ike d̄u l'achi nta l'ip̄hu Chipfu." ¹⁰ Ẹka o gbuberu ishi ab̄uru eze iya b̄u lẹ Babelu; waa Ereku; waa Akadu; waa Kalune, no l'ime al̄i Shina. ¹¹ O shi l'ẹka ono wata ajaja jarwua al̄i Asiriya, b̄u ẹka ọ no meta mkp̄kpu Ninive. O metakwapho mkp̄kpu Rehobotu-Iye; waa mkp̄kpu Kala; ¹² waa mkp̄kpu Resenu. Resenu ono no lẹ mgbaka Ninive waa Kala. Ọ b̄uru iya b̄u oke mkp̄kpu ono.

¹³ Ijiputu b̄u nna ndu Ludu; waa ndu Anamu; waa ndu Lehabu; waa ndu Nafutu; ¹⁴ waa ndu Paturosu; waa ndu Kasuluhu. Ndu Kasuluhu ono b̄u iya b̄u ẹka ndu Filisitayinu shi. Ijiputu bukwarupho nna ndu Kafuto.

¹⁵ Kėnanu b̄u nna Sayidonu. Ọ b̄uru Sayidonu ono b̄u okpara iya. Kėnanu bukwarupho nna ndu Hetu; ¹⁶ waa ndu Jiebusu; waa ndu Amoru; waa ndu Gigashi; ¹⁷ waa ndu Hevu; waa ndu Aku; waa ndu Sini; ¹⁸ waa ndu Avadi; waa ndu Zamaru; waa ndu Hamatu.

E mecha; okpa-ipfu ndu Kėnanu bya ajakashia. ¹⁹ Oke al̄i Kėnanu gbẹ lẹ mkp̄kpu Sayidonu; mẹ a -nodu eje mkp̄kpu Jira; noo jas̄u lẹ mkp̄kpu Gaza. Ọ gbekwapho lẹ Gaza l'ẹka ono; mẹ a -nodu eje mkp̄kpu Sodomu yẹe Gomora; yẹe Adama; yẹe Zebowimu; noo jas̄u lẹ mkp̄kpu Leshu.

²⁰ Ọ b̄uru ọha ono bukota Ẹnwu Hamu; g'ẹp̄he hakota nwegbaar̄u ipfu ipfu nkep̄hẹ; yẹe opfu-al̄i yẹe oke al̄i nkep̄hẹ.

Eri Shemu

²¹ Shemu nwushikwarupho unwegirima unwoke. Nwune Jiafeti k'ogere-nya b̄u Shemu. Ọ b̄uru Shemu b̄u ochochoroche unwu Eba l'ophu.

²² Ẹnwu Shemu b̄u Elamu; waa Ashuru; waa Afakusadu; waa Ludu; waa Aramu.

²³ Ẹnwu kẹ Aramu b̄uru Uzu; waa Hulu; waa Geta; wafua Mashu.

²⁴ Afakusadu b̄u nna Shela. Shela bya ab̄uru nna Eba.

²⁵Eba nwuta unwoke labo. Epha onye lanu bu Pelegu; noo kele a nwuru iya teke mgboko kekashihuru. Epha nwune iya buru Jiokutanu.

²⁶Jiokutanu bu nna Alumodadu; waa Shilefu; waa Hazamaveti; waa Jera; ²⁷waa Hadoramu; waa Uzalü; waa Dikila; ²⁸waa Obalu; waa Abime-lu; waa Sheba; ²⁹waa Ofi; waa Havila; wafua Jiobabu. G'ephe ha bukota unwu Jiokutanu.

³⁰Eka ephe bu shi le Mesha phobe rwua Sefa l'uzo oha ubvu l'uzo enyanwu-awawa.

³¹O buru oha ono bukota unwu Shemu; g'ephe hakota nwegbaarü ipfu ipfu nkephe; yee opfu-ali yee oke ali nkephe.

³²Oha ono g'ephe ha bukota oshilokpa unwu Nuwa; g'ephe ha nwegbaarü ipfu ipfu nkephe. O buru phe be ohamoha shi leka dzuru eliphe l'ophu gutso gbacharu.

Ulo-eli Babelu

11 ¹Unwu-eliphe l'ophu shi epfukota opfu-ali lanu, a nu-dzuru. ²Noo ya; o be teke ndiphe kwaseru uzo enyanwu-awawa; ephe je ahuma nsuda le Shina; ephe je ebukobe leka ono.

³Ephe su nwibe phe: "Unu bya g'anyi kpa eja hua ya l'oku hu-ghee ya ahu-ghe." O buru eja akpukpu be no-chiru phe enya mkpuma; ephe wua ya korota g'o buru otu-paa. ⁴Ephe su: "Unu bya g'anyi metaru onwanyi mkpukpu; g'anyi kpa ulo-eli, e-je asupfuru l'igwe. Oo ya bu; g'anyi aburu ndu aa-maru epha phe; g'anyi te je agbakashihu dzuru mgboko."

⁵Tobudu iya bu; Chipfu bya enyizeta g'o huma mkpukpu ono; yee ulo-eli ono, unwu-eliphe akpu ono; ⁶bya asu: "Ndu-a bukwa nanu; bya epfukota opfu-ali lanu; ephe wata eme iphe, du egube-a. O to nwekwa iphe, ephe chiru idzu ememe g'ephe te emegha iya. ⁷Unu g'anyi nyizeta je aghaa phe olu-opfu; g'iphe, nwibe phe epfu te edojehe phe enya."

⁸Oo ya bu; Chipfu bya achikashia phe; ephe dzuru mgboko; ephe paru akpu mkpukpu ono haa. ⁹Noo iphe, meru g'o gude e kua ya Babelu; noo kele oo eka ono be Chipfu ghashiru opfu unwu-eliphe l'ophu. O shi leka ono chikashia phe; ephe dzuru mgboko.

E shi le Shemu jasü le Ebiramu

¹⁰Waa oshilokpa Shemu.

A noepho mgbarapha labo gutso byachaaru ono; Shemu nwuta Afakusadu. Teke ono be Shemu nowaru ukporo apha ise teme o nwuta Afakusadu ono. ¹¹O nwuchaa Afakusadu; bya anofua unu apha l'ukporo apha ise. O nwushikwapho unwoke yee unwanyi tsobe Afakusadu.

¹²Afakusadu bya anoo ukporo apha l'apha iri l'ise; bya aburu nna Shela. ¹³O nwuchaa Shela; bya anofua unu apha l'apha eto. O nwushikwapho unwoke yee unwanyi tsobe Shela.

¹⁴Shela bya anọọ ụkporo apha l'apha iri; bya abụru nna Eba. ¹⁵Ọ nwụchaa Eba; bya anọfua unu apha l'apha ẹto. Ọ nwụshikwapho unwoke yee unwanyi tsobe Eba.

¹⁶Eba bya anọọ ụkporo apha l'apha iri l'ẹno; bya abụru nna Pelegu. ¹⁷Ọ nwụchaa Pelegu; bya anọfua unu apha l'ụkporo apha l'apha iri. Ọ nwụshikwapho unwoke yee unwanyi tsobe Pelegu.

¹⁸Pelegu bya anọọ ụkporo apha l'apha iri; bya abụru nna Rewu. ¹⁹Ọ nwụchaa Rewu; bya anọfua ụkporo apha iri l'apha tete. Ọ nwụshikwapho unwoke yee unwanyi tsobe Rewu.

²⁰Rewu bya anọọ ụkporo apha l'apha iri l'ẹbo; bya abụru nna Sérugu. ²¹Ọ nwụchaa Sérugu; bya anọfua ụkporo apha iri l'apha ẹsaa. Ọ nwụshikwapho unwoke yee unwanyi tsobe Sérugu.

²²Sérugu bya anọọ ụkporo apha l'apha iri; bya abụru nna Nahọ. ²³Ọ nwụchaa Nahọ; bya anọfua ụkporo apha iri. Ọ nwụshikwapho unwoke yee unwanyi tsobe Nahọ.

²⁴Nahọ bya anọọ ụkporo apha l'apha tete; bya abụru nna Tera. ²⁵Ọ nwụchaa Tera; bya anọfua ụkporo apha ise l'apha iri lẹ tete. Ọ nwụshikwapho unwoke yee unwanyi tsobe Tera.

²⁶Tera bya anọọ ụkporo apha ẹto l'apha iri; bya abụru nna Ebiramu; waa Nahọ; waa Haranu.

²⁷Waa oshilokpa Tera.

Tera bụ nna Ebiramu; waa Nahọ; waa Haranu. Haranu bụru nna Lọtu. ²⁸Nna iya, bụ Tera nọdukwadu ndzụ; Haranu nwụhu lẹ mkpụkpu Uru l'alị Kaludiya, bụ ẹka a nwuru iya. ²⁹Ebiramu yee Nahọ bya atụko lụa nwanyi. Ẹpha nyee Ebiramu bụ Serayi; ẹpha nyee kẹ Nahọ bụru Milika. Onye nwuru Milika bụ Haranu; ọ bụkwarupho Haranu ono nwuru Isuka. ³⁰Ọphu Serayi anwutaduru nwa; noo kele ọ tọ tsudu ime.

³¹Noo ya bụ; Tera duta nwa iya, bụ Ebiramu; waa nwanwa iya, bụ Lọtu, bụ nwatibe Haranu; bya edutakwapho nyee nwa iya, bụ Serayi; bụ iya, bụ nyee Ebiramu. Ẹphe tuko swiru shi lẹ Uru, nọ l'alị Babilonu jeshia Kėnanu. Obenu l'ẹphe rwuerupho Haranu; ẹphe buru l'ẹka ono.

³²Tera nọephọ ụkporo apha iri l'apha ise; ọ nwụhu lẹ Haranu.

Chileke eku Ebiramu

12 ¹Chipfu sụru Ebiramu: “Haa alị ngu; yee ndibe unu; mę ọkpoku ibe nna ngu; lashia alị, mu e-goshi ngu.

²“Mu e-me ngu l'ii-buru ọha,
parụ ẹka apaa;
tẹme mu ekebekwa
ngu phọ l'oma.

Mu emee g'ẹpha ngu paa ẹka;
tẹme l'iburu onye mu

e-shi l'ehu iya ekebe
ndu ozo l'oma.

³ Mu a-goru onu-oma nu ndu
goru onu-oma nu ngu;
ndu turu ngu onu be mu a-tu onu.
Teme ndu mgboko l'ophu be
ee-gude iswi ehhu ngu kebe l'oma.”

⁴ Oo ya bu; Ebiramu tugbuna, bu iphe, Chipfu pfuru iya. Lotu tsoru iya. Ebiramu nowaru ukporo apha eto l'apha iri l'ise teke o shi Haranu tugbua. ⁵ Tɔbudu iya bu; Ebiramu bya atuko eku, ephe kpataru akpata rwuta; bya eduta nyee ya, bu Serayi; waa Lotu, bu nwa nwune iya; mekpoo ndu ephe shi le Haranu gude; ephe wufu; o buru phe ala ali Kenu. Ephe je jashe ephe jerwua aka ono.

⁶ Ebiramu phe kwaseru ali ono gbiriri jashe ephe rwua aka eze oshi More no le mgboru mkpukpu Shekemu. O buru ndu Kenu bu l'ali ono teke ono. ⁷ Oke Chipfu byapfutaru Ebiramu bya ashe iya: “O kwa oshilokpa ngu be mu a-nukota ali-a.” Ebiramu bya akparu Chipfu ono, byapfutaru iya nu ono oru-ngweja.

⁸ Ebiramu phe gbe l'eka ono kwaseru uzo enyanwu-awawa ubvu Betelu; je akpobe ulo-ekwa phe l'eka Betelu no l'uzo enyanwu-ariba. Eyayi nodu l'uzo enyanwu-awawa. Ebiramu rwukwaa aka ono bya akparu Chipfu oru-ngweja; bya anodu l'eka ono kpo-ku epha iya. ⁹ Noo ya; Ebiramu phokata ulo-ekwa iya tugbua kwaseru uzo echiegu ndohali.

Ebiramu bu l'ali Ijiputu

¹⁰ Tɔbudu iya bu; eze egu wata ememe l'ali onoya; Ebiramu phe lashia ali Ijiputu gephe je ebutota l'eka ono; noo kele egu ono eme shii. ¹¹ Ephe bya l'abah ali Ijiputu; Ebiramu she nyee ya, bu Serayi: “Mu maru li bu nwanji, manukaru mma. ¹² Le ndu Ijiputu -huma ngu; be ephe a-sukwa li bu nyee mu. Ephe eworu mu gbua; haa ngu gi nodu ndu. ¹³ Sujekwa le mu le ngu bu nwune; oo ya bu geemekwanaru mu ree l'iswi ehhu ngu; teme liishikwapho nno mee g'ishi mu kpo-pfuru.”

¹⁴ Ebiramu phe bya abahu ali Ijiputu. Ndu Ijiputu huma le Serayi bu nwanji, ama ntumatu. ¹⁵ Ndu no l'oke okwa Fero hūmae ya pho; bya eje atua onu iya l'iphu Fero. A bya eduta iya lashia ibe Fero. ¹⁶ Fero meeru Ebiramu ree l'opfu ehhu Serayi; bya akpee ya aturu; kpee ya eswi; kpekwa ya pho oke le nyee nkafu-igara; bya eduru unwoke yee unwanji, a-nodu ejeru iya ozi nu iya. O bya akpekwa ya pho inya-kamelu.

¹⁷ Tɔbudu iya bu; Chipfu bya aloru ejo iphe-ememe tu Fero yee ndibe iya; opfu l'o dutaru nyee Ebiramu, bu Serayi. ¹⁸ Noo ya; Fero kua Ebiramu she iya: “?Denu go gude i mee mu egube iphe owa-a? ?Bu gunu be i ti kageduru mu l'oo nyee ngu? ¹⁹ ?Bu gunu meru iphe, i suru l'oo nwune

ngu nwanyị; ị haa; mu bya aluta iya lụaha? Ole g'ọ dūhabe; waa nyee ngu baa; duta iya tūgbua!" ²⁰Fero bya asụ gẹ ndu-ozī iya chifu Ebiramu. Ephe chifu yele nyee ya; waa iphemiphe, o nweru.

Ebiramu yele Lotu ekekaha

13 ¹Noo ya; Ebiramu; waa nyee ya; waa iphemiphe, o nweru; yee Lotu, ephe l'iya swi shi l'alī Ijiputu tūgbua lashia echięgu ndohali. ²Ebiramu nwewaru iphe-edobe; waa mkpola-ochaa; waa mkpola-ododo shii.

³Ephe shi l'echięgu ndohali jekpōepho; ephe -shi l'eka-a; ephe ejerwua l'eka-a; ephe -shi l'eka; ephe ejerwua l'eka-a; gbiriri jasū ephe jerwua l'uzo isheli mkpukpu Betelu; mbū ęka ono, nọ lę mgbaka Betelu yele mkpukpu Eyayi ono, bū iya bū ęka ephe kpōbejehawaru ụlo-ękwa phe-a; ⁴tēme ọ buru ęka Ebiramu vuru ụzo kpua ọru-ngweja. Ọ nōdu l'eka ono kpō-kua-haa Chipfu.

⁵Noo ya; Lotu-a, yele Ebiramu swi-a nwekwarupho aturu, dū igwerigwe; waa eswi, dū igwerigwe; waa ụlo-ękwa, dukwapho igwerigwe. ⁶Ophu alī ono asuedu ephenebo ebubu; kele iphe-edobe phe kwatakpoo paa ęka apaa; k'ophu bū l'ephe ta aduedu ike anokota l'eka lanu. ⁷Oo ya bū; uswo daru ndu echeru Ebiramu iphe-edobe; yee ndu echeru Lotu nkiya. Ndu Kėnanu yee ndu Pėrezu shikwapho buru l'alī ono teke ono. ⁸A nonyaa; Ebiramu sū Lotu: "G'uswo ta adashinuru mu lę ngu; ophu ọ dashinuru ndu echeru ngu iphe-edobe; yele ndu echeru mbędua nkemu; eshinu mu lę ngu bū abubu. ⁹Ị tūkoerupho alī ọbu l'ophu hūma-gbua. G'anyi ta akwōpfuheru l'eka lanu. Hatakpōepho ękiya ophu ị-la je eburu. Ị -nōdu ala l'eka-icha; mbędua ala l'eka-utara; teke ịla l'eka-utara; mbędua ala l'eka-icha."

¹⁰Lotu palia ęnya imeli bya ahuma lę nsuda ęnyimu Jiōdanu, nōru kpaa lę mkpukpu Zowa bę nggele dū shii; ọ dūepho gẹ mgbabu Chipfu ono; ozoo gẹ alī Ijiputu. Teke ono bę Chipfu teke emebyidu Sodomu yee Gomóra. ¹¹Tōbudu iya bū; Lotu gude ęka iya hata nsuda ęnyimu Jiōdanu l'ophu; bya egweta lashia ụzo ęnyanwu-awawa. Ọ buru iya bū l'umadzu labo ono ekekaha; ¹²Ebiramu buru l'alī Kėnanu; Lotu je ebukube mkpukpu, nōgbaa lę nsuda ono. O woru ụlo-ękwa iya je akpōbe lę mgboru Sodomu gędegede. ¹³Noo ya; ndu Sodomu nōdu eme ejo-iphe; bya aburu ndu menukaru Chipfu iphe-ęji.

¹⁴Tōbudu iya bū; Lotu lufuchaepho; Chipfu sū Ebiramu: "Gbę l'eka ị nọ palia ęnya lee l'uzo isheli; waa l'uzo ohali. Liile l'uzo ęnyanwu-awawa; lekwapho l'uzo ęnyanwu-ariba. ¹⁵Alī ono, ị hūmakotaru ono mgburugburu bę mu a-nukota gū l'awa ngu g'unu nweru jasū l'ojejoje. ¹⁶Mu e-me awa ngu g'ephe ha g'ęja, nọ l'alī. K'ophu bū l'oo onye duru ike guta ęja, nọ l'alī bę a-dū ike guta awa ngu. ¹⁷Jephekota alī ono maru ęka o jeberu l'ogologo; l'iiamaru g'ọ habe ọsa. Noo kele mu a-nukota ngu iya."

¹⁸Oo ya bu; Ebiramu phuta ulo-ekwa iya bya eje ebukube eze oshi ndu Mamure, dokoberu le Heburonu. O nodu l'eka ono kparu Chipfu oru-ngweja.

Ebiramu adzota Lotu

14 ¹O buru teke ono be Amurafelu, bu eze ndu Shina; me Ariyoku, bu eze ndu Elasa; me Kedolawoma, bu eze ndu Elamu; waa Tidalu, bu eze ndu Goyimu chitaru ndibe phe tugbua jeshia ogu. ²O buru Bira, bu eze ndu Sodomu; me Birisha, bu eze ndu Gomora; me Shayinabu, bu eze ndu Adama; me Shimiba, bu eze ndu Zebowimu; waa eze Bela, bu iya bu Zowa be ephe jeru etso ogu obu. ³Ndu k'ikpazu-a bya edzukobe chita ndibe phe jepfushia phe ogu le nsuda Sidimu, mechaaru buru Ezeenyimu Unu. ⁴O buru iphe, kparu ogu ono bu l'ephe nokotaru apha iri l'ebo l'eka Kedolawoma; o rwua le k'iri leto; ephe kwefu ike.

⁵O rwua l'apha k'iri leno; Kedolawoma yee ndu eze ono, wupfutaru iya nu ono tuko je anodu le Asheterotu Kaneemu lwu-kpee ndu Rafa; bya anodu le Hamu lwu-kpee ndu Zuzu; bya anodukwapho le Shave-Kiryatayimu lwu-kpee ndu Emu. ⁶Ephe bya eje anodu l'ohu ubvu ndu Siye lwu-kpee ndu Horu; lwa phe jasu le Elu-Paranu, no le mgboru echiegu. ⁷Ephe bya alwaphuta azu bya eje anodu le Enu-Mishipati, bu iya bu Kadeshi; lwutakota ali Amaleku l'ophu; bya alwu-kpee ndu Amoru, bu le Hazeonu-Tama.

⁸Tobudu iya bu; eze ndu Sodomu; me eze ndu Gomora; me eze ndu Adama; me eze ndu Zebowimu; wafu eze Bela, bu iya bu Zowa; wufuta bya eje akwaka k'ogu le nsuda Sidimu; ⁹kwaberu Kedolawoma, bu eze ndu Elamu; me Tidalu, bu eze ndu Goyimu; me Amurafelu, bu eze ndu Shina; waa Ariyoku, bu eze ndu Elasa. Oo ya bu; le ndu eze eno letso ndu eze ise ogu. ¹⁰Nsuda Sidimu ono be iduma iduma, e bvutagbaru korota du igwerigwe. Obe teke ndu eze Sodomu waa Gomora ono; me ndibe phe tukoru gbalaaha agbala; o nweru ndibe phe ndu ophu haru dalahu iya nu. Ndu ophu phoduru nu gbaru laa l'ubvu ubvu. ¹¹Ndu eze eno ono bya atuko eku Sodomu, yele Gomora; me nri phe gweta tugbua. ¹²Ephe kputakwapho Lotu, bu nwa nwune Ebiramu yele eku iya; eshinu o bu le Sodomu.

¹³Onye lanu l'ime ndu gbaru nu bya epfuaru iya Ebiramu onye Hibiru. Ebiramu bu le mgboru eze oshi ndu Mamure. Mamure bukwanu onye Amoru bya aburu nwune Eshukolu waa Ana. Ndu ono be ephe le Ebiramu tugbaru buru nanu. ¹⁴Ebiramu numaeppo l'abubu iya be a lwutaru l'ogu; o kua unwoke iya ukporo umadzu iri l'ise l'umadzu iri lesato, a nwuru l'ibe iya, e ziru g'aalwuje ogu. Ephe chipyabe phe gbpfu phe le Danu. ¹⁵O -rwua lenyashi; Ebiramu bya eekashia unwoke iya gude tsoo phe ogu; lwu-kpee phe; chia phe gbiriri jasu ephe gbarwua Hoba, bu isheli Damasukosu. ¹⁶O

natakota phe ivu ono, ephe shi gweta ono; bya edulata abubu iya, bu Lotu yee eku nkiya; waa unwanyi; mewaro ndu ozo, ephe shi rwuta.

¹⁷Ebiamu lwu-kpechaa Kedolawoma yee ndu eze, ephe l'iya swi bya alwatashia; eze ndu Sodomu gba iya ndzuta le nsuda Shave, bu iya bu nsuda, aza Nsuda Eze.

¹⁸Noo ya bu; Melikizedeku, bu eze ndu Salemu gude buredi; waa mee byapfuta phe. Melikizedeku ono bu onye uke Chileke, bu Okalibe-kakota-shii. ¹⁹O bya agoru onu-oma nu Ebiamu su:

“Ge Chileke, bu
Okalibe-kakota-shii
kebe gube Ebiamu l'oma!
Mbulembu Chileke ophu bu iya
meru igwe bya emee eliphe.

²⁰G'e tua Chileke,
bu Okalibe-kakota-shii epha!
Mbulembu onye ono,
woru ndu ohogu ngu
ye ngu l'eka!”

Ebiamu nu iya oke-lanu-l'uzo-iri l'iphemiphe ono, o gwephtaruru azu ono; o nata iya.

²¹Eze Sodomu sukwanu Ebiamu go haaru yebedua ndu ophu bu nemandzu; gwetawaroru ophu bu ivu nworu.

²²Ebiamu su eze ndu Sodomu: “Mu paliakwaru eka riaru Chipfu angu; mbulembu Chileke ophu bu Okalibe-kakota-shii; onye meru igwe bya emee eliphe; ²³l'o to dudu iphe, bu iphe ngu, mu a-nata; mbulembu m'obeta o buru oghu; ozo eri akpokpa; go to du teke ji-su l'oo ngu meru Ebiamu; o baa eze. ²⁴O to dudu iphe, mu a-nata gbahaa ophu ndu mu l'iya swi riwaru eriri; waa oke-iphe ophu rwuberu ndu tso mu jee; mbulembu-a; ge Ana; waa Eshukolu; waa Mamure ria oke, rwuberu phe nu.”

Ogbandzu Chileke yele Ebiamu

15 ¹E mechaa; Ebiamu numa Opfu Chipfu l'ophulanya. O su iya:
“Ge ndzu ba agushi ngu
Ebiamu.

Oo mbedua bu onye
egbobutaje ngu nu;
bya aburu obunggo ngu,
paru eka.”

²Ebiamu su: “Gube Nnajiuphu, bu Chipfu; ?bu gunu ozo be ji-nu mu ge mu ta nwutaduru nwa-a; teme onye e-mecha nwekotaru eku mu buru Eliyeza-a, bu onye Damasukosu-a?” ³Ebiamu bya asukwapho: “Nta-a, gi ti nuduru mu nwa-a bunu ohu, a nwuru l'ibe mu e-mecha ria iphe mu.”

⁴Tɔ̀budu iya bụ; Chipfu sụ iya: “Onye ono ta abụkwa iya e-ri iphe ngu. Ọ kwa nwa nwoke ọ́phu shi ngu l'ẹ́hu e-ri iphe ngu ọ́bu.” ⁵Ọ bya eduta iya lụ-
fu etezi bya asụ iya: “Palia ẹnya lee l'akpaminigwe gụa kpokpode, nọ iya nù
ọ́gu; m'ọ́ bụru l'ì-dù ike gụkota iya.” Sụ iya: “Noo g'awa ngu a-ha bụ ono.”

⁶Ebiramu kweta iphe, Chipfu pfuru. Ọ gụaru iya ya l'apfube-ẹka-oto.

⁷Ọ sụkwa iya pho: “Ọo mbedua, bụ Chipfu duru ngu dufuta lẹ mkpụ-
kpu Uru, nọ l'alì Kaludiya gẹ mu bya anụ ngu alì-a g'ọ́ bụru oke alì ngu.”

⁸Ebiramu sụ: “Jiko Nnajiuphu, bụ Chipfu; ?denu gẹ mu e-shi maru lẹ
mu e-nweru iya?”

⁹Chipfu sụ iya: “Wotaru mu ada eswi; waa ada eghu; waa ebili, gbacharu
apha ẹto ẹto; ẹme waa kparaka; waa ndupfu.”

¹⁰Ebiramu tũko iphe ono wotaru iya; bya asụchaa ya ibe; bya ewocharu
ibiribe iya ono dobegbaa g'ọ́ ghaaru nwibe iya iphu. Ọ́phu ọ́ sùduru
ndu ọ́phu bụ ẹnu ibe. ¹¹Enu, erije anụ phezetagbaa g'ẹ́phe vùka anụ ono;
Ebiramu chifu phe.

¹²Enyanwu nyìhujeeppo; oke mgbenya tų Ebiramu. Ọ́chii sọ-kputa iya.
Ọ́chii ono agba ntumatu; ẹme ọ́ nọdu anyì ishi ẹdzu. ¹³Chipfu bya asụ
iya: “G'ọ́ doo ngu ẹnya ree l'oshilokpa ngu bẹ e-mecha bụru nlwamulwa
l'alì, abudu nkephe; leemee phe ohu kpa phe ẹhu l'ẹka ono unu apha.

¹⁴E -mechaa ẹphe evuru ẹku, ha shii lwa. Ọle ọ́ha ono, ẹphe shi ejeru ozi
ono bẹ mu a-nụkwanu aphu. ¹⁵Obenu lẹ gubedua bẹ a-ka nka kaghekpọ́
ya akaghe. L'ìlapfu nna ngu phe l'ẹhu-guu; leelia ngu elili. ¹⁶O -rwua
l'ogbo k'eno bẹ oshilokpa ngu a-lwaphuta azu l'ẹka-a; kẹle nta-a bẹ ejo-
iphe, ndu Amọ́ru eme teke ebuhudu.”

¹⁷Enyanwu nyìhuchaepo lẹ g'ọ́chii byawaru; ite, a kpọ́beru ọ́ku, akpu
tųtųtųtų; yẹe orọ́ku, enwu phoophoophoo bya aghaja ibe anụ ono. ¹⁸Ọ
bụru lẹ mbọ́ku ono bẹ Chipfu yẹe Ebiramu gbaru ndzų. Ọ sụ: “Oshilokpa
ngu bẹ ya nuru alì-a; e -shi lẹ nggele Ijiputu jasụ lẹ Yufurétisu. ¹⁹Alì ọ́bu
bụ alì ndu Kenu; mẹ kẹ ndu Kenazu; mẹ kẹ ndu Kadumonu; ²⁰mẹ kẹ ndu
Hetu; mẹ kẹ ndu Pérezu; mẹ kẹ ndu Rafa; ²¹mẹ kẹ ndu Amọ́ru; mẹ kẹ ndu
Kénanu; mẹ kẹ ndu Gigashi; mẹ kẹ ndu Jiebusu.”

Hega yẹle Ishimelu

16 ¹Tɔ̀budu iya bụ; ọ́phu Serayi, nyee Ebiramu anwutaduru iya nwa.
Ọle Serayi nweru nwamgbọ́ko, shi Ijiputu, ọ́ gbaru ohu, aza Hega.
²Ọo ya bụ; Serayi sụ Ebiramu: “Gẹ Chipfu mewaru ọ́phu mu anwuta-
duru nwa-a bẹ ii-jepfukwa ohu mu g'a maru ?mu e-shi iya l'ẹka nweru
unwegirima?”

Ebiramu kweta bya emee iphe, Serayi pfuru. ³Ọ bụru gẹ Ebiramu bu-
waru l'alì Kénanu apha iri bẹ Serayi, bụ nyee ya kutaru nwamgbọ́ko
Ijiputu ono, bụ ohu iya ono kee ya; ọ́ luru. ⁴Ebiramu yẹle Hega kwaa; ọ́
bụru iya atsuta ime.

Ọ maerupho lẹ ya dūwaa ime bya akpọo nwanyi, nwe iya nū ẹbo l'afu. ⁵Serayi sū Ebiramu: “Ọ kwa gūbedua bẹ iphe-ẹhuka-a, mu eje-a shi l'ẹka. Gẹ mu kuru ohu mu kee ngu; ọ maerupho l'ọ dū ime bya akpọahaa mu ẹbo l'afu. Ọ kwa Chipfu e-kpe ikpe mu lẹ ngu.”

⁶Ebiramu sū Serayi: “Ohu ngu nọkwa l'ọbochi-ẹka ngu; mee ya iphe, dū ngu ree.” Serayi kponwuhana Hega mkponwu; ọ gbalana gbafuru iya.

⁷Tobudu iya bụ; Ojozi Chipfu hūma Hega lẹ mgboru ọgba, nọ l'echiegu. Ọgba ono bụ ọgba, nọ l'aguga ọzo, shiru jeshia Shuru. ⁸Ọ sū: “Hega; ohu Serayi; ?i shi awe eje awe?”

Hega sū: “Mu agbalaru onye nwe mu nū, bụ Serayi.”

⁹Ọo ya bụ; ojozi ono sū iya: “La azu lapfu onye nwe ngu nū je ewoze onwongu alị meje iphe, ọ sūru g'i mee.” ¹⁰Ojozi ono sūkwapfo: “Mu e-me g'awa ngu dū igwerigwe; k'ophu ẹphe a-buru aguta aguta.”

¹¹Ojozi Chipfu ono sūkwa iya pho:

“Ime ono, ị dū ono
bẹ ịi-nwū nwa nwoke.
Iphe, ịi-gu iya bụ 'Ishimelu'.
Noo kele Chipfu nūmawaru
ekwa ịira k'iphe-ẹhuka, iije.

¹²Ọo-buru onye agirigo.

Ọo-nodu etso onyemonye opfu;
onyemonye etsokwa iya pho
opfu.

Ephe l'unwune iya eburu
l'ukukanyi.”

¹³Ọ kua ẹpha Chipfu, bụ onye shi epfu eyeru iya nū sū: “Ị bụ Ẹlu-rọwi, bụ iya bụ Chileke ẹnya iya dū l'ẹka mu nọ.” Noo kele Hega sūru: “Nta-a bẹ mu hūmawaru onye ẹnya iya dū l'ẹka mu nọ.” ¹⁴Noo iphe, e gude gūa wẹlu ono “Bee-lahayi-rọwi,” bụ iya bụ, “ọ-dzū-ndzū-ele-mu-ẹnya.” Wẹlu ono nọ lẹ mgbaka Kadeshi yee Beredu byasu nta-a.

¹⁵E mechaa; Hega nwūaru Ebiramu nwa nwoke. Ebiramu gūa nwata ọbu “Ishimelu”. ¹⁶Ebiramu nōwaru ọkporo apha ẹno l'apha ishii teke Hega nwūtaru iya Ishimelu.

Ọgbandzu, e gude ebu-úbvù gbaa

17 ¹Ebiramu nọepfo ọkporo apha ẹno l'apha iri lẹ tete; Chipfu bya-pfuta iya bya asu: “Ọ kwa mbẹdua bụ Chileke, bụ Ọkwoolemka. Nodunu mu ntse g'uta ta adu lẹ ndzū ngu. ²Mu e-me g'ogbandzu mu lẹ ngu vuru ire. Mu emee g'unu dū igwerigwe shii.”

³Ebiramu daa kpube iphu l'alị. Chileke sū iya: ⁴“A bya lẹ mbẹdua; waa iphe, mu e-me l'ogbandzu mu lẹ ngu. Ịi-buru nnajioha, dū igwerigwe. ⁵E te ekubaedu ngu Ebiramu. Ẹpha ngu a-buru Ẹbirihamu; noo lẹ mu

mewaru ngu nnajjoha, dụ igwerigwe. ⁶Mu e-me ngu g'i zùà azùzù shii; mu eshi l'awa ngu mee oha, dụ iche iche; tème ndu eze eshi l'awa ngu fùta. ⁷Mu e-me oğbandzu mu ono g'ò buru oğbandzu, a-nò ojejoje; mbù g'ò buru oğbandzu mu lẹ ngu; waa ndu a-buru oshilokpa ngu l'ogbo ophu nò l'iphu; k'ophu mu a-buru Chileke ngu; waa Chileke oshilokpa ngu. ⁸Alì Kénanu l'ophu; mbù ẹka unu bụ nlwamulwa nta-a bẹ mu a-nù gù l'oshilokpa ngu; g'ò buru okiphe unu jasuru asuru; tème mu aburu Chileke phe.”

⁹Chileke sù Èbirihamu: “A bya lẹ gùbedua; dobekwa oğbandzu mu ono. Gùbedua l'onwongu; unu lẹ ndu a-buru oshilokpa ngu l'ogbo ophu nò l'iphu. ¹⁰Waa iphe, gùbedua e-me gude dobe oğbandzu mu lẹ ngu; waa oshilokpa ngu bụ owa-a: Gẹ ndibe ngu ophu bụ unwoke g'ẹphe ha bukọtaje úbvù. ¹¹Gùbedua e-bu úbvù g'ò buru iphe-ohubama, nò l'ogbandzu mu lẹ ngu. ¹²A -gbekpoo nta-a bẹ iphe, bukpoo nwa nwoke, a nwuru l'ibe ngu; o nowa ujiku ẹsato bẹ ee-buje úbvù; mẹ lẹ ndu bụ awa ngu; mẹ lẹ ndu shi ohozo, bụ ndu e gude okpoga zùta; mbù ndu abùdu awa ngu; ¹³mẹ a nwuru phe l'ibe ngu-o; ozoo l'i gude okpoga ngu zùta phe-o; g'e bufutajẹ phe úbvù. Oğbandzu mu ono, iphe-ohubama iya nò ngu l'ogwehu ono a-buru oğbandzu ophu a-nò jasù l'ojejoje. ¹⁴Nwoke, bụ akpapyi; mbù onye ebuduru úbvù; gẹ ndibe phe bufu iya; kele o mebyiru oğbandzu mu.”

¹⁵Chileke sùkwapho Èbirihamu: “Nyeeku ngu, bụ Serayi ta azaẹdu Serayi. Ẹpha iya a-buru Sera. ¹⁶Mu e-kebe iya l'oma mee ya g'ò nwutaru ngu nwa nwoke. Mu ekebe iya l'oma g'ò buru ne, nwuru oha, dụ iche iche; tème ndu eze ndiphe e-shi iya l'ẹka fùta.”

¹⁷Èbirihamu kpube iphu l'alì chĩa ochi bya asù onwiya: “?Nwoke, nọwaru ukporo apha ise bẹ aa-nwutaru nwa nwoke nta-a? Tọ ?Sera, nọwaru ukporo apha ẹno l'apha iri a-gbekwadu nta-a nwuta nwa nwoke?” ¹⁸Èbirihamu sù Chileke: “Jiko g'ẹnya ngu dụ nù lẹ ndzù Ishimelu!”

¹⁹Chileke sù: “Mu maru-a. Ọle nyeeku ngu, bụ Sera bẹ a-nwutaru ngu nwa nwoke. Iphe ịi-gù iya bụ Áyizaku. Mu l'iya; waa oshilokpa iya, etso iya l'azù bẹ mu l'ẹphe a-gba ndzù, a-nò ojejoje. ²⁰Ọ -buru kẹ Ishimelu bẹ mu nọmawaru iphe, i pfuru. Mu kebefutaje iya l'oma mee ya g'ò zushia ka l'otu. Ọo-buru nna ndu-ishi iri l'ẹbo; tème mu emee ya g'ò buru oha, parù ẹka. ²¹Ọle oğbandzu mu bukwanu mu lẹ Áyizaku bẹ a-gba iya nù; mbù onye ophu Sera a-nwutaru ngu ẹgube nta-a apha ozo.” ²²Chileke pfuẹbechaaru Èbirihamu iphe, o pfuru iya; o parù iya haa tųgbua.

²³Lẹ mbọku ono gẹdegede bẹ Èbirihamu dutaru nwa iya nwoke, bụ Ishimelu; mẹ ndu ozo, a nwuru l'ibe iya; mẹ ndu ophu o gude okpoga iya zùta bushia úbvù. Iphe, bukota unwoke, bu l'ibe iya bẹ o bukọtaru úbvù; gẹ Chileke sùru g'ò mee ya. ²⁴Èbirihamu nọwaru ukporo apha ẹno l'apha iri lẹ tete teke o buru úbvù; ²⁵nwa iya, bụ Ishimelu nowa apha iri l'eto. ²⁶A tųko Èbirihamu; waa nwa iya, bụ Ishimelu bukọtà úbvù l'ujiku lanu

ono. ²⁷Unwoke, bukọta l'ibe Ébirihamu l'ophu; me le ndu ophu a nwuru anwunwu l'ibe iya; me le ndu ophu a zutaru azuta l'eka ndu ohozo; be ye l'iya tukokwarupho bua ubvu obu.

Umadzu eto, kpafutaru Ébirihamu

18 ¹Noo ya; Chipfu bya abyapfuta Ébirihamu le mgboru eze oshi ndu Mamure; le go no ano l'onu ulo-ekwa iya l'echi eswe. ²Ébirihamu palia enya bya ahuma unwoke eto, pfuru l'ataphu iya. O humae phe pho bya ezilihu l'onu uzo iya gbapfushia phe. O gbapfu phe bya ephozetaru phe.

³O su: “Jiko Nnajiuphu mu; teke mu du ngu l'obu; ta aghatashinu ibe mube onye-ozu ngu. ⁴G'e kutanu nwa mini g'unu kwoo okpa tuta unme le mkpula oshi-a. ⁵Ge mu choru unu nri g'unu ria; g'ike adu unu; unu ejeshiwaro iphe, unu eje; eshi ophu unu batawaru ibe mube onye-ozu unu.”

Ephe su iya: “O du ree; mee g'i pfuru.”

⁶Ébirihamu bya emee egwegwa bahu l'ulo-ekwa gbapfu Sera; je asu iya: “Ngwa; mee egwegwa tuta ogbongu ukpokutu iphe, eegudeje eme buredi; tuta iya ogbongu eto gwophube gude mee buredi.”

⁷O bya agbaru je l'eka eswi iya doru; bya ahota nwada eswi, anu iya du belebele je akpee onye-ozu iya; onye-ozu ono kpuru iya je egbua boshia. ⁸O bya apata era-eswi; yee manu, e gude era-eswi mee; waa nweswi ono, a boshiru ono dobe phe l'ataphu. Ephe nodu eri nri ono; o no-kube phe le mkpula oshi ono.

⁹Ephe su iya: “?Denu nyee ngu, bu Sera?”

O su: “O nokwa l'ulo-ekwa anyi l'eka pho.”

¹⁰Chipfu su iya: “Egube nta-a apha ozo be mu lwafutajekwa azu; ozo bu le nyee ngu, bu Sera be a-nwu nwa nwoke.”

Sera no l'onu ulo-ekwa, Chipfu gharu okotazu ngabe nchi. ¹¹Ébirihamu yee Sera be buwaa ogerenya bya akahukpowaa shii; teme Sera no ghawa teke ogogo atsu ime. ¹²Sera chia ochi l'ime obu su: “?Ge mu gbirihucharu egbirihu; teme nnajiuphu mu kahwa go kahuru pho be mu a -gbé nta laaru iya l'ulo?”

¹³Chipfu su Ébirihamu: “?Bu gunu be Sera gude chia ochi su: ‘Ya anwutakwadu-a nwa nta-a; ge ya kahwaru egube-a?’ ¹⁴?O nweru iphe, kporu Chipfu eka ememe? Mu a-byakwa teke ono, mu turu onu l'apha ozo ono; ozo bu le Sera e-nweru nwa nwoke.”

¹⁵Ndzu guahaa Sera; o tua ego su: “Mu ta chikwaru ochi.”

O su iya: “Waawaa; i chicharu-a ochi.”

Ébirihamu arwochiteru ndu Sodomu

¹⁶Unwoke ono gbeshiepho alala; bya eshia uzo Sodomu. Ébirihamu tso-ru phe go duriberu phe. ¹⁷Chipfu su: “?Mu a-nodu awachiru Ébirihamu

iphe, mu eje ememe ƚo? ¹⁸Eshi ophu Ébirihamu e-mecha buru eze oha, okpehu du; teme ohamoha, no le mgboko be ee-gude iswi ehu iya kebe l'oma. ¹⁹Noo kele mu hotawaru iya g'o buru onye a-kpo-ziru unwu iya uzo; ephe le ndibe iya ndu ophu a-nodu etso iya l'azu; g'ephe meje iphe, mu suru g'ephe meje, bu iya bu g'ephe meje iphe, pfuru oto; waa iphe, gbaru phe nu. Oo ya bu ge mu emekwanaaru Ébirihamu iphe, mu kweru iya ukwe iya.”

²⁰Oo ya bu; Chipfu su: “E chikuwaru iya le mkpu shii l'iphe-eji ndu Sodomu yee Gomora be panukaru aka. ²¹Mu nodu eje ge mu maru ?iphe-eji phe kabu du-be eji g'e pfuru l'o du-be? Teke o to dudu; mu amakwarupho.”

²²Unwoke ono ghachi kwaseru uzo Sodomu; obenu le Ébirihamu pfukwaduru l'iphu Chipfu l'eka ono. ²³Ébirihamu bya akpiritaru iya ntse bya asu iya: “?Ii-mebyishi ndu ejo-iphe yee ndu pfuberu-eka-oto ƚo? ²⁴?O -buru le ndu pfuberu-eka-oto rwuru ukporo umadzu labo l'umadzu iri le mkpukpu ono? ?Ii-mebyishikwa iya pho? ?Tii gudedu iswi ehu ukporo umadzu labo l'umadzu iri, pfuberu-eka-oto, no iya nu pho haa ya?

²⁵A maru-a li ti tudu ama eme iphe, du nno; mbu gi gbua ndu pfuberu-eka-oto yee ndu ejo-iphe; ozo mee ndu pfuberu-eka-oto gi meru ndu ejo-iphe. A makwaru-a li ti tudu ama eme iphe, du nno; mbu ge gubedua, bu Onye-ikpe ke mgboko-a l'ophu te eme iphe, pfuru nhamunha.”

²⁶Chipfu su: “O -buru le mu humaru ukporo umadzu labo l'umadzu iri, bu ndu pfuberu-eka-oto le mkpukpu Sodomu be mu e-gudekwa iswi ehu phe hakota mkpukpu ono l'ophu.”

²⁷Ébirihamu pfukwa ozo su: “Eshinu mu gbenu kerebwanu k'epfu anu Nnajiuphu lebe adu iphe, mu bu gbahaa urwuku ye le nu; ²⁸?o -bukwanuru le ndu ono te erwuduru ukporo labo l'iri; mbu o -buru l'ephe phoduru umadzu ise; teme ephe erwua egube ono-ee?”

Chipfu su: “Mu -huma ukporo umadzu labo l'umadzu ise l'eka ono be mu te emebyikwa iya.”

²⁹Ébirihamu bya epfua ozo su: “?O -bukwanuru ukporo labo damu be i humaru-ee?”

O su: “Mu egude nu iswi ehu ukporo umadzu labo ono haa ya ememe.”

³⁰Ébirihamu su: “Jiko g'ehu te eghukwa gube Nnajiuphu egu; ge mu pfubaro: ?o -bukwanuru ukporo umadzu l'umadzu iri be a humaru l'eka ono-ee?”

O su: “Mu te emebyikwa iya me mu huma ukporo umadzu l'umadzu iri l'eka ono.”

³¹Ébirihamu su: “Eshinu mu gbenu kerebwanu k'epfu eyeru Nnajiuphu; ?o -bukwanuru ukporo umadzu kpoloko be a humaru l'eka ono-ee?”

O su: “Mu egude iswi ehu ukporo umadzu ono haa ya emebi.”

³²Ébirihamu su: “Jiko Nnajiuphu; g'ehu te eghukwa ngu egu; ge mu jifua nwa aji lanu: ?o -bukwanuru umadzu iri kpoloko be a humaru l'eka ono-ee?”

Ọ sụ: “Mu egude iswi ẹhu ụmadzu iri ono haa ya emebyi.”

³³Chipfu yẹle Ẹbirihamu pfughechaephọ ọ tughua; Ẹbirihamu lashia unuphu.

Emebyishi Sodomu yẹle Gómóra

19 ¹Ojosi labọ ono jerwua Sodomu l'uzenyashi. Ẹphe jeshia; Lọtu nọdu anọo l'onu-abata mkpukpu ono. Ọ hụmae pẹ phọ bya agba pẹ ndzuta; bya ephozetaru pẹ woru iphu kpube l'ali. ²Ọ sụ pẹ: “Nnajiuphu mu; mu arwọ unu g'unu batarọ l'ulo mube onye-ozu unu; bya akwọ okpa unu; unu akwaa ibe mu; o -rwua l'utsu; unu atughbuwaro jeshia iphe, unu eje.”

Ẹphe sụ waawaa; l'ẹphe a-kwa l'uzo l'enyashi ono.

³Ọ rwoọ pẹ rwohia pẹ ike gbiriri jasụ ẹphe tsoru iya bahu ibe iya. Ọ bya akwaaru pẹ eze ẹbyaa; mbụ gheeru pẹ buredi, e yeduru iphe, ekoje buredi; ẹphe taa. ⁴Ẹphe bya ala l'ulo; unwoke, shigba l'ekameka lẹ mkpukpu Sodomu; ẹgirima mẹ ọgerenya; bya asọ-pee ulo ono mgburugburu. ⁵Ẹphe bya ekua Lọtu sụ iya: “?Denu unwoke, bataru ibe ngu l'uzenyashi-a? Chifuta pẹ chitaru anyi g'anyi l'ẹphe kwaa!”

⁶Lọtu bya alufu etezi bya eworu ụzo gụ-chia jepfushia pẹ bya asụ: ⁷“Jiko ndu mu; unu ta akabeshinu mee ẹjo-iphe ọwa-a! ⁸Unu hụma lẹ mu nweru unwumboko labọ, ẹphe l'unwoke teke akwaswee; gẹ mu chifutachiaru pẹ unu; g'unu mee pẹ iphe, du unu ree; g'unu haa unwoke-a; l'ẹphe bu ẹbyaa mu.”

⁹Ẹphe sụ iya g'ọ gbaleshikwaru pẹ l'uzo; sụ: “Ọo gube nlwamulwa abya atuharu anyi ekemu; anyi e-mekwa ngu ọphu ka nkepẹ njo.” Ẹphe nwuriberu Lọtu; bya akpitaru g'ẹphe gbajaa mgbo ono.

¹⁰Unwoke labọ ono machiepho ẹka lobata Lọtu l'ulo; bya eworu ụzo ono gụ-chia. ¹¹Ẹphe mee; ndu ono, pfuru l'onu mgbo ono tsuhaa ishi; ẹgirima mẹ ọgerenya; k'ọphu ẹphe ta ahumaeduru onu mgbo ono.

¹²Unwoke labọ ono sụ Lọtu: “?O nweru onye ọzo, i nweru l'eka-a? ?O nweru ndu i keru nwanyi; ọzo unwu ngu k'unwoke; ọzo unwanyi; ọzo-kwanu l'ọ duru ndu ọzo, bu lẹ mkpukpu-a, bu ndu gụ l'ẹphe bu? Tụkokwa pẹ dufuta l'eka-a! ¹³Noo kele anyi abyakwa emebyi ẹka-a. E chikuwaru Chipfu lẹ mkpu shii l'ejo-iphe ndu ẹka-a pawaru ẹka; o zia anyi g'anyi bya emebyishia ya.”

¹⁴Ọo ya bu; Lọtu tughbunaa bya eje epfuchaaru iya ndu ẹphe l'iya gba l'ogo, bu ndu abya alu unwada iya; sụ pẹ: “Unu medupho egwegwa futalẹ mkpukpu-a; noo lẹ Chipfu abyakwa iya emebyishi.” Ọle ndu ọgo iya riru l'ọo mgbonu bẹ ọogbaru pẹ. ¹⁵O be lẹ geregere nchi-abọhu; ojosi ono lwuharu Lọtu ulwu sụ iya: “Mee egwegwa duta nyee ngu; waa unwumboko labọ ibe ngu, bu ndu ọphu nọ l'eka-a! Ọdumeka bẹ unu alakwa l'iyi teke aa-nu mkpukpu-a chiipfu.”

16 O jeshia abyibiye; unwoke ono kp̄ta iya l'eka; bya akp̄ta nyee ya; yele unwumboko ibe iya ephenebo; kp̄fu le mkp̄kpu ono; noo kele Chipfu aphuru phe obu-imemini. 17 Epe kp̄futachae phe pho; onye lanu su phe: “Unu gbaa oso ndzu unu! Unu ta aghakwa enya l'azu; ophu unu ejekwa apfuru apfuru le nsuda! Unu gbakwaru laa l'ubvu! Odumeka be unu a-lakwa l'iyi!”

18 Lotu su phe: “Waawakwa; jikonu nnajiuphu mu phe! 19 Eshi ophu mube onye-ozu unu du unu l'obu; unu goshiwa l'unu yeru mu obu okpobe eyeye; k'ophu unu dzoru ndzu mu; ge mu te jeshinu agba ala l'ubvu! Odumeka be ejo iphe-ehuka ono a-byapfutakwa mu; mu anwuhu. 20 Unu lekpodapho! O nweru mkp̄kpu, no-a le mgboru eka-a, dua ntse k'ophu mu a-gbaru laa ya; teme o ha nwanshi. ?Unu te eledu enya le mkp̄kpu obu ta abadu ishi? Ge mu gbanuru laa eka ono; k'ophu mu a-nodu ndzu.”

21 O su iya: “O dūepho ree; mu e-kwetaepho iphe, i rworu; mu te emebyishidu mkp̄kpu k'ono, iipfu opfu iya ono. 22 Ole o bu; gbaru laa eka ono egwegwa! Noo kele o to nwezu iphe, mu e-me gbiriri jasū l'i jerwua eka ono.” Noo iphe ono meru g'o gude e kua mkp̄kpu ono Zowa.

23 Lotu gbarwushia Zowa; enyanwu nodu aawatakpoepho awata. 24 Chipfu dzee oku nshi-egbe ge mini le Sodomu yele Gomora; mbu o shi l'eka Chipfu ophu no l'imigwe. 25 O bya atuko mkp̄kpu ono; me nsuda ono l'ophu mebyishikota; bya emebyishikwapho iphe, bu ndu bukota le mkp̄kpu ono; me iphe, futaru efuta, dzu ndzu l'ali ono. 26 Nyee Lotu ghaa enya l'azu; o ghoo obvudu unu.

27 Lonmewa utsu moku ono Ebirhamu tehu; bya ejeshia l'eka o shi pfuru l'ataphu Chipfu pho. 28 O gbē l'eka ono lee enya le Sodomu yele Gomora; bya elekota enya le nsuda ono l'ophu. O buerupho iphe, o humaru bu enwuru-oku, akpu ke tututuutu g'eka oku enwu phoophoohoo.

29 Oo ya bu; le ge Chileke mebyishiru mkp̄kpu ono, no le nsuda ono be o nyataru Ebirhamu bya edufuta Lotu le mkp̄kpu, o shi buru teke o meru ge mkp̄kpu ono buru ala l'iyi.

Lotu yele unwu-ada iya

30 Lotu ye l'unwada iya nonyaa bya ahaa Zowa je eburu l'ubvu; noo kele ndzu ebu le Zowa nonyaru guahaa ya. Epe l'unwada iya ono ephenebo tugbua je eburu l'ime oga. 31 O -rwua ujiku lanu; onye k'ogerenya su onye ke nwata: “Nta-a be nna anyi kahwaru; ophu o budu l'o duru nwoke, bu l'uswe iya-a, anyi l'iya a-kwa, bu g'eemeje iya le mgboko l'ophu. 32 G'anyi chee nna anyi mee; g'anyi eje g'anyi l'iya kwaa; g'anyi shi lehu nna anyi mee g'awa anyi phodu.”

33 Lenyashi ono be epe cheru nna phe mee; onye k'ogerenya je aze epe l'iya kwaa; ophu o madu teke o byaru aze-kube iya; teme ophu o makwapho teke o gbeshiru.

³⁴O -rwua lẹ nchitabọhu iya; onye k'ogeranya sụ onye kẹ nwata: “L'enyashi ụnyaphu bẹ mu lẹ nna mu kwawaru. G'anyi chebakwaa ya mee ọzo l'enyashi-a; g'i je g'unu l'ia kwaa. Ọo ya bụ g'anyi eshi l'ẹhu nna anyi mee g'awa anyi phọdu.” ³⁵Ẹphe bya echekwaphọ nna phẹ mee ọzo l'enyashi ono. Onye kẹ nwata je; ẹphe l'ia kwa; ọphu ọ makwaphọ teke ọ byaru bya aze-kube iya; ọzoo teke ọ gbeshiru.

³⁶Tọbudu iya bụ; Lọtu yee ụnwu iya nwanyị ono ẹphenebo ime. ³⁷Onye k'ogeranya bya anwua nwoke; o woru iya gụa Mówabu. Ọ buru iya bụ nna ndu Mówabu ntanụ-a. ³⁸Onye kẹ nwata nwutakwapho nwoke; o woru iya gụa Benu-Ami; ọo ya bụ nna ndu Amonu ntanụ-a.

Ébirihamu yele Abimeleku

20 ¹Ébirihamu shi l'eka o bu tugbua shia ụzo echiegu, nọ l'ohali; bya eje eburu lẹ mgbaka Kadeshi yee Shuru; o je ebutota lẹ Gera. ²Ọ buru l'eka ono bẹ Ébirihamu nọ sụ lẹ nyee ya, bụ Sera bụ nwune iya kẹ nwanyị. Abimeleku, bụ eze ndu Gera zia; e je edutaru iya Sera.

³Obenu lẹ Chileke byapfutaru Abimeleku lẹ nrwọ l'enyashi ujiku lanụ; bya asụ iya: “Ị bukwaa maa. Ọ buru iphe, kparụ iya nụ bụ nwanyị ono, i dutaru ono. Nwanyị ọbu bukwaa nyee nemadzu.”

⁴Ọle Abimeleku bẹ ẹphe l'ia teke akwadụ. Ọo ya bụ ọ sụ: “Nnajiuphu; ?ii-mebyishikwaphọ ọha, adudu iphe, ẹphe meru? ⁵?To pfunuru mu-a lonwiya sụ l'ọo nwune iya nwanyị? Tọo nwanyị lonwiya; ?ta asunuru mu-a l'ọ kwa nwune iya kẹ nwoke? Obu gụkwaru mu iphóró l'iphe, mu meru; teme iswi dukwa mu phọ mma.”

⁶Chileke sụ iya lẹ nrwọ ono: “Ọ bụ eviya; mu makwaru-a l'imeru iya l'obu, guru iphóró. Ọ buru iphe ono, meru g'o gude ọphu mu ekwedu g'i meswee mu. Mbụ l'ọo iphe ono meru iphe, mu ekwedu g'i denyi iya ẹka. ⁷Ngwa; dulaaru nwoke ono nyee ya; kele ọ bukwaa onye mpfuchiru. Oopfuru-a nụ mube Chileke l'iswi ẹhu ngu g'i nọdu ndzụ. Teke i ti duladuru iya; makwaru lẹ gubedua; unu lẹ ndibe ngu bukwaa maa.”

⁸O -rwua l'onmewa utsu Abimeleku bya ekuko ndu-ozu iya g'ẹphe ha; bya akokotaru phẹ iphemiphe, nwuru nụ. Ẹphe nūmae ya phọ; ndzụ rwu-ta phẹ. ⁹Abimeleku kua Ébirihamu; ọ bya; ọ sụ iya: “?Bụ gunu bẹ i meru anyi egube-a? ?Bụ awe bẹ mu mesweru ngu meru g'o gude i mee g'a taa mu uta, ha egube-a; mbụ mbedua mu lẹ ndu nọ l'alị-eze mu? I mekwaru mu iphe, i tigi kabedu mee mu!” ¹⁰Abimeleku bya ajia Ébirihamu sụ: “?Bụ gunu kpakporu iphe, i meru iphe ono?”

¹¹Ébirihamu sụ: “Mu riru l'eshinu o to nwedu ndu atsụ Chileke ebvu, bu l'eka-a bẹ ẹphe e-gbu mu l'opfu ẹhu nyee mu. ¹²Ọzo bukponu lẹ-a; l'ọ kwa nwune mu gedegede; kele ọ bukwaa-a nna mu nwuru iya; ọle mu l'ia te shikwanu lẹ ne lanu; ọle mu alukwanu iya alulu. ¹³Chileke mee pho gẹ mu shi l'okpoku nna mu bya awata aghaphe aghaphe-a; mu sụ nyee mu

ono: 'Waa g'ii-gude goshi l'i yeru mu obu baa: Iphe, bukpoọ ẹkameka anyi jeru; sijekwa ẹ mu bu nwune ngu.' ”

¹⁴Abimeleku bya achita aturu; rwuta eswi; chita ohu; unwoke me unwanyi; tuko chiru nu Ebirhamu; bya edulatakwaru iya pho Sera, bu nyee ya. ¹⁵O bya asukwa iya pho: “Wakwa ali mu baa; je eburu l'eka du ngu ree.”

¹⁶Sera be o suru: “Mu nukwaru nwune ngu ekpa mkpola-ochaa iri; noo iphe, mu gude mezia emeswe, e mesweru ngu l'ataphu ndu unu l'ephe swi. Iswi dukotakpo ngu mma.”

¹⁷Ebirhamu pfuru nu Chileke; Chileke bya emee Abimeleku; me unyomu iya; me unwumboko ndu ophu bu ohu iya g'ephe nwushiaha unwu ozobaa; ¹⁸kele Chipfu shi mechia unwanyi ibe Abimeleku ekpa-nwa; o buru l'iswi ehunye Ebirhamu, bu Sera.

Anwunwu Ayizaku

21 ¹Chipfu bya emeeru Sera eze-iphe-oma, bu g'o pfuru. Mbụ l'o meru Sera iphe, o kweru iya ukwe iya. ²Sera tsuta ime bya anwuru Ebirhamu nwa nwoke ẹ nka. O buerupho teke Chileke kweru iya ukwe iya gedegede be a nwuru iya. ³Ebirhamu woru nwa nwoke ono, Sera nwutaru iya ono gu Ayizaku. ⁴Nwa iya ono, bu Ayizaku nepho ujiku esato; Ebirhamu woru ubvu bua ya, bu iya bu ge Chileke suru g'o meje iya. ⁵Ebirhamu bu iphe, o noru bu ukporo apha ise teke a nwuru iya Ayizaku.

⁶Sera su: “Chileke meakwaru ge mu chia ochi; teme iphe, bukpoọ onye numaru iya nu be mu l'iya a-tuko chia ochi.” ⁷O bya asufukwapho: “?Bu onye gege asu Ebirhamu ẹ mu e-mecha chee nwa era? Ole mu mechale-ru-a nwutaru iya nwa nwoke ẹ g'o kahwaru akahu-a.”

Aachifu Hega yele Ishimelu

⁸Nwata ono bya evuta; a mifu iya onu l'era. O buru mboku ono, a mifuru iya onu l'era ono be Ebirhamu shiru nri, ha shii. ⁹Sera huma ẹ nwa nwoke, Hega, bu nwanyi l'iputu nwuru Ebirhamu be epfuru iya nu. ¹⁰O su Ebirhamu: “Jekwa achifu nwanyi-a, bu ohu-a yele nwa iya; noo kele nwa nwanyi ono, bu ohu ono; yele nwa mu, bu Ayizaku ta agbakwaru mgbal'eku ngu.”

¹¹Iphe ono buru aphu tsoru Ebirhamu; kele o bu opfu ehunwa iya be eepfu. ¹²Obenu ẹ Chileke suru iya: “Ge ke nwata-okoro ono ye l'ohu ngu nwanyi ono ta abushiru aphu tsoru ngu. Jekwa emee iphe, Sera pfuru ngu; noo kele oo Ayizaku be awa ngu e-shi l'eka jaa. ¹³Mu e-mekwapho nwatibe ohu ngu ono g'o buru oha eka iya; eshinu o bu iphe, shi ngu l'ehu.”

¹⁴O -rwua lonmewa utsu nchita-abohu iya; Ebirhamu bya ewota nri; bya ekuru mini ye l'akpo, eeyeje mini woru nu Hega. O woru iya tukobe

iya l'ukuvu bya achifu iya; ephe le nwata-okoro ono. Ephe tugbua je etso-ru echiegu Biye-Sheba ghapheaha.

¹⁵Mini, no l'eda-akpo ono -bvupho; o woru nwata ono nyebe le mkpula irwu lanu l'eka ono. ¹⁶O tugbua je anodu iche le mgboru eka ono; l'eka bu; a -gbaa apfu l'oojerwua ya. Noo kele o riru su le ya taa nodudu ele nwata ono enya g'o nwuhu. O nodu le mgboru eka ono bya awata ara ekwa.

¹⁷Chileke numa olu nwata ono l'eka ora ekwa. Ojosi Chileke shi l'imigwe kua Hega; bya asu iya: “?Bu gunu Hega? Ge ndzu ba agushi ngu; noo le Chileke numaru olu nwata ono le g'o ze l'eka ono ara ekwa. ¹⁸Gbeshi kulia nwata ono ekuli; gudeshia ya eka; kele mu e-me iya g'o buru oha, paru eka.”

¹⁹Chileke bya emee; enya sahu iya; o huma welu, mini du. O bya eje eworu mini kujia l'eda-akpo ono; bya echebe nwata ono.

²⁰Chileke no-kube nwata ono le goovukpopho. O buru l'echiegu; jasu o buru o-gba-apfu. ²¹O buru g'o bu l'echiegu Paranu be ne iya jeru aluta-ru iya nwanyi l'ali Ijiputu.

Ébirihamu waa Abimeleku agba ndzu

²²Le teke ono be Abimeleku; waa Fayikolu, bu onye-ishi ndu ojogu iya suru Ébirihamu: “Chileke no-kubekwa ngu l'iphemiphe, iime. ²³Rinaaru mu nte l'atatiphu Chileke l'eka-a li ti byadu agbaru mu eregede; ophu jigbaduru iya unwegirima ibe mu; ozo oshilokpa mu. O buchia gi goshi li yeru mu obu; bya eye mkpukpu-a obu; mbu mkpukpu-a, i lwaru alwalwa-a; egube ono, mu goshiru le mu yeru ngu ono.”

²⁴Ébirihamu su: “Mu e-ri-a nte obu.”

²⁵Ébirihamu bya epfuaru Abimeleku ke welu mini, ndu-ozu Abimeleku nataru iya. ²⁶Abimeleku su: “Mu ta amakwa onye meru iya nu; ophu i tiki pfusweru mu iya; mu teke anuma-swekwaa ya abudu ntanu-a.”

²⁷Ébirihamu bya achita aturu; rwuta eswi bya achie Abimeleku; ephe-nebo bya eworu ndzu gbaa. ²⁸Ébirihamu bya ahota ada-aturu esaa l'igwe aturu iya dobe iche. ²⁹Abimeleku su Ébirihamu: “?Bu gunu meru g'o gude i hota ada-aturu esaa ono dobe iche?”

³⁰O su: “Ngge ada-aturu esaa-a, shi l'eka mu-a g'o buru iphe, agba ekebe l'oo mu turu welu-a.”

³¹E woru eka ono gube Biye-Sheba; kele eka ono be umadzu labo ono riru nte.

³²Ephe gbachaepho ndzu ono le Biye-Sheba; Abimeleku; waa Fayikolu, bu onye-ishi ndu ojogu iya laphushia azu l'ali ndu Filisitayinu. ³³Ébirihamu bya eworu oshi tamarisuku dzaa le Biye-Sheba; bya anodu l'eka ono kpo-ku Chiojejeje, bu Chipfu. ³⁴Ébirihamu bukporu l'ali ndu Filisitayinu noo odu.

Chileke ahù Ébirihamu ama

22 ¹E mechaa Chileke bya ahù Ébirihamu ama. O kua ya sù: “Ébirihamu!”

Ò za iya ɛnu.

²Chileke sù: “Duta nwa ngu; mbù mkpakò nwa ngu, bù Áyizaku, bù onye i yeru obu gude je l'alì Moriya. Gude iya gwee ngweja-akpo-òku l'ú-bvù lanù, mu e-goshi ngu.”

³Ònmewa ɔtsu nchita-abòhu iya Ébirihamu gbèshi bya edozichaa nkapfù-ìgara iya ree. O duta ndu-ozì iya ùmadzu labò; waa nwa iya, bù Áyizaku. Ò wataɛpho nkù, sùru iya egude gwee ngweja-akpo-òku ono vuru tughua; ò buru phè eje ɛka ono, Chileke pfuru iya opfu iya ono. ⁴O -rwua mbòku, kwe phè ɛto; Ébirihamu jenyaa bya apalia ɛnya hùma ɛka ono ɔzenya. ⁵Ò sù ndu-ozì iya ono: “Unu òdukwa l'ɛka-a; unu lè nkapfù-ìgara ono; gè mu lè nwa mu jeribèbaaru ɛka phò je abaarù Chipfu ɛja lwaphuta azù byafuta unu.”

⁶Ébirihamu bya apata nkù, ee-gude gwee ngweja-akpo-òku ono woru boo nwa iya, bù Áyizaku; yèbedua gude òku; yele mma. Èphenebo swìru tughua. ⁷Èphe jenyaa; Áyizaku sù nna iya, bù Ébirihamu: “Nnana!”

Ébirihamu sù: “Owee nwa mu!”

Áyizaku sù: “Nkù yè ɔku dùwaa; obenu ?dènuhununu atùru, ee-gude gwee ngweja-akpo-òku ono?”

⁸Ébirihamu sù iya: “Nwa mu; Chileke a-nù-a atùru, ee-gude gwee ngweja-akpo-òku ono.” Èphenebo kwasèru; ò buru phè atughbu.

⁹Èphe rwuèpho ɛka ono, Chileke pfuru iya opfu iya ono; Ébirihamu kpua òru-ngweja l'ɛka ono; bya eworu nkù doo ya. Ò bya ekee nwa iya, bù Áyizaku ɛgbu bya eworu iya tù-kobe l'eli nkù ono. ¹⁰Ò machia ɛka bya ewota mma g'ò gude gbua nwa iya ono, bù Áyizaku. ¹¹Ojosi Chipfu gbè l'imigwe kua ya oku sù: “Ébirihamu! Ébirihamu!”

Ò za iya ɛnu.

¹²Ò sù: “Te ebyikwa nwata ono ɛka! Ta adùkwa iphe, ii-me iya. Nta-a bè mu maru l'ìitsu Chileke ebvu; noo kèlè i ti sephuduru nwa ngu azù; mbù nwa ngu lanù kpoloko.”

¹³Ébirihamu bya apalia ɛnya; bya ahùma ebili, mpu iya kwagaru l'iphe. O je akpùta ebili ono gbua gude gwee ngweja-akpo-òku ono; parù nwa iya ono haa. ¹⁴Oo ya bù; Ébirihamu woru ɛka ono gùbe: “Chipfu, bù Òkwoolemka.” Gbiriri byasù mè ntau-a bè aasuje: “Leli úbvù Chipfu bè aa-kwò ngu lè mkpa.”

¹⁵Ojosi Chipfu bya eshi l'imigwe kua Ébirihamu k'ugbo ɛbo bya asù iya: ¹⁶“Mu gudeakwa onwomu ria nte. Eshi ophu i meru iphe-a; mbù eshi ophu i ti sephuduru nwa ngu azù; mbù nwa ngu lanù kpoloko; ¹⁷bè mu kebefùtaje ngu l'òma; bya emee g'awa ngu dù igwerigwe gè kpkopode, dù

l'akpaminigwe; waa g'eja, dū l'aguga-ɛnyimu. Oshilokpa ngu bē l'a-nata mkpukpu ndu ohogu phe; ¹⁸tēme o buri eri ngu bē ee-shi kebe ohamoha, nokota lē mgboko-a l'oma; noo kele i ngaberu mu nchi.”

¹⁹Ébirihamu bya abyapfuta ndu-ozī iya; ephe tuko lashia azu lē Biye-Sheba. Ébirihamu buwaruro lē Biye-Sheba.

Unwu Nahọ

²⁰E mecha; a bya epfuaru Ébirihamu sū iya: “Milika nwushikwaru nwune ngu, bū Nahọ unwegirima unwoke. ²¹Oo Uzu, bū okpara; Buzu buri nwune iya nwoke; waa Kemelu. Kemelu ono mecha buri nna Aramu. ²²A nwua Kesedu tsoke Kemelu; waa Hazo; waa Piludashu; waa Jidulafu; waa Betuwelu.” ²³Betuwelu ono mecha bya aburu nna Ribeka. O buri unwegirima esato ono bē Milika nwushiru nwune Ébirihamu, bū Nahọ. ²⁴Onye ophu o too ludu okpobe alulu, epha iya bū Ruma bē nwutakwaru iya pho unwegirima. Epha phe bū Teba; waa Gahamu; waa Tahashu; waa Maka.

Anwuhu Sera

23 ¹Sera noru ukporo apha ishii l'apha esaa. ²O nwuhu lē Kiriya-tu-Araba, bū iya bū Hiburunu, nọ l'alī Kėnanu. Ébirihamu kwaa Sera; raa ekwa iya.

³Ébirihamu bya agbeshi l'aguga nyee ya ono, nwuhuru nū ono; bya ejepfu ndu Hetu; je asu phe: ⁴“Mu bukwa nlwamulwa; mbu onye shi ohozo lwapfuta unu. Jiko unu renaa mu alī; ge mu lia odzu nyee mu-a.”

⁵Ndu Hetu sū Ébirihamu: ⁶“Nnajiuphu; anyi suru-a: i bukwa onyibe, paru eka lechilabo anyi. Hatakpoepho ilu ndu anyi ophu kachaa ngu ree je elia nyee ngu. O to nweudu onye ndu anyi, a-jika sū g'i ti lishi iya l'ilu nkiya.”

⁷Ébirihamu bya agbalihu bya ephozeru ndu alī ono, bū iya bū ndu Hetu. ⁸O sū phe: “O -buru l'o dū unu ge mu lia odzu nyee mu bē mu suru-a: g'unu je arwooru mu Efuronu, bū nwatibe Zoha; ⁹g'o ree mu ogba Makupela iya pho, nọ l'ishi alī iya ono. Unu sū iya g'o ree mu iya okpobe aswa iya; g'o buri eka ee-lije odzu l'ibe unu.”

¹⁰Efuronu ono, bū onye Hetu ono bē ephe lē ndu ndu phe tukokwaru-a nodukota l'eka ono lonu-abata mkpukpu ono. O raa ya arara k'ophu ndu Hetu, byakotaru eka ono numakotaru iya; sū Ébirihamu: ¹¹“Nnajiuphu; waawakwa! Mu suru-a: mu pfuru l'ataphu ndu alī mu epfu sū g'i nwokotaru alī ono l'ophu; nworu ogba, nọ iya nū. Je elia ya ro odzu nyee ngu!”

¹²Ébirihamu bya ephozetakwa ozo l'ataphu ndu alī ono; ¹³bya asu Efuronu; mbu pfua ya ndu alī ono numa-dzuru; sū iya: “Mu suru-a; o -buru l'ii-nū mu alī obu bē mu a-pfu ngu-a okpoga l'aswa alī obu. Natanu mu aswa iya; k'ophu mu e-je elia odzu nyee mu l'eka ono.”

¹⁴Ɛfuronu sù Ébirihamu: ¹⁵“Mu sùru-a nnajìuphu; alì ono sùkwaru ùnu mkpòla-òchaa. Ɔle ọ bụ; ?bù gùnu bù iphe ono bù le mgbaka mu le ngu? Je elia ya rọ odzu nyee ngu.”

¹⁶Ébirihamu kweta iphe, Ɛfuronu hùru iya; bya eworu aswa alì ono, ọ hùru l'iphu ndu Hetu ono pfula ya. Iphe, ọ pfulu iya bù ùnu mkpòla-òchaa, a tùru l'èkpa, e gude azù aswa teke ono.

¹⁷Ɔo ya bù; e woru alì Ɛfuronu, nọ le Makupela ree Ébirihamu. Maku-pela ọbu nọ-kube Mamure. E reru iya alì ọbu; yee ọgba, nọ iya nù; mecha oshi, nọ je akpaa l'oke iya. ¹⁸Iphe, bù ndu Hetu l'ophu, bù ndu doru l'ònu-abata mkpùkpù ono nọkota hùma teke e reru Ébirihamu alì ono g'ọ buri alì iya. ¹⁹E mechaa; Ébirihamu lia nyee ya, bù Sera l'ọgba ono, nọ l'alì Makupela ono; nọ-kubekwapho Mamure, bù iya bù Hẹburonu ono, nọ l'alì Kėnanu ono. ²⁰Ɔ buri iya bù le ndu Hetu woru alì ọbu; yē l'ọgba, nọ iya nù; bvuaru Ébirihamu; ọ buri alì iya bya aburu ẹka ee-lìje odzu.

Áyizaku waa Ribeka

24 ¹Ébirihamu kahùwaru buri ọgerenya shii; tẹme Chipfu kebewa iya l'oma l'uzomuzo. ²Ɔ bya ekua onye ọphu bù onye-ishi le ndu-ozì iya; mbù onye ọphu eletakọta iphemiphe, o nweru ẹnya; bya asù iya: “Dẹe mu ẹka l'ehe. ³Gude ẹpha Chipfu, bù Chileke ọphu bu l'imigwe; bya eburu l'eliphe; ria nte l'ì tì l'utaduru nwa mu Áyizaku nwanyì, shi l'ibe ndu Kėnanu, anyi l'ẹphe bu l'ẹka-a. ⁴L'ii-je l'alì mu; mbù l'ibe abubu mu gẹdegede je alutaru nwa mu, bù Áyizaku nwanyì.”

⁵Onye-ozì iya ono sù iya: “?Ɔ -bùkwanuru le nwanyì ọbu te ekwedu l'ootsoru mu alwa ẹka-e; ?mu duta nwa ngu gude lashia alì ono, i shi ono tọ?”

⁶Ébirihamu sù iya: “Be dutakwapho nwa mu laa alì ẹka ono ozo! ⁷Chipfu, bù Chileke k'imigwe, bù onye dufutaru mu l'okpoku ibe nna mu; waa l'alì, a nwuru mu anwunwu; mbù onye pfulu yeru mu nù; bya ekwee mu ukwe-iphe ribua ya l'angu sù l'awa mu be ya a-nù alì-a; Chileke ono e-zia ojozi iya g'unu l'iya swiru; k'ọphu ìi-luta nwanyì l'ẹka ono dulataru nwa mu. ⁸Ɔ -buri le nwanyì ọbu te ekwedu ngu etsoru; ẹvu ngu ogodogo. Ɔo ẹpho g'ì ti dukwaru nwa mu laa alì ẹka ono ozo!” ⁹Ɔo ya bù; onye-ozì iya ono bya eye nnajìuphu iya ẹka l'ehe; bya eria angù l'opfu ono.

¹⁰Onye-ozì iya ono bya achita anù-ije, bù ìnya-kamelu nnajìuphu iya iri gude tugba. Nnajìuphu iya ono hakwarupho nù iya iphe, dugbaa ree; o gude; ọ buri iya eje alì Mesopotémiya. O jerwua bya abahu mkpùkpù ẹka Nahọ bu. ¹¹O mee g'ìnya-kamelu ono g'ẹphe ha gbushichaa ikpere le mgboru welu, nọ l'azù mkpùkpù ono k'ọphu ọ-nyizeta. Teke ono bũwaa ụzenyashi; bya aburu teke unwanyi awufuje le mkpùkpù je eseta mini.

¹²Tọbudu iya bù; onye-ozì Ébirihamu ono pfulu nù Chileke sù: “Ji-ko Chipfu, bù Chileke ke nnajìuphu mu, bù Ébirihamu. Mena g'ije

mu ntanụ-a nweru ishi! Goshinu l'i yeru nnajiuphu mu, bu Ébirihamu obu! ¹³Mbụ-a; ọ kwa welu be mu no-kube-a; teme unwumboko shi le mkpukpu-a wufuta abya eseta mini. ¹⁴Menaa g'ọ buru; teke o nweru unwumboko ono onye ophu mu suru: 'Jiko phozetanu ite ngu ge mu nguta mini'; o -kweta chebe mu iya; bya asu le ya e-jekwa echebefua inya-kamelu mu; g'onye ono bukwaru onye i hotaru onye-ozu ngu, bu Áyizaku. Noo iphe, le-me ge mu maru l'i yeru nnajiuphu mu, bu Ébirihamu obu."

¹⁵Ọ nodu epfukwadu anu Chileke ono; Ribeka nodu abyawaa ye l'ite, ọ nmako l'ukuvu. Ọ buru nwatibe Bituwelu. Bituwelu bukwanuru nwatibe Milika, bu nyee Nahọ. Nahọ ono bukwanuru nwune Ébirihamu. ¹⁶Nwamgboko ono nodu ama ntumatu; teme o dobe onwiya oru; kele o to nwedu nwoke, yee ya kwajewaru. Ọ bya eje le welu ono je esejia ite iya mini nmakoru lufuta.

¹⁷Onye-ozu ono bya emee egwegwa bya agbapfu iya su iya: "Jiko chebe-nu mu mini l'ite ngu ono nwanshi ge mu ngua."

¹⁸Ọ su: "Ngwaro nnajiuphu mu!" Ọ bya ezia ite ono egwegwa bya apata iya l'eka gude chebe iya mini ono.

¹⁹Ọ chebechaa ya mini obu ọ su: "Mu e-setafukwaru inya-kamelu ngu g'ephe ngua jasụ ephe angu-dzuru iya." ²⁰Ọ mee egwegwa bya awufu mini l'ite iya ono woru ye l'iphe, eeyejeru anu mini; bya agbaphu azu le welu je esetaba mini ozo. Ọ see ya pho gbiriri jasụ ọ su-dzuru inya-kamelu ono angungu. ²¹Ophu onye-ozu ono epfukpodaru me akpuru opfu lanu. Ọ nodu egekpoe ya pho g'ọ maru ?Chipfu kabewaa ije iya; o nweru ishi to?

²²Inya-kamelu ono ngughechaepho mini obu; nwoke ono bya achifuta eregede-imi, e gude mkpirikpu mkpola-ododo mee; waa mgbaleka labo, e gude mkpola-ododo, erwa iya du shekelu iri mee woru chie ya. ²³Ọ jia nwamgboko ono su iya: "?! bu nwatibe onye? Jiko mu suru-a: ?o nweru eka anyi a-ze l'ibe nna ngu g'anyi je akwaa lenyashi-a?"

²⁴Ọ su iya: "Mu bukwa nwatibe Bituwelu; nwa, Milika yeru Nahọ." ²⁵Ọ bya epfufua ya su: "Anyi nweru eswa oyii; yele k'okponku shii; waa ulo, ji-kwa lenyashi-a."

²⁶Nwoke ono bya ephureta bya abaarụ Chipfu eja su: ²⁷"G'ajaja buru ke Chipfu, bu Chileke ke nnajiuphu mu, bu Ébirihamu. Mbụ Chipfu ahaduru Ébirihamu; o yee ya pho obu g'o yeru iya ya; bya apfushikwapho ike l'iphe, oomeru iya. A bya le mbedua be Chipfu duwaru ije durwuta ibe abubu nnajiuphu mu phe."

²⁸Nwamgboko ono bya agbaru laa unuphu je atuko iphemiphe ono kotaru ndu bu l'ulo ne iya. ²⁹Ribeka nweru nwune nwoke, aza Lebanu. Lebanu gbagbua jeshia nwoke obu ndzuta le welu l'eka ono; ³⁰kele o humaru eregede-imi pho; waa mgbaleka, nwune iya nwanji gba l'eka; bya

anumakwapho iphe ono, Ribeka pfuru sù l'òo iphe, nwoke ono pfuru iya ono. O tũgbua jefpushia nwoke obu; o jeshia o pfũwaru pfũ-kube ìnya-kamèlu iya lẹ mgboru wèlu ono. ³¹Tòbudu iya bũ; Lebanũ sù iya: “Bata abata-o! Gũbe onye Chipfu gòru ònu-òma nũ! ?Ò nwũru ìnwu-agma bẹ ì jeru apfũru l'ẹka ono? Mu doziakwaru ngu ụlo; bya edoziwaa ẹka ìnya-kamèlu ngu a-dòru.”

³²Òo ya bũ; nwoke ono bahũ l'ùlo ono. Lebanũ bya atòshia ìnya-kamèlu iya iphe, o shi vuru. O bya achìtaru ìnya-kamèlu ono g'ẹphe ha ẹswa oyii; waa k'òkponku; bya apataru yẹbedua yẹe unwoke, ẹphe l'iya swi mini g'ẹphe kwoo òkpa. ³³A bya akwata nri doberu iya l'atatiphu. O sù lẹ ya te erikwa nri jasù teke ya pfuadaru iphe, ya byaru.

Lebanũ sù iya: “Ngwanũ; pfunaa ya!”

³⁴Òo ya bũ; o sù: “Mu bũkwa onye-ozì Èbirìhamu. ³⁵Chipfu mewaru nnajìuphu mu iphe-òma, parũ ẹka. O bũwaru onye nweru iphe ntũmatu. O nũru iya atũru; waa eswi; waa mkpòla-òchaa; yẹle mkpòla-ododo; waa ohu, dũ igwerigwe; unwoke mẹ unwanyi; waa ìnya-kamèlu; waa nkapfũ-igara. ³⁶Nyee nnajìuphu mu, bũ Sera nwũtaru iya nwa lẹ nka. Èbirìhamu wowaru iphemiphe, o nweru nũkota nwata obu. ³⁷Nnajìuphu mu ono mee; mu riaru iya nte kweta lẹ mu ta alũtaduru nwa iya ono nwanyì, shi l'alì ono, o bu ono, bũ iya bũ alì Kènanu.

³⁸“Lẹ mu e-je l'ẹnya unuphu ibe nnajìuphu mu ono; mbũ l'òkpa-ipfu iya gẹdegede; je alũtaru nwa iya ono nwanyì.

³⁹“Mu jĩa nnajìuphu mu ono sù iya: ‘?Ò -bũkwanuru lẹ nwanyì obu te ekwedu l'ootsoru mu alwa ẹka ono-e?’

⁴⁰“O sù lẹ Chipfu ono, bũ onye ono, yẹ l'iya l'anò ono bẹ e-duru-a ojozi iya ye gẹ mu l'iya swi; k'òphu oo-me g'ije mu nweru ishi. Oo ya bũ; k'òphu mu a-lũta nwanyì, shi l'òkpa-ipfu phe; waa l'ẹnya unuphu phe gẹdegede dulataru nwa iya nwoke. ⁴¹Lẹ mu -jekpòwaa l'òkpa-ipfu phe; o bũru l'ẹphe jìkaru bẹ ẹnwa iya te egudehèdu mu; l'òoburu ẹvu mu ogodogo.

⁴²“O bũru iya bũ; mu byarwuta lẹ wèlu-a ntanũ-a; mu sù: ‘Jiko gũbe Chipfu, bũ Chileke kẹ nnajìuphu mu, bũ Èbirìhamu; o -bũru l'ò dũ ngu ree; jiko menaa g'ije-a, mu byaru-a nweru ishi. ⁴³Nta-a bẹ mu pfũru lẹ mgboru wèlu-a; o -bũru l'ò nweru nwamgbòko, byaru eseta mini; mu sù iya: ‘Jiko gẹ mu ngũtanu nwa mini, ha nwanshii l'ite ngu ono!’ ⁴⁴O -bũru l'ò kwetarũ chebe mu iya; bya asũ lẹ ya e-jekwa echebefua ìnya-kamèlu mu; g'onye ono bũkwaru onye gũbe Chipfu hòtaru nwatibe nnajìuphu mu.’

⁴⁵“Mu nõdu epfukwadu anũ Chileke ono l'ime obu; Ribeka nõdu abya-waa yẹ l'ite, o nmako l'ukuvu. O bya eje lẹ wèlu ono je eseta mini. Mu sù iya: ‘Jiko chebenu mu mini!’

⁴⁶“O mee ẹgwegwa pazeta ite ono, o pa l'ukuvu ono; bya asũ mu: ‘Nggẹ; ngua; gẹ mu je esetafũaru ìnya-kamèlu ngu g'ẹphe ngua.’

47“Mu jia ya su iya: ‘?I bu nwatibe onye?’

“O su le ya bu nwatibe Betuwelu, bu iya bu nwatibe Nahọ; onye ophu Milika nwutaru iya.

“Mu bya eworu eregedede-imi ye iya l'imi; bya agbabe iya echi-eka. 48 Mu bya ephureta bya abaarų Chipfu eja; bya ajaa Chipfu, bu Chileke ke nnajiuphu mu, bu Ebirihamu ajaja; mbu Chipfu, onye duru mu; mu shia okpobe uto byarwuta eka mu humaru nwamgboko, bu nwanwa nwune nnajiuphu mu, mu a-luta dularu nwatibe nnajiuphu mu. 49 O -buru l'unu e-goshi l'unu yeru nnajiuphu mu obu; lo gbaru g'o gude ire unu eka; unu pfunaa ya ge mu numa. Teke o dudu; unu pfukwapho; ge mu maru ophu mu e-shi eshishi.”

50 Lebanu yee Betuwelu yeru iya onu su: “O kwa Chipfu du ngu bya; ophu anyi enwekwa onu opfu k'asu l'owa-a meru; ophu owa-a emeduru. 51 Wakwa Ribeka baa; duta iya gude laa g'o je aluru nwatibe nnajiuphu ngu; eshinu o bu ge Chipfu suru l'oo-du bu ono.”

52 Onye-ozu Ebirihamu numapho onu, ephe yeru; o phozetaru Chipfu. 53 O bya egwefuta ngwa, e gude mkpola-ododo; yee mkpola-ochaa mee bya achie Ribeka; bya achiekwaa ya pho ekwa. O nukwapho nwune iya; ephe le ne iya iphe, vu oke aswa. 54 Ephe le ndu ephe l'iya swi gbete teke ono bya atuko ria nri; bya angwa iphe, angungu; bya akwaa eka ono lenyashi ono.

Ephe tehuapho le nchita-abo hu iya onye-ozu ono su: “Unu dukwa mu ge mu lashia lapfushia nnajiuphu mu.”

55 Nwune nwamgboko ono; yele nene iya su: “Kabenu haa g'anyi le nwada anyi obu nofua nwujiku iri; teme unu alashiwaro.”

56 O sukwanu phe: “?Unu esedekwadu mu ke gunu; leka Chipfu gbete me-waa ije mu; o nweru ishi? Unu hanaa ge mu lashia lapfu nnajiuphu mu!”

57 Ephe su gephe kua nwamgboko ono jia ya g'o yee onu. 58 Ephe kua Ribeka bya ajia ya su: “?Ii-tsoru nwoke-a?”

O su ee; le ya e-tsoru iya-a.

59 Oo ya bu; ephe duru nwune phe nwanyi, bu Ribeka nu iya; ephe le nwanyi, eleta iya enya. Onye-ozu Ebirihamu ono; yele ndu ephe l'iya swi duta iya; ephe lashia. 60 Ephe bya ala; ndu nwe Ribeka goru onu-oma nu iya; su iya:

“Nwune anyi nwanyi;

jaa ajaja ka l'otu!

Mbu g'awa ngu buru

aguta aguta!

G'awa ngu natajekwa

oguzo ndu ohogu phe!”

61 Oo ya bu; Ribeka yele ndu-ozu iya kwakobe bya enyita inya-kamelu phe tsoru onye-ozu Ebirihamu ono; o duru phe; o buru iya alala.

⁶²Teke ono be Áyizaku shiwaale Qgba Q-dzu-ndzu-ele-mu-nya abya; kele eka o bu ebubu bu l'echiegu ndohali. ⁶³O -rwua uzenyashi ujiku lanu o tsoru oma egu aghaphe. O jeshia ele nya bya ahuma inya-kamelu, awu abya nu. ⁶⁴Ribeka bya apalikwapho nya huma Áyizaku; bya eshi l'eli inya-kamelu iya pfu-zeta. ⁶⁵O jia onye-ozu ono su iya: “?Nwoke ono, shi le mgbegu eje abya nu ono bu onye?”

Onye-ozu ono su iya: “O kwa nnajiuphu mu be o bu.” O chita ekwa-ishi iya gude kpuchia onwiya.

⁶⁶Onye-ozu ono bya akotaru Áyizaku ge ya gude mee ya. ⁶⁷Áyizaku bya eduta iya duba l'ulo-ekwa ne iya, bu Sera. O buru iya bu l'e kewaru iya Ribeka; o luru. O yee ya obu shii. O buru iya bu l'obu abyahukwa bya ejizeta Áyizaku le ke ne iya, nwuhuru nu-a.

Anwuhu Ébirihamu

25 ¹Ébirihamu bya aluta nwanji ozo, epha iya bu Ketura. ²O nwutaru iya Zimuranu; waa Jiokushanu; waa Midanu; waa Midiyanu; waa Ishibaku; waa Shuwa. ³Jiokushanu bu nna Sheba; waa Dedanu. Ndu bu oshilokpa Dedanu bu ndu Ashuru; waa ndu Letushi; waa ndu Leyumu. ⁴Unwu Midiyanu bu Ifa; waa Ife; waa Inoku; waa Abida; waa Eludaa. G'ephe hakota tukoru buru unwu Ketura.

⁵Ébirihamu hakotaru Áyizaku iphemiphe, o nweru. ⁶Ole g'o nokwadu ndzu be o hataru iphe hee unwu, epe nwutaru iya; mbu unwanji, ndu ophu abu-zidu unyomu iya; bya edufu phe; epe lasha uzo ali enyanwu-awawa; k'ophu yee Áyizaku te ebuduru l'eka lanu.

⁷Iphe, Ébirihamu kpakotaru no bu ukporo apha esato l'apha iri l'ise. ⁸Ébirihamu tua unme ikpazu iya bya anwuhu le g'o kahuchawaru libaliba; k'ophu o bukpo nwoke ogerenya, apha, o noru ndzu jiru epho; teme o lapfushia ndiche phe. ⁹Unwu iya; mbu Áyizaku yee Ishimelu lia ya l'ogba Makupela, no l'ali Efuronu, bu nwatibe Zoha, onye Hetu. Ogba ono no-kube Mamure. ¹⁰Ali ono bu ali, Ébirihamu zuru ndu Hetu; o buru eka ono be e liru Ébirihamu; lia nyee ya, bu Sera. ¹¹Ébirihamu nwuhuchaephe Chileke bya ekebekpo Áyizaku l'oma eka o bukube welu Q-dzu-ndzu-ele-mu-nya.

Unwu Ishimelu

¹²Waa oshilokpa Ishimelu nwa Ébirihamu; onye nwanji, shi Ijiputu, bu ohu Sera, epha iya bu Hega nwutaru Ébirihamu baa:

¹³Qwaa bu unwu Ishimelu le g'e deru epha phe g'a nwuru phe. Nebayotu bu okpara Ishimelu. Ndu ozo buru Keda; waa Adubelu; waa Mibusamu; ¹⁴waa Mishima; waa Duma; waa Masa; ¹⁵waa Hadadu; waa Tema; waa Jieturu; waa Nafishi; waa Kedema. ¹⁶G'ephe ha tukoru buru unwu Ishimelu; o buru phe bugbaa ndu-ishi okpa-ipfu phe ono epe n'iri

l'ebo. Teme o buru epha phe be a gubegbaaru mkpukpu le mkpukpu phe. ¹⁷Mkpako iphe, Ishimelu noru bu ukporo apha ishii l'apha iri l'esaa; bya atya unme ikpazu iya nwuhu; lapfu ndiche phe. ¹⁸Oshilokpa iya shi le Havila bua jasu Shuru, no-kube oke ali Ijiputu; me i nodu eje uzo Asiriya. Ephe l'unwunna phe g'ephe ha tuko duru l'opfu.

Jiékoju yeje Iso

¹⁹Waa oshilokpa Ayizaku, nwa Ebirihamu.

Ebirihamu bu nna Ayizaku; ²⁰Ayizaku nepho ukporo apha labo bya alua Ribeka, nwada Betuwelu, onye Aramu; aka o shi bu Padanu-Aramu; teme Ribeka ono buru nwune Lebanu, onye Aramu kwapho.

²¹A nonyaa; Ayizaku bya epfuru nu Chipfu l'iswi ehunye ya; noo kele o too tsudu ime. Chipfu numa epfupfu, o pfuru nu iya; bya emee nyee ya, bu Ribeka tsuta ime. ²²Unwegirima ono nodu akpa onwophe mkpa l'ime epho iya. A nonyaa; o su: “?Bu gunu be iphe-a l'anwuru mu egube-a?” O jeshia l'aji l'iphu Chipfu.

²³Chipfu su iya:

“O kwa mkpukpu labo no
ngu l'epho;
mbu l'oha labo e-shi ngu
l'ehu kekahaa onwophe.

Onye lanu a-ka onye ophuu ike;
teme o buru onye k'ogerenya
be a-nodu ejeru onye ke nwata ozi.”

²⁴O gbabe ya pho l'ezeda; o nwua ejima; o buchaaru nwoke. ²⁵Onye ophu vuru uzo futa du uswe-uswe; ehunye l'ophu duepho guwe-adzu. Oo ya bu; ephe woru iya gua Iso. ²⁶Anwunwu, aanwu iya; nwune iya nodu etso iya; woru iya aka l'ichirupfu okpa. Oo ya bu; ephe gua ya Jiékoju. Ayizaku nowaru ukporo apha eto teke Ribeka nwutaru iya unwegirima ono.

²⁷Unwegirima ono bya evuta. Iso buru onye maru enya nta-a; onye anoduje aghaphe l'oma egu. Jiékoju bukwanuru onye eme gelee; teme o nodu anoduje anoo l'unuphu. ²⁸Eshinu Ayizaku bu onye anu, shi l'egbudu atsoje ntumatu; o yee Iso obu; Ribeka yekwanaa Jiékoju obu.

²⁹O -rwua ujiku lanu; Jiékoju nodu agwo ine. Iso shi nta-a bata; mbà nodu atu iya atutu. ³⁰O su Jiékoju g'o koo ya o-cha-pfu iphe ono, o shiberu ono egwegwa; le mbà atukwa iya atutu! (Noo iphe, meru g'o gude a wata iya eku Edomu bu ono.)

³¹Jiékoju su iya: “Oo m'o buru le mu a-buru ngu ogerenya!”

³²Iso su g'o lenu le ya anwuhukwa anwuhu. ?Ya gude aburu ogerenya eme gunu?

³³Jiékoju su iya g'o riadanaru iya angu. O bya eria angu le ya hawaru ge Jiékoju buru iya ogerenya.

³⁴Jiékoṣu bya awata buredi nū iya; bya ekuta ine azamu ono, o gwōru ono nūkwa iya pho; o ria. O richaa ya bya angua iphe, aangū angungu; o buru iya atugbu.

Oo ya bu le Iso ta agubeduru aburu ogerenya iya iphe.

Áyizaku yele Abimeleku

26 ¹A nonyaa; egu bya l'ali ono; a -gufukwa ophu byajeru teke Ébirihamu no. Áyizaku lapfu Abimeleku, eze ndu Filisitayinu le Gera. ²Chipfu byapfuta Áyizaku bya asu iya: “Te ejekwa ala ali Ijiputu. Bukwaru l'ali ono, mu a-su ngu g'i buru ono! ³Butotanu l'ali-a; huma le mu a-nodu swiru ngu eswiru; teme mu ekebekwa ngu pho l'oma. Kele o o gubedua; gu l'awa ngu be mu a-nukota ali-a l'ophu. Ozo bu l'iphemiphe, mu riru Ébirihamu nte le mu e-meru iya be mu e-mekotakwa. ⁴Mu e-me awa ngu g'ephe ha l'otu ge kpokpode, no l'akpaminigwe. Mu abya anu phe ali-a l'ophu. Teme o buru oshilokpa ngu be ee-shi l'eka kebe ohamoha, nokota le mgboko l'oma. ⁵O buru iphe, kparu iya nu bu le Ébirihamu meru olu mu; mbu l'o meru opfu mu. O buru iphe, mu suru g'o mee be o meru; mbu iphe, mu toru okpa iya; bya edobekota ekemu mu.” ⁶O buru iya bu le Áyizaku eburu le Gera.

⁷Unwoke ndu eka ono bya akpaahaa ya ishi nyee ya. O su phe l'ephe l'iya bukwa nwune. Iphe, o gude pfua nno bu le ndzu agu iya asu l'oo nyee ya. O riru le ndu eka ono e-gbu iya nata iya Ribeka; kele Ribeka manukaru mma.

⁸Áyizaku buepho eka ono noo odu; Abimeleku, eze ndu Filisitayinu bya epyofu enya le windo huma Áyizaku eka yele nyee ya, bu Ribeka ebvu oke ebvu. ⁹Abimeleku bya ekua Áyizaku su iya: “?O kwa le nwanyi ono be jilu okpobe alulu? ?Bu gunu meru g'o gude i su l'o bu nwune ngu?”

Áyizaku su iya: “?Ti madu le mu ari le ndzu mu e-tuphahu l'opfu eh iya?”

¹⁰Oo ya bu; Abimeleku su iya: “?Egube iphe owa-a, i meru anyi-a bu gunu? Ome unwoke ndu anyi onye lanu jekwanuru je ejepfu nyee ngu onoya; me iishi egube ono mee g'a taa anyi uta.”

¹¹Oo ya bu; Abimeleku bya aturu ndu eka ono g'ephe ha ekemu su: “Onye choru nwoke-a; ozoo nyee ya opfu be ee-gbukwa egbugbu!”

¹²Áyizaku bya akobe iphe l'ali ono; bya akpata iphe, ha g'iphe, o koberu l'ali apha ono mgbo ukporo ise; noo kele Chipfu keberu iya l'oma. ¹³O bya enweru iphe; eku wata iya abyaru; jasu o buru obaba. ¹⁴O nweru aturu, du igwerigwe; bya enweru eswi; bya agbashia ohu dobe. A nonyaa; ndu Filisitayinu jaharu iya iji enya. ¹⁵Oo ya bu; iphe, bukpo welu iya, shiro teke nna iya, bu Ébirihamu no; bu welu, ohu nna iya phe tushiru doberu iya; ndu Filisitayinu bya atsichishichaa ya; mbu gude eja nwuchishichaa ya.

¹⁶ Ɔo ya bu; Abimeleku su Áyizaku: “Kwata lufuru anyi; noo kele i kariwaru anyi eka shii!”

¹⁷ Ɔ buru iya bu le Áyizaku akwafu je akpobe ulo-ekwa iya le nsuda Gera; je eburu l'eka ono. ¹⁸ Áyizaku bya etsoru tukwachaa welu ono, a turu teke nna iya, bu Ébirihamu no ndzu ono; mbu welu ono, ndu Filisita-yinu nwuchishiru le ge nna iya nwuhucharu ono. Ɔ bya agukwachaa ya epha ono, nna iya shi gushia ya ono.

¹⁹ Ndu ozi Áyizaku bya ebvua welu le nsuda ono; bya ebvuvu mini, doru ri-saa. ²⁰ Obenu le ndu eche iphe-edobe ndu Gera; epehe le ndu eche ke Áyizaku wataru adzo welu obu. Epehe su le mini ono bu mini epehe ndu Gera. Áyizaku woru welu ono gua Iseku; kele a sworu iya uswo. ²¹ Epehe bya atua welu ozo; ndu Gera dzopfukwaru iya pho. Áyizaku gua ono Sitina. ²² Ɔ gbeshi l'eka ono je atua welu ozo; ophu o nweedu onye dzobaru ono. Ɔ gua ya Rehobotu su: “Nta-a be Chipfu mewaru g'anyi susaa onwanyi l'ali-a; nodu iya mia amimi g'oshi-omi.”

²³ Ɔ gbé l'eka ono; o lashia Biye-Sheba. ²⁴ O -rwua l'en'yashi ono; Chipfu byapfuta iya bya asu iya: “Ɔ kwa mbedua bu Chileke ke nna ngu, bu Ébirihamu. Ge ndzu ta agushi ngu; kele mu no-kube ngu. Mu e-gude iswi ehu onye-ozu mu, bu Ébirihamu kebe ngu l'oma; mee g'awa ngu ka l'otu.”

²⁵ Áyizaku bya akpu ora-ngweja l'eka ono; bya akpo-ku epha Chipfu. O woru ulo-ekwa iya kpobe. Ndu ozi iya bya eworu welu tua.

²⁶ Ɔ buru teke ono be Abimeleku shi le Gera kpapfuta iya; epehe le Ahuzatu, onye agbaziru iya olu; waa Fayikolu, onye-ishi ndu ojogu iya. ²⁷ Áyizaku jia phe su: “?Bu gunu meru iphe, unu abya ibe mu; l'eka mu du unu ashj; unu chia mu l'ali unu-a?”

²⁸ Epehe su iya: “Anyi humaru le Chipfu no-kube ngu. Noo ya; anyi su l'o gbaru g'anyi le ngu ria nte. G'anyi le ngu gbaa ndzu; ²⁹ g'o to du iphe, ii-me anyibe ndu Gera; egube ono, adudu iphe, anyi meru ngu ono; o chia l'anyi meru ngu odoo; bya edufu ngu; i lashia le nchi-odoo. Ɔ buru iya bu le Chipfu abya nta-a bya ekebe ngu l'oma.”

³⁰ Áyizaku bya eshiaru phe nri, ha shii; epehe bya eria bya angua iphe, aangu angungu. ³¹ O -rwua le nchita-abohu iya lonmewa utsu; unwoke ono bya eworu nte ria. Áyizaku dufu phe; epehe tugbua; o buru phe alala le nchi-odoo.

³² Ɔ buru mboku ono be ndu-ozu Áyizaku byaru bya epfuaru iya ke welu pho, epehe turu pho su iya l'ephe humakwaru mini. ³³ Ɔ gua ya Sheba. Epha mkpukpu ono buru Biye-Sheba byasu ntanu-a.

³⁴ Iso noepho ukporo apha labo; o je alua Jiuditu, nwada Beri, onye Hetu; bya alukwapho Basumatu, nwada Elonu, onye Hetu kwapho. ³⁵ Epehe buru aphu tsoru Áyizaku yele Ribeka.

Jiekpu anata onu-oma l'eka Áyizaku

27 ¹ Áyizaku buerupho ogerenya; k'ophu ophuwa ragaraga; o kua Iso, bu okpara iya su iya: “Nwa mu!”

Ọ za iya ẹnu.

²Ọ sù iya: “Nta-a bẹ mu buakwaa nwoke ọgerenya; ọphu mu amakwa mbọku, mu a-nwùhu. ³Ngwa; wota iphe, iigudeje achi nta-a; mbù ẹda-apfù waa apfù ngu; gude je l'ẹgbudu je egbuaru mu anù! ⁴Lìibya egude iya shiaru mu nri, atso uto, bù ọphu aduje mu ree; pataru mu; gẹ mu ria gọru ọnu-oma nù ngu; tẹmanu mu anwùhu!”

⁵Ribeka ngabekpoepho nchi gẹ Áyizaku epfu eyeru nwa iya, bù Iso. Iso tugbuepho jeshia l'ẹgbudu gẹ ya gbua anù palata; ⁶Ribeka sù nwa iya, bù Jiékọpu: “Mu sùru-a; mu nùmakwaru teke nna ngu shi epfu eyeru nwune ngu, bù Iso ⁷sù iya g'o je egbu a nù-ẹgbudu gude shiaru iya nri, atso uto gẹ ya ria; k'ọphu ya a-nọdu l'atatiphu Chipfu gọru ọnu-oma nù iya; tẹme ya anwùhu. ⁸Nta-a bù lẹ-a; nwa mu; ngabekpoepho nchi ree; mee iphe, mu a-sù g'i mee! ⁹Ngwa; je l'ẹka aturu yẹ l'eghu dọru; je ahoṭa ada egbu labọ, dù ree; gẹ mu gude shiaru nna ngu nri, atso uto. Mu e-shiẹ ya phọ g'oo-dù iya ree. ¹⁰Lìikwata iya je anù nna ngu g'o ria; k'ọphu ọo-gọru ngu ọnu-oma iya; tẹmanu l'ọonwuhu.”

¹¹Jiékọpu sù Ribeka, bù ne iya: “Obenu lẹ nwune mu, bù Iso gbaru éjí; mbẹdua buri onye ẹhu akwo akwo. ¹²Ọ bukwanuru lẹ nna mu rwaru mu ẹka-e? L'ohuma l'oo ẹregede bẹ mu agbaru iya; looworu ọnu tẹa mu; mẹ ọ lashi ọphu ọo-gọru ọnu-oma nù mu.”

¹³Ne iya sù iya: “Nwa mu; gẹ mu vutarọ ọnu ono m'ọ tẹa ngu iya! Ọo epho g'i mee iphe, mu sùru g'i mee-a; tugbua je akputaru mu iya!”

¹⁴Ọo ya bù; ọ tugbua je akputaru ne iya egbu ọbu. Ne iya bya egude iya shia nri, atso uto; shiẹ ya phọ g'ooduje nna Jiékọpu ono ree. ¹⁵Ribeka bya ewota uwe Iso, bù nwune Jiékọpu k'ọgerenya; mbù uwe iya ọphu kakaṭa ama mma l'uwe, Iso koberu l'ulo iya; bya eworu yee nwa iya ke nwata, bù Jiékọpu. ¹⁶Ọ bya eworu akpo egbu phua ya l'ẹka; bya aphua ya ya l'olu, bù ẹka akwo iya akwo. ¹⁷Ọ bya eworu nri ono, atso uto ono pẹ Jiékọpu; bya apee ya buredi, o gheru ye iya.

¹⁸Jiékọpu bya aparu iya jepfu nna iya bya asù iya: “Nnana!”

Ọ za iya: “Owee nwa mu! ?I bù onye?”

¹⁹Jiékọpu sù nna iya: “Ọ kwa mbẹdua, bù Iso; bya aburu okpara ngu. Mu meakwaru g'i ziru mu. Gbeshikwa nọdu anọo taa anù ọbu, mu gburu ọbu; g'iigoru ọnu-oma nù mu.”

²⁰Áyizaku bya aji ya sù: “?Denu g'i shiru gbukebewa iya egwegwa egube ono nwa mu?”

Jiékọpu sù iya: “Ọo Chipfu, bù Chileke ngu meru mu; o nweru ishi.”

²¹Áyizaku sù Jiékọpu: “Kpìritaekwaru gẹ mu rwaa ngu ẹka; gẹ mu ma-ru ?i bù-a nwa mu Iso toọ ti bọdu iya?”

²²Jiékọpu bya ejekube nna iya, bù Áyizaku ntse. Ọ bya arwachaa ya ẹka bya asù: “Olu-opfu ngu bù olu Jiékọpu; obenu l'ẹka ngu bù ẹka Iso.”

²³Ọphu ọ to hùbeduru iya ama; noo kele ẹka iya dù eji eji gẹ ke nwune

iya, bu Iso. O goru onu-oma nu iya. ²⁴O jidaa ya su iya: “?I bu-a nwa mu, bu Iso to?”

O su iya: “Ee. Mu bukwa iya-a.”

²⁵Oo ya bu; o su iya: “Ngwanu nwa mu; patanuru mu anu, i gburu shia nri obu ge mu ria; k’ophu mu a-goru onu-oma nu ngu!”

Jiékopu bya apajeru iya ya; o ria; o bya apataru iya mee; o ngua. ²⁶Nna iya, bu Áyizaku su iya: “Bya eka-a nwa mu; bya etsutsua mu onu!”

²⁷Oo ya bu; o jekube iya ntse je etsutsua ya onu; Áyizaku numaepho mkpo, uwe iya eshi; o goru onu-oma nu iya su iya:

“Mkpó, nwa mu eshi
du ge mkpó egu,
Chipfu keberu l’oma.

²⁸Ge Chipfu shi l’imigwe
kwaaru ngu iji;
l’onu ngu eka mgboko
kakota ree;
l’oomee g’i nweru nri yele
mee nweru k’etsutsu iya.

²⁹G’oha, du igwerigwe
jeru ngu ozi!
Ge ndiphe phozejeru ngu!
L’ibururu onye a-buru onye-ishi
unwune ngu!
G’unwu, ne ngu nwutaru
phozejeru ngu!
Ge ndu turu ngu onu
bukwaru ndu a turu onu!
Ndu goru onu-oma nu ngu
abukwanuru ndu a goru
onu-oma nu!”

³⁰Áyizaku go-ghechaerupho Jiékopu onu-oma ono; o shiepho l’atatifpu nna iya tugbua jeriberu nwanshiji; nwune iya, bu Iso shi nta-a bata. ³¹O bya eshikwapho nri, atso utso pataru nna iya bya asu iya: “Nnana; gbeshi bya ataa anu-a, mu gburu shiaru ngu-a g’ijigoru onu-oma ngu nu mu.”

³²Nna iya, bu Áyizaku bya aja ya su: “?I bu onye?”

O su iya: “Mu bukwa nwa ngu nwoke; mbu okpara ngu, bu Iso.”

³³Áyizaku phuhu mebyikpoo ke kpaakpaakpaa bya asu: “?Buhunu onye gburu anu wotaru mu; mu righeru le mgboru g’iibya-a? Mu goka-kwaru onu-oma nu onye ono; mbu l’onye ono buakwaa onye e keberu l’oma.”

³⁴Iso numaepho opfu nna iya; o tukpoo ekwa; chiahaa mkpu su nna iya: “Gofunaaru mu onu-oma; jikonu nna!”

35 Áyizaku sù iya: “Nwune ngu gudeakwa ẹregede bya anata ọnu-ọma ngu ọbu.”

36 Iso sù: “Ọo ẹpho Jiékoṣu, a gùru iya bẹ gbaru iya nù. Ọwa-a kwewa mgbo labo, ọ ghọ-gbutaru mu. Ọ nataru mu ọkpara, mu bu. Ọ bya nta-a bya anatafua mu ọnu-ọma mu.” Ọ jia nna iya sù iya: “?To nwekpọdaa ọnu-ọma ono ọphu i doberu mu mẹ nanu?”

37 Áyizaku sù Iso: “Mu meakwaru Jiékoṣu g’ọ buru nnajjuphu ngu; mu bya emekotaakwaa ndu ẹphe l’iya bu g’ẹphe buru ndu-ozì iya; bya agoa-kwarupho ọnu-ọma nù iya lẹ nri; waa lẹ mẹ. Nta-a bẹ o to nwekwa iphe, mu a-dù ike meeru ngu nwa mu.”

38 Iso nọdu epfukpọekwarupho nna iya sù iya: “Nna; ti nwekpọdaa g’ọ ka mma l’ọo akpuru ọnu-ọma lanu, ịi-goru mu? Gofunaaru mu ọnu-ọma; jikonu nna!” Ọ wata ara ẹkwa.

39 Nna iya, bu Áyizaku bya eyeeru iya ọnu sù iya:

“I tii budu l’eka
mgboko kakota ree;
ọphu i budu l’eka Chipfu
shi l’imigwe akwa ịi.

40 Ọo egbu mma bẹ ii-gude buru;
tẹme nwune ngu bẹ
ịi-nọdu ejeru ozi.

Ọle a -nonyakwanaa ọ dù
ngu ẹniruru;
Liikwefuru iya ike;
unu l’iya edokaha.”

Jiékoṣu agba ala ibe Lebanu

41 Iso bya akpọo Jiékoṣu ashì; kẹle ọo ọnu-ọma, nna iya gege agoru nù iya bẹ ọ goru nù Jiékoṣu. Ọ rija l’ime onwiya sù: “?Ọ kwa l’oorwuwa teke aa-kwa nnana? E -mechaa bẹ mu e-woru Jiékoṣu, bu nwune mu-a gbua.”

42 E pfurupho Ribeka iphe, nwa iya k’ogeranya, bu Iso pfuru; o zia g’e je ekua nwa iya kẹ nwata, bu Jiékoṣu. Ọ bya; ọ sù iya: “Lekwa lẹ nwune ngu, bu Iso bukwa iphe, o gude adu onwiya obu bu lẹ ya e-mecha gbua ngu.

43 Ọo ya bu lẹ-a; nwa mu; mekwaa iphe, mu abya epfufu; gbalakwa ẹgwewa lapfu nwune ne ngu, bu Lebanu lẹ Haranu! 44 Je anotota l’eka ono g’ẹhu ghubuhuada nwune ngu egbu! 45 Ọ -buru l’iphe, i meru nwune ngu ghubuhuẹru iya pho egbu; ọ zohaa ya; mu ezia ozi sù g’i shi l’eka ono lwa-tashia. Kẹle mu ta ahadu gẹ ndzù unu n’ẹbo tuphashihu l’eswe ujiku lanu.”

46 Noo ya bu; Ribeka bya ejepfu Áyizaku je asù iya: “Anodu ndzù dù-kwaa mu ẹniruru; ọ buru unwanyi ndu Hetu-a kparu iya. Ọ -buru lẹ Jiékoṣu lutafuaru unwanyi ndu alì-a; mbu unwanyi ndu Hetu, dù gẹ ndu ọwa-a; bẹ ?mu a-nodukwadu ndzù eme gunu?”

28 ¹Ọ bụru iya bụ ọ Ọyizaku bya ekua Jiékoṗu; bya agọru ọnu-oma nū iya; bya atọaru iya ekemu sū iya: “Ta alunupho nwanyị Kénanu! ²Tugbuekwapho jeshia Padanu-Arámu jepfu ndibe nna ngu oche, nwuru ne ngu, bụ Betuwelu; je alutaru onwongu nwanyị l'ẹka ono; luta nwada Lebanu, bụ nwune ne ngu! ³Ge Chileke, bụ Okwoolemka kebe ngu l'oma; mee ngu g'i nwushia unwu; bya emee g'i jaa ajàjà gbiriri jasụ jiburu nna oha, dū igwerigwe. ⁴Ge Chileke mee g'ọnu-oma ono, ọ gọru nū Ébirihamu ono; ree l'ẹhu ngu mē l'awa ngu. Ọo ya bụ; k'ọphu ii-nweru alị ono, i bụ nlwamulwa ono; mbụ alị ono, Chileke nuru Ébirihamu ono.” ⁵Ọo ya bụ; Ọyizaku bya edufu Jiékoṗu; ọ tugbua jeshia Padanu-Arámu. Ọ bụru ibe Lebanu bẹ ooje, bụ iya bụ nwatibe Betuwelu, onye Arámu. Lebanu ono bụ nwune Ribeka, bụ ne Jiékoṗu yele Iso.

⁶E mecha; Iso bya amaru ọ Ọyizaku gowaru ọnu-oma nū Jiékoṗu; bya edufuwa iya g'ọ laa Padanu-Arámu; je aluta nwanyị l'ẹka ono; teme ọ teke ono, ọ gọru ọnu-oma nū iya ono bẹ ọ turu iya ekemu sū g'ọ to lukwa nwanyị Kénanu; ⁷teme waa ọ Jiékoṗu mewaru iphe, ne iya yele nna iya pfuru iya bya ejeshiwa Padanu-Arámu. ⁸Ọ gbẹ teke ono bya edoo Iso ọnya l'ọ dū nna iya, bụ Ọyizaku eji; mbụ unwanyi, shi l'alị Kénanu. ⁹Ọ tugbua je l'ibe Ishimelu; bya alua Mahalatu, bụ nwune Nebayotu; bya aburu nwada Ishimelu, bụ nwatibe Ébirihamu; je eyekoberu unwanyi ophu o shi aluhawa.

Nrwo, Jiékoṗu rwo ru ọ Ọbetelu

¹⁰Tobudu iya bụ; Jiékoṗu shi ọ Biye-Sheba tugbua; ọ bụru iya eje mkpukpu Haranu. ¹¹Ọ jenyaa; nchi jipfu iya l'ẹka lanu. Ọ pfushi l'ẹka ono ge ya kwaa akwakwa. Ọ je apata mkpuma lanu l'ẹka ono bya eswibe l'ishi zezeta; mgbenya tu iya. ¹²Ọ bya arwo nrwo bya ahuma obebe, a suseru okpa iya l'alị; ọ je eberu l'imigwe. Unwu ozoji Chileke nodu enyi iya godogodo; ndu enyihu enyihu; ndu enyizeta enyizeta. ¹³Chipfu pfuru lononu iya pfua su: “Ọ kwa mu bụ Chipfu; bya aburu Chileke ke nna ngu, bụ Ébirihamu; yele Ọyizaku. Alị ono, i ze l'eli iya ono bẹ mu a-nu unu l'awa ngu. ¹⁴Oshilokpa ngu a-dū igwerigwe g'ẹja, nọ l'alị. Unu e-bucha burwua ọzo ọnyanwu-ariba; bya eburwua ọzo ọnyanwu-awawa; unu ebua jasụ l'uzo isheli; bua jasụ ọzo ohalị. Mu e-shi unu l'awa ngu l'ẹka kebe ndiphe l'ophu l'oma. ¹⁵Teme; humakpodapho; mu swikwaru ngu eswiru; mu a-nodukpoephe eleta ngu ọnya l'iphe, bukpo ekeke iije; ọzo bụ ọ mu e-duphuta ngu azu l'alị-a. Mu ta abyadu aha ngu jasụ mu emekota iphe, mu kweru ukwe iya.”

¹⁶Jiékoṗu shiepho ọ mgbenya tehu; bya asu: “Aha! ?Bụ iya bụ ọ Chipfu nọ l'ẹka-a; ophu mu eshidu maru?” ¹⁷Ndzu nodu agu iya. Ọ su: “Eka-a bẹ akpabiri iya dukwa! Eka-a te nwekwa iphe ọzo, ọ bụ; abudu ulo Chileke. Ọ kwa eka-a bụ eka eeshije bahu l'imigwe!”

18 O -rwua l'õnmewa utsalẹ nchita-abõhu iya; Jiékõpu bya ewota mkpuma ono, o shi swibe l'ishi ono; bya akpõbe g'itso; o woru manụ wụshi iya l'eli. 19 O gụa ẹka ono Bẹtelu; obenu iphe, e shi ekuje iya bụ Luzu.

20 Jiékõpu bya eribua nte sụ: “Chileke -swikpõwaru mu eswiru; eleta mu ẹnaya l'ije-a, mu eje-a; bya anụkota mu nri; yẹ l'iphe, eeye l'ẹhu; mẹ k'anma l'upfu; 21 k'õphu bụ lẹ mu lwarụ l'ibe nna mu l'ẹhu-guu; bẹ mu emekwa Chipfu g'õ bụru Chileke mu! 22 Mkpuma-a, mu pfulberu g'itso-a bẹ a-buru ụlo Chileke; tẹme iphemiphe, gụbe Chipfu nụkotaru mu bẹ mu anụje ngu oke-lanụ-l'uzo-iri.”

Jiékõpu ejerwu alị Padanu-Arámu

29 1 Jiékõpu tũgbukwa jeshia iphe, oje; o jee gbiriri jasụ o jerwua alị ndu ụzo ẹnyanwu-awawa. 2 O -rwua l'ẹka ono; ọ hụma wẹlu, nọ l'oma ẹgu; waa ikpo aturu ẹto, dõru lẹ mgboru iya; noo kele aturu ono anguje mini lẹ wẹlu ono. Mkpuma, e gude swichia õnu wẹlu ono ha shii. 3 O nõdu abụjeru; aturu ono -dzukoephõ l'ẹka ono; ndu eche iya nụ abya atụko swifu mkpuma ono l'õnu wẹlu ono seta mini doberu aturu ono. Ẹphe -mechaa; ẹphe abya eswita mkpuma ono dobe l'ẹka o shi dụ l'õnu wẹlu ono.

4 Jiékõpu bya ajia ndu eche aturu ono sụ: “Unwune mu; ?bụ awe bẹ unu shi?”

Ẹphe sụ iya l'ẹphe shikwa Haranu.

5 O sụ pẹ: “?Unu maru Lebanụ, nwanwa Nahõ?”

Ẹphe sụ ee; l'ẹphe makwaru iya.

6 Jiékõpu sụ pẹ: “?Ẹhu dụ iya-a ree?”

Ẹphe sụ iya: “Ee; ẹhu dụkwa iya-a ree; tẹme l'õ kwa nwada iya, bụ Rechiẹlu chị aturu abya pọ.”

7 O sụ pẹ: “?Unu te eledu l'ẹnyanwu dụkwadu shii? L'õ toko rwudu teke aachikobeje aturu. Unu setanụ mini doberu aturu õbu g'ẹphe ngụ; g'unu achiru pẹ jebaa lẹ nri!”

8 Ẹphe sụ iya: “Anyi ta adụkwa ike. O kwa a -chikobechaa aturu ono g'õ ha; l'aabya eswifu mkpuma l'õnu wẹlu ono; tẹmanu l'aawata eche aturu mini teke ono.”

9 O nõdukwadu epfu eyeru pẹ; Rechiẹlu chiru aturu ibe nna iya gude bya; noo kele ọ bụ nwamgbõko, eche aturu. 10 Jiékõpu hụmaephõ Rechiẹlu, bụ nwada Lebanụ, onye bụ nwune ne iya; waa aturu Lebanụ; ọ tũgbua je eswifu mkpuma ono l'õnu wẹlu ono; bya eseta mini doberu aturu nwune ne iya ono; ọ ngụ. 11 Jiékõpu bya etsutsua Rechiẹlu õnu; bya awata arashị ẹkwa ike. 12 O bya epfuaru Rechiẹlu l'ẹphe lẹ nna iya bụkwa; mbụ lẹ ya bụkwa nwatibe Ribeka. Rechiẹlu gbagbua je akõoru iya nna iya.

13 Lebanụ nũmaephõ kẹ Jiékõpu, bụ nwa nwune iya; ọ gbapfushia ya. O bya etsutsua ya õnu; bya eduta iya lashia ibe iya. E rwua ibe iya; Jiékõpu

woru iphemiphe kòkotaru iya. ¹⁴Lebanu sù iya “Mu lè ngu bukwa mee lanu.”

Jiékpòpu alùta Lii yèle Rechièlu

Tòbudu iya bụ; èphe lè Jiékpòpu nòephò ònwà ophu; ¹⁵Lebanu sù iya: “Ò tò budu lè mu lè ngu bụ abubu bụ iphe, a-kpata g'i jejeru mu ozi kè mmanu. Kòoru mu iphe, mu a-pfùje ngu aswa ozi ngu!”

¹⁶Noo ya; Lebanu nwutaru unwumboko labo. Epha onye k'ogerenya bụ Lii; epha onye kè nwata bụ Rechièlu. ¹⁷Lii bè ɛnya dū rogoro rogoro; Rechièlu nòdu ama mma bya adu ùbvù l'ɛnya. ¹⁸Jiékpòpu yeru Rechièlu obu. Oo ya bụ; o sù Lebanu: “Gè mu jenaaru ngu ozi apha ɛsaa; g'i kee mu nwada ngu, bụ Rechièlu.”

¹⁹Lebanu sù iya: “Ò kabakwanu ree lè mu keru ngu iya eme lè mu woru iya kee akataka onye ozo. Ngwa; g'anyi lè ngu bunuru.” ²⁰Oo ya bụ; Jiékpòpu bya ejee ozi apha ɛsaa g'e kee ya Rechièlu. Apha ɛsaa ono dūe ya phò gè nwujiku olemole; noo kèlè o yeru Rechièlu obu shii.

²¹Oo ya bụ; Jiékpòpu bya asù Lebanu: “Ngwa; dewaa mu rọ nyee mu. Mu nò-dzuwaru apha ɛsaa obu. O nòdu agwà mu ègu gè mu l'iya kwaa.”

²²Oo ya bụ; Lebanu bya ekukòbe ndu ɛka ono bya eshiaru phè nri. ²³O be l'uzenyashi; o bya eduta nwada iya, bụ Lii; bya eduru nù Jiékpòpu; èphe lè Jiékpòpu kwaa. ²⁴Lebanu bya eye ɛka l'ohu iya duta nwamgboko lanu, epha iya bụ Zilipa duru nù nwada iya ono g'o jejeru iya ozi ulo.

²⁵Nchi bòhuepho; Jiékpòpu hùma l'oo Lii bè e deru iya. Jiékpòpu sù Lebanu: “?Bù gunu bè i meru mu iphe, dū egube-a? ?Tòbudu Rechièlu bè mu jeru ngu ozi iya? ?Bù gunu meru g'o gude i gbaaru mu egube ɛregede-a?”

²⁶Lebanu sù iya: “?Tì madu lè g'omelalì dū bụ l'anyi te ekejedu onye kè nwata l'èba abù lekewaru onye k'ogerenya?” ²⁷Sù iya: “Taa nshi meghèkpòadaa ekele onye owa-a idzu-a. E -mechaa; mu ekéfua ngu onye kè nwata; òlè ii-jekwanuru mu ozi iya apha ɛsaa ozo.”

²⁸Jiékpòpu mee ya nno. O mee ekele Lii idzu ophu. Lebanu bya ekéfua ya nwada iya, bụ Rechièlu; o lufuaru. ²⁹Lebanu bya eye ɛka l'ohu iya duta nwamgboko lanu, epha iya bụ Biliha duru nù nwada iya ono, bụ Rechièlu g'o jejeru iya ozi ulo. ³⁰Jiékpòpu èphe lè Rechièlu bya akwakwapho. O ka eye Rechièlu obu eme lè Lii. O bya ejeeru Lebanu ozi apha ɛsaa ozo.

Unwu, Jiékpòpu nwutaru

³¹Chipfu hùmaephò lè Lii bè e te eyeduru obu; o ghebe ɛkpa-nwa iya onu; ophu Rechièlu atsudu ime. ³²Lii bya atsuta ime bya anwua nwa nwoke. O woru iya gwa Rúbenu; kèlè o sùru: “Chipfu hùmawaru iphe-èhuka, mu eje. Nta-a bè mu maru lè nnajiuphu mu e-ye mu obu.”

³³Ọ bya atsuta ime ọzo bya anwukwapho nwa nwoke. Ọ sụ: “Ọ kwa ẹ Chipfu nūmaru l'e te eyeduru mu obu meru g'o gude ọ nūkwa mu pho onye ọwa-a.” O woru iya gụa Simiyonu.

³⁴Ọ byakwa atsuta ime ọzo; o zedakwapho nwua nwa nwoke ọzo. Ọ sụ: “Nta-a bẹ mu maru ẹ nnajiuphu mu a-gharu mu iphu; noo kele mu nwutawaru iya unwoke ẹto.” Ọo ya bụ; o woru iya gụa Lívayi.

³⁵Ọ bya atsuta ime ọzo; nwua nwa nwoke. Ọ sụ: “Ọgiya-a bẹ mu e-tu Chipfu ẹpha.” O woru iya gụa Jiuda. Ọ nwuchaa onye k'ono; ọ pfuru apfuru.

30 ¹Rechielu hūmaepho ẹ ya ta anwutaduru Jiékpọ mu mē nwa lanu; o koaharu nwune iya okophoo. Ọo ya bụ; ọ sụ Jiékpọ: “Yekwaa mu ime; ọdumeka mu anwuhukwa!”

²Opfu iya ono ghua Jiékpọ eghu. Ọ sụ iya: “?Bụ mbedua bụ Chileke, kposhuru ngu anwuta nwa?”

³Ọ sụ iya: “Duta ohu mu-a, bụ Biliha gẹ gụ l'iya kwajẹ g'ọ nwutaru mu unwegirima; k'ophu mu e-shi iya l'eka nweru awa.”

⁴Ọo ya bụ; ọ bya ekuta ohu ono, bụ Biliha nū iya; ọ luru. Biliha yele Jiékpọ bya akwaa; ⁵ọ bya atsuta ime nwuaru iya nwa nwoke. ⁶Noo ya; Rechielu sụ: “Nta-a bẹ Chileke hawaru mu enge. Ọ ngabewaru nchi numa iphe, mu rworu iya; bya anu mu nwa nwoke.” Eshinu ọ dụ egube ono; ọ gụa ya Danu.

⁷A nonyakwa; ohu Rechielu ono, bụ Biliha bya atsuta ime ọzo; bya anwuaru Jiékpọ nwa nwoke k'ẹbo. ⁸Rechielu sụ: “Mu ẹ nwune mu kpaakwaru ẹnya shii; ọle nta-a bẹ mu kaakwanaa ya ẹnya.” Ọo ya bụ; o woru nwata ọbu gụa Nafutali.

⁹Lii hūmaepho ẹ ya pfuru apfuru; o duta ohu nkiya, bụ Zilipa nū Jiékpọ g'ọ luru. ¹⁰Ohu Lii ono, bụ Zilipa bya anwutaru Jiékpọ nwa nwoke. ¹¹Lii sụ: “Ọwa-a bukwa iphe-ekweru.” Ọo ya bụ; ọ gụa ya Gadu.

¹²Ohu Lii ono, bụ Zilipa bya anwuta nwa nwoke k'ẹbo. ¹³Ọo ya bụ; Lii sụ: “Ehu atsoshikwa mu utso ike; nta-a bẹ unwanyi a-nodu eku mu onye a goru ẹhu-utso nū.” O woru nwata ọbu gụa Asha.

¹⁴O be teke ebuje witi; Rúbenu tugbua je l'egu; ọ hūma akpuru mandureku; ọ wota iya je anu ne iya, bụ Lii. Rechielu sụ Lii: “Jiko hēnaa mu akpuru mandureku, nwa ngu wotaru ngu.”

¹⁵Obenu l'ọ sūru iya: “?Ji mu ophu i nataru mu teke asuduru ngu; i nodu emefua g'i nata mu akpuru mandureku, nwa mu nuru mu?”

Rechielu sụ iya: “Ọ dụ ree; g'ọ laru ngu l'ulo l'enyashi-a l'ugwo akpuru mandureku nwa ngu ọbu.”

¹⁶Ọo ya bụ; Jiékpọ shiẹpho l'egu lwa l'uzenyashi mboku ono; Lii gba iya ndzuta je asu iya: “Lwakwaru mu l'ulo l'enyashi-a! Mu gudeakwa akpuru mandureku nwa mu zua ngu!” Ọo ya bụ; ọ lwaru iya l'ulo l'enyashi ono.

¹⁷Chileke ngaberu Lii nchi; o tsuta ime bya anwutaru Jiékopu nwa nwoke k'ise. ¹⁸Oo ya bu; Lii su: “Chileke buakwaru mu nggo; kele mu kutaru ohu mu kee Jiékopu; o luru.” O woru nwata obu gya Isaka.

¹⁹Lii tsuta ime ozo; bya anwutaru Jiékopu nwa nwoke k'ishii. ²⁰Lii bya asu: “Chileke meakwaru mu iphe-oma, paru aka. Nta-a be mu mawaru le ji mu a-kwabeje mu-a ubvu; eshinu mu nwutaru iya unwu-okoro ishii.” Oo ya bu; o woru iya gya Zebulun.

²¹E mecha; o bya anwua nwamgboko bya eworu iya gya Dayina.

²²Chileke bya anyata Rechielu; bya angaberu iya nchi bya eworu iya ekpa-nwa ghebe onu. ²³O tsuta ime; bya anwua nwa nwoke bya asu: “Chileke nafuwaru mu iphe-iphere ono.” ²⁴O gya ya Jiósefu; kele o suru: “Ge Chipfu yekwakwaru mu nwa nwoke ozo l'owa-a.”

Aturu Jiékopu azushi aka igwerigwe

²⁵Rechielu nwuchaepho Jiósefu; Jiékopu su Lebanu: “Dua mu ge mu laa ibe nna mu. ²⁶Li haaru mu unyomu mu phe; waa unwegirima mu, bu ndu mu jeru ngu ozi l'ishi phe-a; ge mu gude lashia. Li mawaru ge mu jeberu ngu ozi.”

²⁷Lebanu su iya: “O -buru le mu du ngu l'obu eviya; jiko nobanaa! Le mu lewaru enya g'iphe, aanwu; mu maru l'oo iswi ehunu meru g'o gude Chipfu kebe mu l'oma egube-a.” ²⁸O sukwa iya pho: “Pfu iphe, mu a-pfu-je ngu ge mu apfuje ngu iya.”

²⁹Jiékopu su iya: “I makpowaru-a ge mu jeberu ngu ozi; waa g'iphe-edobe ngu gude zu-beru ge mu eletaru ngu iya enya. ³⁰Nwiphe nshii ono, i shi nweru teme mu bya ono be hawa shii egube-a. Kele oobujeru; ibiya ophu mu shiru Chipfu ekebe ngu l'oma. Nta-a buru; denuhunu teke mu a-gba mkpu ehunu mu le ndibe mu?”

³¹Lebanu su iya: “?Bu gunu be mu a-pfujekwanu ngu?”

Jiékopu su iya: “Ta pfushi mu ugwo; o chia o -buru l'i kwetaru iphe, mu abya epfufu-a; mu echebaaru ngu aturu ngu. ³²Ge mu jephekota l'eka aturu ngu kuru ntanu-a; je ahoshikota aturu, tukashiru iphe oji; ozo ophu dekaşiru iphe; waa iphe, bu nwaturu, jigburu uji; ye leghu, tukashiru ucha; ozo ophu dekaşiru iphe. Ndu k'ono a-buru aswa ozi mu. ³³Mbu l'ii-mecha maru le mu bu onye ire-lanu. Le-a; teke o bu l'e mecharu i bya ele enya le ndu k'ono, i gude pfua mu ugwo ono; i -huma iya eghe, atukashiduru ucha; ophu o dekaşiduru iphe; ozo l'oo nwaturu, ata budu k'ojii; iikua mu onye-oshi.”

³⁴Lebanu kweta bya asu iya: “G'o dukwapho g'i pfuru.” ³⁵Le mboku ono gedegede be o tugburu je ahoshikota mkpi, dekaşiru iphe; waa ndu ophu tukashiru ucha; waa ne eghe mmanu ndu ophu tukashiru ucha; ye ndu ophu dekaşiru iphe; waa aturu, jikotaru uji g'ephe ha. Ndu k'ono be o chiru nu unwegirima ibe iya g'ephe cheje. ³⁶O chia phe je ije ujiku eto

je edobe phe l'eka ono dokaha yebedua, bu Lebanu l'onwiya yele Jiékòpu. Jiékòpu nõdu eche ndu ophu o chi-phodoru.

³⁷Jiékòpu bya egbuta ekali-oshi oyi; ekali-oshi popula; waa oshi alumon-du; waa oshi pulenu. O bya aswabotachaa ekali-oshi ono egbo; mee ya; o du g'o dekaşiru iphe oçhaa. ³⁸O bya ewota ekali-oshi ono, o swaşiru egbo ono dobechaa l'iphe, eeyejeru iphe-edobe ono mini; o o ya bu k'ophu ephe a-nõdujeeppo iphe-edobe ono l'atatiphu nhamunha; m'ephe byatashia anguta mini. O nõdu abujeru; iphe-edobe ono -nõdu ana okee; ephe -bya anguta mini; ³⁹ephe awata eshi okee l'atatiphu ekali-oshi ono. Ephe bya anwushi nwa; ephe anwushia unwu, dekaşiru iphe; waa ophu tukashiru iphe. ⁴⁰Jiékòpu bya ahoshia unwu iphe-edobe ono bya edobe iche; bya eworu ndu ophu chiru yeru ndu ophu dekaşiru iphe yele k'oiji pho, bu ke Lebanu pho. O shi egube ono nweaharu iphe-edobe k'eka iya; ophu oçhikobejeedu iya le ke Lebanu. ⁴¹Ndu ophu bu nyee ya, gbashiru ike -najeepo okee; Jiékòpu eje eworu ekali-oshi ono ye l'iphe, eeyejeru iphe-edobe mini ono dobe l'atatiphu phe; k'ophu ephe e-shi okee le mgboru ekali-oshi ono. ⁴²O -rwua l'anu ophu du nyegenyege; o too dobeduru iya ekali-oshi ono. O o ya bu; e shi egube ono iphe-edobe ono, ndu ophu du nyegenyege laaru Lebanu; ndu ophu shihuru ike laaru Jiékòpu. ⁴³Jiékòpu shi egube ono kwatakpo o nweru iphe mebyi enweru; bya enweru igwe iphe-edobe; gbashia ohu; unwanyi me unwoke; bya enweru inya-kamelu; yele nkapfu-igara.

Jiékòpu agbafu l'ibe Lebanu

31 ¹Noo ya; a nonyaa; Jiékòpu naha l'unwu Lebanu be epfu l'o tukowaru iphe, nna phe nweru chitachaa. L'iphemiphe ono, o nweru ono g'o ha be bukota eku nna phe be o bu. ²Te me Jiékòpu humakwapho l'o to buedu ge Lebanu shi emeru iya umere bu goomekwadu.

³O o ya bu; Chipfu su Jiékòpu: "Tugbua lasha ibe nna ngu phe. Su-a; lapfu ndibe unu le mu no-a swiru ngu."

⁴O buru iya bu; Jiékòpu bya ezia ge je ekuaru iya Rechielu waa Lii; ephe byapfuta iya legu l'eka anu, bu iphe-edobe iya doru. ⁵O su phe: "Mu elekwa enya l'o to buedu ge nna unu shi emeru mu umere bu goomekwadu; ole Chileke ke nna mu phe noekwapho swiru mu. ⁶Unu makotaru le mu gude ike mu g'o ha jekotaru nna unu ozi. ⁷Obenu le nna unu riru mu urwu; gbanwee aswa ozi mu ugbo iri. Ole Chileke te ekwekwanu g'o meka mu iphe. ⁸O -buru l'o suru l'oo ndu ophu tukashiru iphe, bu aswa ozi mu; iphe-edobe ono awataepho anwushi unwu, tukashiru iphe. Teke o bu l'o suru l'oo ndu ophu dekaşiru iphe, a-buru aswa ozi mu; iphe-edobe ono awataepho anwushi unwu, dekaşiru iphe. ⁹O o ya bu l'oo Chileke l'onwiya chitaru iphe-edobe nna unu chiru nu mu.

¹⁰"Le teke anu anaje okee be mu rwojeru nrwõ ge mu humaru l'iphe-edobe ono ndu ophu eshi okee be ndu ophu dekaşiru iphe du iya; ndu

ophu tukashiru iphe dukwa iya pho. ¹¹Ojozi Chileke bya ekua mu oku le nrwo ono su: 'Jiékopu!' Mu za iya: 'Owee!' ¹²Q su: 'Palikpodapho enya apali huma l'iphe-edobe ono ndu ophu eshi okee be ndu ophu dekaashiru iphe du iya; ndu ophu tukashiru iphe dukwa iya pho. Noo kele mu huma-kotawaru iphe, Lebanu emekotaje ngu. ¹³Q kwa mbedua bu Chileke ke Betelu. Betelu bu eka ono, i wuru manu l'eli mkpuma ono; mbu eka ono, i no kwee ukwe-iphe ono. Su-a; gbeshikwa lufu l'ali-a nta-a nta-a; lashia eka a nwuru ngu.' "

¹⁴Tobudu iya bu; Rechielu yee Lii bya eyeeru iya onu su iya: "Q du ru teke anyi e-ketakwadu oke l'iphe, shi l'ibe nna anyi? ¹⁵?Nna anyi te ekuada anyi ndu ohozo; mbu l'o to budaa l'o reru anyi erere; obenu l'o mepushichawaru okpoga, a pfuru iya l'ishi anyi go ha. ¹⁶O doru enya leku ono l'ophu, Chileke nataru nna anyi ono bukotawa k'anyi; bya aburu k'unwu anyi. Ngwanu; menaa iphe, Chileke suru g'i mee!"

¹⁷Oo ya bu; Jiékopu bya eworu unwu iya; yee unyomu iya kuru ye l'eli inya-kamelu. ¹⁸Q bya achiru iphe-edobe iya go ha dobe l'ivuzo; yee iphemiphe, o setakotaru le Padanu-Aramu. O gude phe lashia ibe nna iya, bu Ayizaku l'ali Kénanu.

¹⁹Lebanu jeruro ebushi aturu iya eji. Rechielu tugbushia bya akpaswata obu-nshi ibe nna iya ono, bu Lebanu. ²⁰Temanu; o bukwarupho ezita be Jiékopu zitaru onwiya ala lebe epfuru Lebanu ono, bu onye Aramu ono le ya alawa. ²¹Q chita iphemiphe, o nweru gude gbalaa; je adaghaa enyimu Yufurétisu; kwaseru uzo, shijaru oha ubvu Giladu lashia.

Lebanu achipyabe Jiékopu

²²O -rwua mboku k'eto; e pfuaru Lebanu le Jiékopu phe gbalaakwaru. ²³Q chita ndibe iya; epe chia phe ujiku esaa; bya agbapfu phe l'oha ubvu Giladu. ²⁴Chileke byapfuta Lebanu, onye Aramu le nrwo lenyashi bya asu iya: "Letanupho enya! Ba adukwa iphe, ii-pfuru nu Jiékopu! Be pfukwaru iya opfu oma; ophu i pfukwaru iya ejo opfu!"

²⁵Oo ya bu; Lebanu bya agbapfu Jiékopu. Q buru l'oha ubvu Giladu be Jiékopu koberu ulo-ekwa iya teke ono. Lebanu yee ndu epe l'iya swi bya akpobekwapho nkephe leka ono. ²⁶Lebanu su Jiékopu: "Bü gunu be i meru egube-a? ?Denu go gude i zita onwongu ezita tugbua ge mu ba ma; chita unwada mu ge ndu a kpuru le ndzu legu ogo? ²⁷?Bü gunu be o gude i nodu agbala le mpya; i zita onwongu tugbua ge mu ba ma; ophu i pfuduru mu iya; k'ophu mu e-gude ehu-utso; gude ebvu, aaku nkwa yee une eye; gude bya edua unu? ²⁸Ophu i kwepodanu ge mu tsutsua unwu nwanwa mu; waa unwada mu onu; gude su phe tokwa ehu. I meru ume-re onye-eswe. ²⁹Mu gege emerwukwa ngu ehu; ome o to bu le Chileke ke nna ngu byapfutaru mu le nrwo lenyashi bya asu mu: 'Letanupho enya! Ba adukwa iphe, ii-pfuru nu Jiékopu! Be pfukwaru iya opfu oma; ophu

iipfukwaru iya ejo opfu!’ ³⁰Nta-a be i tugburu ala opfu l'oghoroko ibe nna ngu du ngu. Obenu ?bu gunu kparu iphe, i zitaru iteshi mu?”

³¹Jiékpou su Lebanu: “O kwa ndzu shi agu mu; kele mu riru l'ii-nata mu unwu ngu k'ehuka. ³²Obenu l'o -buru l'i humaru onye gude iteshi ngu be onye ono ta anodukwa ndzu. Ngwa; nodu l'iphu ndu anyi l'ephe bu-a; gude aka ngu choo g'i maru ?o nweru iphe ngu, mu gude? O -nweru ophu i humaru; wota iya!” Ge Jiékpou epfu nno be o to bukpoohanu l'o maru l'oo Rechielu be zitaru obu iteshi obu.

³³Oo ya bu; Lebanu bya abahu l'ulo-ekwa Jiékpou; waa ke Lii; waa le k'unwanyi ohu labo ono je achokota iya; ophu o dudu iphe, o humaru. O lufutaepho l'ulo-ekwa Lii; bya abahu l'ulo-ekwa Rechielu. ³⁴Ama le Rechielu woru obu-nshi ono nwua l'iphe, aanoduje anoo l'eli inya-kamelu; nopyabe iya anoo. Lebanu bya atuko iphe, no l'ulo-ekwa ono chighashia; ophu o dudu iphe, o humaru.

³⁵Rechielu su nna iya: “G'ehu te eghukwa ngu eghe; nnana; le mu ta agbalihuduru agbalihu le g'i byaru-a; l'o kwa nsu nwanji eme mu.” O kwe iya hm; bya achoo obu-nshi ono nta-a; choo imo; ophu o humaduru iya.

³⁶Ehu ghushiaha Jiékpou eghe ike; o tsopyabe Lebanu uswo su iya: “?Bukpoo gunu bu ejo-iphe obu, mu meru obu? ?Bu iphe-eji gunu be mu meru kparu iphe, ichi mu kpabekpabe nno? ³⁷Nta-a, i tukoru ivu mu voghashicha-a; ?bu gunu be i humaru, bu nkengu? Wofuta iya l'atatiphu ndibe anyi le ngu-a; g'ephe pfua onye ophu acho opfu!

³⁸“Mu le ngu buwaru ukporo apha nta-a. Ophu aturu yee eghe ngu adudu ophu kwojeru nwa; ophu mu atsojeduru onu l'ebili, shi l'aturu ibe ngu; ³⁹Ophu mu apalatajeduru ngu odzu iphe-edobe ngu, anu-egbudu gburu; o chia mbedua be oobutajechia; i nodu asuje ge mu pfua ngu ugwo iphe ophu iphuru zitaru leswe; ozoo lenyashi. ⁴⁰Lenaa g'o shi adujeru mu. Leswe be anwu shi egheje mu eghege. O -rwua lenyashi; mu anokota l'ogoyi abali; ophu mgbenya abyadu eshita mu enya. ⁴¹Noo ge mu jekotaru iya l'ukporo apha ono, mu bukotaru l'ibe ngu ono. Mu jeru ngu ozi apha iri l'eno l'ishi unwada ngu; bya echeru ngu iphe-edobe apha ishii. I ghazia ugwo mu mgbo iri. ⁴²Ome Chileke ke nna mu; mbu Chileke ke Ebirihamu; waa onye Ayizaku atsu ebvu; ome o to no-kube mu; me iimechaa gbaeghaa mu aka oto chia mu. Obenu le Chileke humaru iphe-ehuka mu; waa ge mu eseberu akanya; bya abaarū ngu mba lenyashi-a, laru nu-a.”

⁴³Lebanu su Jiékpou: “Unwanyi-a bukwa unwada mu; unwegirima-a buru unwegirima mu; iphe-edobe-a buru mu nwe iya. Iphemiphe-a g'o ha bukota nkemu. Ole ?bukwanu gunu be mu e-me l'ehu unwada mu obu; ozoo l'ehu unwegirima-a, ephe nwushiru-a? ⁴⁴Ngwa; bya ge mu le ngu gbaa ndzu g'o buru iphe, a-buru ekebe mu le ngu!”

⁴⁵Oo ya bu; Jiékpou bya apata mkpuma kpobe; o du g'itso. ⁴⁶O su ndu ono, ephe l'iya bu ono g'ephe pakoo mkpuma. Ephe bya apakoo mkpuma

ono kukobe l'eka lanu. Epehe nodu le mgboru ikpo mkpuma ono rigba nri. ⁴⁷Lebanu kua eka ono Jiga Sahaduta; Jiekopu kua ya Giladu.

⁴⁸Lebanu su: "Ikpo mkpuma-a bu ekebe mu le ngu ntanu-a." Noo iphe, kparu iphe, a guru iya Giladu. ⁴⁹E kukwaru iya pho Mizupa; noo kele o suru: "Ge Chipfu tukokwa mu le ngu chee nche; me anyi gbakashihuchaa; tugbua. ⁵⁰Teke o bu li meru unwada mu-a eji; ozoo li jeru alua unwanyi ozo; agufu epehedua; a makwaru-a lo to dudu onye anyi l'iya tuko nodu l'eka-a; ole gi nyatakwa le Chileke bu onye-ekebe mu le ngu."

⁵¹Lebanu sukwaphe Jiekopu: "Waa ikpo mkpuma-a; teme waa itso mkpuma-a, mu kporu l'echilabo mu le ngu. ⁵²Ikpo mkpuma-a bu ekebe; teme itso mkpuma-a bukwarupho ekebe le mu ta abyadu aghata iya; bya l'ibiya nkengu bya ngu emeka iphe. Ophu gubedua abyadu aghata iya abya ibiya nkemu abya mu emeka iphe. ⁵³Ge Chileke ke Ebirihamu, bu Chileke ke Nahu; bya aburu Chileke ke nna phe kpee ikpe mu le ngu!"

Oo ya bu; Jiekopu bya egude epha Chileke, bu Onye nna iya, bu Ayizaku atsuh ebvu riaru iya nte. ⁵⁴O bya egwee ngweja l'eli ubvu l'eka ono; bya ezia abubu iya gephe bya le nri. Epehe richaa nri bya akwaa l'eka ono lenyashi ono.

⁵⁵O -rwuepho lonmewa utsu; Lebanu bya etsutsua unwu nwanwa iya; yee unwada iya onu; bya agoru onu-oma nu phe; bya adakobe; o buru iya ala unuphu.

Jiekopu akwakobe gephe le Iso dzuda

32 ¹Jiekopu tugbukwaphe nkiya; o buru iya alala. O jenyaa; unwu ojozi Chileke wu-pfuta iya. ²Jiekopu hamae phe pho; o su: "Ha! Ndu owa-a bukwa ndu ojogu ke Chileke!" O gaa eka ono "Mahanayimu" bu iya bu odu labo.

³Jiekopu zia ndu-ozu gephe vuru iya uzo jepfu nwune iya, bu Iso l'ali Siye, bukwaphe ali ndu Edomu. ⁴O bya ezia phe su: "Waa iphe, unu e-pfuru nnajiuphu iya, bu Iso. Unu su iya l'onye-ozu iya, bu Jiekopu sukwaru loo l'ibe Lebanu be ya shi teke ono butaru; o buru eka ono be ya bu byasu nta-a. ⁵Ya nweru eswi; bya enweru nkapfu-igara; nweru aturu; yee eghe; nweru ohu; unwoke me unwanyi. Ya ezi ndu-ozu iya-a gephe byapfuta nnajiuphu iya g'a maru ?ya a-du iya lobu?"

⁶Ndu ozi ono jechaa bya alwaphuta azu lwapfuta Jiekopu su iya: "Epehe jepfukwaru nwune ngu obu, bu Iso. Nta-a be o gudekwa unu umadzu gude abya ngu ndzuta."

⁷Ndu gahaa Jiekopu; meji tofu iya. O bya ekee ndu epehe l'iya swi uzo labo; bya eekwaphe aturu waa eghe iya; kee eswi iya; me inya-kamelu iya uzo ebo ebo kwapho. ⁸O riu su: "O -buru le Iso tsoru ndu ke mbu ogu; oke lanu ophu, ghuduru nu pho agbalakponu."

⁹Jiekopu bya epfuru nu Chileke su: "Gube Chileke ke nna mu oche, bu Ebirihamu; Chileke ke nna mu, bu Ayizaku; gube Chipfu; onye suru mu ge

mu laphu azu l'ali, a nwuru mu; lapfu abubu mu phe; l'ii-me-a ge mu barahu. ¹⁰Obu ono, i goshiru l'i yeru mu ono; waa ememe, i meru mu iphe, i pfuru ono be ta agbakwaru mu. Teke mu daru enyimu Jiordanu-a bu oshimpaleka be mu pa kpoloko; obenu le nta-a be mu nwewaru iphe; k'ophu mu tsukaharu iya ebo. ¹¹Mu epfu anu ngu g'i dzoo mu l'eka nwune mu, bu Iso. Kele ndzu agu mu l'oo-tso mu ogu; tsoo unwanyi ibe mu yee unwe-girima phe ogu kwapho. ¹²Obenu l'i pfuru su l'i mee mu ge mu barahu; liimee g'awa mu ha g'eja, no leze-enyimu; mbu g'ephe buru aguta aguta."

¹³O kwaa l'eka ono lenyashi ono; bya eshi l'iphe, o nweru hota iphe, oo-gude meeru Iso iphe-oma. ¹⁴Iphe, o hotaru bu ukporo ne eghu iri; yee ukporo mkpi; waa ukporo ne aturu iri; yee ukporo ebili; ¹⁵bya ahotakwapho ne inya-kamelu yee unwu iya ukporo l'iri; waa ukporo ne-eswi labo; yee oke-eswi iri; waa ukporo ne nkafu-igara; yee okee ya iri. ¹⁶O dokota anu ono iche iche; bya eyekota ndu-ozu iya g'ephe leta iya enya iche iche. O su ndu-ozu iya ono: "Unu vuru mu uzo! Unu edoo onwunu iche iche ge ndu eche anu ophuu ta tukobekwa onwophe le ndu eche ophuu!"

¹⁷O su ndu ophu vu uzo: "O -buru l'unu le nwune mu, bu Iso dzuru; o jia; su: '?Unu bu ndibe onye?' teme '?Bu awe be unu eje?' teme '?Bu onye nwekota anu ono, awu l'atathu unu ono?'" ¹⁸Iphe, unu e-pfu bu: 'O kwa onye-ozu ngu, bu Jiekopu nwe iya. Ole oo iphe, o nuru g'e wotaru nnajiphu iya, bu Iso; le yebedua, bu Jiekopu etsokwa phe-a l'azu.' "

¹⁹O pfiaru ndu k'eto; waa ndu k'eto; me iphe, bukpo g'ephe hakota, etso iphe-edobe ono; su phe: "O kwapho iphe ono, mu pfuru ono be unu e-pfujeru Iso; me unu l'iya dzuda. ²⁰Ole g'unu nyatajekwa su l'onye-ozu iya, bu Jiekopu be etsokwa unu." Iphe, Jiekopu gude pfua nno bu l'o riru su l'ee-gude iphe ono, ya nuru e gude vuru uzo ono mee g'obu jidata iya. Su: "?A maru; ?oo-nata mu-a; me mu hamae ya pho?" ²¹Oo ya bu; e rwutanu eku ono, Jiekopu chieru g'a chie Iso ono vuru uzo; yebedua, bu Jiekopu kwaa l'eka ono lenyashi ono.

Jiekopu yele Chileke agba mgba

²²Lenyashi ono be Jiekopu dutaru unyomu iya ephenebo; waa unwanyi labo ono, bu ohu iya ono; waa unwu iya ephe n'iri le nanu je adaghaa nggele Jiaboku l'uzo eka eerwuje iya erwurwu. ²³O dughacha phe pho le nggele ono; o bya alaphu azu bya achifukota iphemiphe, o nweru l'azu iya ophuu kwapho. ²⁴O buwaru Jiekopu nwekinyi iya no l'eka ono. Ephe le nwoke lanu gbaepho mgba gbiriri jasu l'uzo utsu. ²⁵A nonyaa; nwoke ono maerupho l'o to gudedu iya; o rwua Jiekopu eka l'ishi nka; nka kpokafu iya g'ephe le nwoke ono agba mgba ono. ²⁶Nwoke ono su iya: "Haa mu ge mu laa; le nchi abohuwaa!"

Jiekopu sukwanu: "Mu taa hakwa ngu g'i laa; abudu li goru onu-oma nu mu."

27Nwoke ono sù iya: “?Bù gùnu bù epha ngu?”

Ò sù iya: “Òo Jiékòpu.”

28Òo ya bù; nwoke ono sù iya: “Èpha ngu taa bùeduru Jiékòpu; ọọ Ízùrèlù^a bè ọọ-bùru; noo kẹle unu lẹ Chileke; waa nemadzu gharu iya; ì lwù-kpee.”

29Jiékòpu sù iya: “Jiko; kọnaaru mu epha ngu.”

Ò sù iya: “?Bù gùnu meru iphe, ìkpa ishi epha mu?” Ò gọru ọnu-ọma nù Jiékòpu l'ẹka ono.

30Òo ya bù; Jiékòpu gù ẹka ono Peniyèlù^b sù: “Noo lẹ mu hùmaru Chileke iphu l'iphu; bya anọdukwadu ndzù.”

31Jiékòpu bya l'aghata Peniyèlù; ẹnyanwu wawaa. Ò nọdu ete ọkpa; ọ bùru nka ono, kpọkafuru iya nù ono kparù iya. 32Noo iphe, kparù iphe e -shi teke ono rwua ntanù-a bè ndu Ízùrèlù ta atajèdu anù, nmọpfuru lẹ nka. Noo kẹle ọọ l'ẹka ono bè a rwùru Jiékòpu ẹka ọbu.

Jiékòpu yẹle Iso edzuda

33 1Jiékòpu jeshia ele ẹnya; ọ hùma Iso ẹka epehe l'unu ọmadzu, ọ chi, eje abya. Ò bya eworu ọnwegirima iya keeru Lii; yee Rechièlù; yee ọnwanyi labọ ọphuu, bù ohu iya ono. 2O duru ọnwanyi labọ ono, bù ohu ono; yee ọnwu pẹ dobe l'ivuzọ. O dotsota pẹ Lii yee ọnwu iya; bya eworu Rechièlù yee Jiósefu dobe l'ikpazu. 3Yẹbedua vuta ọzo jeru jepfushia nwune iya ono; bya ephozeru iya ishi mgbo ẹsaa lẹ g'ooje ejepfu iya ono.

4Noo ya; Iso gbpfu Jiékòpu je anmata iya akpa. Ò bya eworu ẹka gbakua ya l'olu bya etsutsua ya ọnu. Epehe tuko wa ẹkwa. 5Iso jeshia apali ẹnya imeli; bya ahuma ọnwanyi ono; yee ọnwegirima ono; bya ajia ya sù: “?Bù ndu ole bè unu l'ẹpehe swi ono?”

Jiékòpu sù iya: “Ò kwa ọnwegirima, Chileke nuru mube onye-ozì ngu shita leze-iphe-ọma nkiya.”

6Ọnwanyi ono, bù ohu ono; yee ọnwegirima pẹ bya abyarwuta; bya ephozeru iya ishi. 7Lii yee ọnwegirima ibe iya bya abyarwuta bya ephozeru iya ishi. O -rwua l'ikpazu iya; Jiósefu yee Rechièlù bya ephozekwaru iya pọ ishi.

8Iso jia sù: “?Bù gùnu bè ndu k'ọphuu, epehe l'iya dzuru l'uzo pọ bù?”

Ò sù iya: “Ò bù nupho iphe, mu nuru ngu gude eme gẹ mu tuba gube nnajjuphu mu l'obu.”

9Obenu lẹ Iso sùru iya: “Waawaa. Nworuro iphe ngu; ọphu mu nweru dụ-a shii.”

10Jiékòpu sù: “E phokwaro! Ò -bùru lẹ mu dụ ngu l'obu; jiko natanù iphe ono, mu nuru ngu ono! Ahuma iphu ngu dụ g'onye eje ahuma iphu

^a 32:28 Iphe, Ízùrèlù bù bè bù ‘Onye yee Chileke agba mgba.’ ^b 32:30 Iphe, Peniyèlù bù bè bù ‘Íphù Chileke’.

Chileke; eshinu i gude obu-oma nata mu. ¹¹Jiko nataro iphe ono, e wotaru ngu ono; noo kele Chileke meru mu eze-iphe-oma; mu nwekotaru iphe, mkpa iya duru mu.” Jiékòpu rwonyakpoephe; Iso nata iya.

¹²Iso su: “Unu g'anyi je! G'anyi l'unu tuko swiru!”

¹³Jiékòpu su iya: “Nnajiuphu; i maru l'unwegirima-a be okpu teke eshihudu ike. Temu mu emekwapho ge mu chikobe aturu waa eswi mu, nwushiru nwa k'ophuu. O -buru l'a chiru phe l'ehuka bu-a ujiku ophu be ephe a-nwushihukota. ¹⁴Oo ya bu; nnajiuphu; vururo onye-ozu ngu uzol! Mu a-tokpoephe nwehu etso ndu ono, no l'ivuzo achu iphe-edobe ono; waa unwegirima gbiriri jasu mu abyapfuta ngu le Siye.”

¹⁵Iso su: “Ge mu haphoduru ngu unwoke mu g'unu l'ephe swiru.”

Jiékòpu jia su: “?Bukwanu gunu be ijero eme nno? O bu-a ge mu maru eviya le mu du nnajiuphu mu l'obu.”

¹⁶Oo ya bu; Iso gbeshi mboku ono; o buru iya ala Siye. ¹⁷Jiékòpu swia uzo Sukotu; o jerwua Sukotu bya akpa unuphu l'eka ono; bya aturu iphe-edobe iya mkpu. Noo iphe, kparu iphe, a guberu eka ono Sukotu.^c

¹⁸Jiékòpu shiepho Padanu-Aramu; lwarwuta le nchi-odoo le mkpu-kpu Shekemu l'ali Kenu; bya eburu l'atatiphu mkpukpu ono. ¹⁹O gude ukporo mkpola-ochaa ise zuta unwu Hamo; mbu nna Shekemu ali eka o kporu ulo-ekwa iya. ²⁰O bya eworu oru-ngweja kpa l'eka ono; kua ya “Chileke, bu Chileke ke ndu Izurelu.”

Dayina yele ndu Shekemu

34 ¹Noo ya; Dayina, bu nwada, Lii nwutaru Jiékòpu; kpapfushia unwanyi ndu ali eka ono. ²Shekemu, bu nwatibe Hamo onye Hevu, bu eze ndu onu egu ono humae ya pho; o duta iya; ephe l'ia kwaa; o pharwushia ya. ³Dayina; mbu nwada Jiékòpu la iya l'ehu; o yee ya obu; bya emeaharu iya emereme. ⁴Shekemu su nna iya, bu Hamo g'o lutaru iya nwamgboko ono g'o buru nyee ya.

⁵Jiékòpu numa le nwada iya, bu Dayina be a pharwushiaru; ophu o dudu iphe, o meru jasu ndibe iya lwa; kele teke o numaru iya be ephe no legu eche iphe-edobe iya.

⁶Oo ya bu; Hamo, bu nna Shekemu je g'ephe le Jiékòpu pfugbabu. ⁷Unwu Jiékòpu numaephe iphe, nwuru nu bya alwatashia. Aphu yee ehueghu ji phe obu; noo kele Shekemu meru iphe-iphere kpa ndu Izurelu; kele o jefuru nwada Jiékòpu, bu iphe, agbaduru g'o nwua.

⁸Hamo su phe: “Nwa mu, bu Shekemu be obu iya du le nwada unu-a. Jiko unu kenaa ya ya g'o luru. ⁹G'anyi l'unu lugbaru nwanyi. Unu keje anyi nwada unu; unu alutaje k'anyi. ¹⁰Unu eburu l'echilabo anyi. Ali dabyikpoerupho iphoronoduru unu. Unu eburu iya; anyi l'unu azugba aswa; unu anodu iya kpata eku.”

^c 33:17 Iphe, Sukotu bu be bu eka a tushiru 'mkpu'.

¹¹ Ọo ya bụ; Shẹkemu sụ nna Dayina; yẹe unwune iya: “Unu kwenu lẹ mu dū unu l'obu; iphe, unu sụkpoerupho gẹ mu nū unu bẹ mu a-nū unu. ¹² Unu hũa aswa nwada unu; yẹe iphe-oma, mu e-meru unu jasụ g'ọo-dụ-be unu ree. Iphe, bụ iphe, unu sụru gẹ mu kwaa bẹ mu a-kwaru unu. Ọo ẹpho g'unu kee mu nwamgboko-a gẹ mu luru.”

¹³ Eshinu a pharwushiwaru Dayina apharwushi bẹ unwu Jiékoṣu yeru Shẹkemu; yẹe nna iya onu ẹregede. ¹⁴ Ẹphe sụ phe: “Tuswekwa! Anyi ta abyakwa eme iphe, dū nno. Anyi te ewokwaru nwada anyi eke nwoke, ebuduru úbvù. Ọo-bukwaru anyi iphe-iphere. ¹⁵ Iphe, e-meepho; anyi ekweta bụ g'unu dū g'anyi dū; mbụ g'iphe, bụ nwoke lẹ ndu unu bushikọta úbvù. ¹⁶ Ọo ya bụ; anyi ekee unu nwada anyi; anyibedua alutaaha nwada unubedua. Anyi l'unu ebua ẹghirigha; bya aburu iphe lanu. ¹⁷ Obe-nu l'ọ -buru l'unu te ekwedu l'unu e-bushi úbvù; anyi eduta nwada anyi; tẹme anyi alakwapho.”

¹⁸ Iphe ono, ẹphe pfuru ono dū Hamo yẹle nwa iya, bụ Shẹkemu ree. ¹⁹ Ophu nwokoroṣya ono, bụ iya bụ onye a kakọta akwabẹ úbvù l'ibe nna iya l'ophu ono akpọduru upfu eme iphe ono, ẹphe pfuru ono. Kẹle nwada Jiékoṣu dū iya l'obu. ²⁰ Ọo ya bụ; ẹphe tugbua; mbụ Hamo yẹe nwa iya, bụ Shẹkemu jeshia l'oguzo mkpukpu phe; g'ẹphe je epfuaru iya unwoke, bu lẹ mkpukpu ono. ²¹ Ẹphe jerwua bya asụ phe: “Ndu-a bẹ umere phe dukwa ree. Aa-hakwa phe g'ẹphe buru l'alị anyi; nọdu iya agba ngho; eshinu alị, ha ọsa nọduru phe. Anyi a-nọdu alu unwada phe; ẹphe alu k'anyi. ²² Ọle tẹme ndu ono ekwe buru l'echilabọ anyibe ndu Shẹkemu bụ m'ọ buru l'unubẹ unwoke kwetarụ bushia úbvù; dū g'ẹphebedua dū. ²³ ?Unu ta amadu l'iphe-edobe waa ẹku phe; waa iphe, bụ anu, ẹphe nweru enweru a-buru k'anyi? Ọo ya bụ; unu g'anyi kweta iphe, ẹphe pfuru g'ẹphe eburu l'echilabọ anyi.”

²⁴ Unwoke, lufutakotaru l'oguzo mkpukpu ono kwetakọta iphe, Hamo yẹe nwa iya pfuru. Unwoke, bu lẹ mkpukpu ono bya ebushikọta úbvù g'ẹphe ha.

²⁵ A noepho ujiku ẹto, ẹphe buru úbvù ono; g'ẹphe anyakwadu ọnyá úbvù ono; unwu Jiékoṣu ẹbo, ndu ophu yẹle Dayina shi lẹ ne lanu, bụ iya bụ Simiyonu; waa Lívayi gbeshi bya amita ogu-echi phe bahu lẹ mkpukpu ono je atuko unwoke mkpukpu ono g'ẹphe ha gbuẹbe l'otulupfu. ²⁶ Ẹphe gbua Hamo; yẹe nwa iya, bụ Shẹkemu; bya eduta Dayina l'ulo ibe Shẹkemu tugbua; ọ buru phe alala. ²⁷ Unwu Jiékoṣu bya adajaa l'echi odzu ono; bya akwata iphe, ndu mkpukpu ono, pharwushiru nwune phe ono l'okwata. ²⁸ Ẹphe kputa aturu waa egu phe; waa eswi phe; waa nkafu-igara phe; bya atuko iphemiphe, bukota kẹ ndu mkpukpu ono gwetakọta; mbụ gwetachaa ndu ophu nọ l'oma mkpukpu; mẹ ndu ophu nọ l'egu. ²⁹ Ẹphe gwetakọta ẹku phe; waa unwanyi phe; yẹe unwegirima phe; bya atuko iphemiphe, nokota l'ulo phe gweta.

³⁰Tɔ̀budu iya bụ; Jiékpọ̀ sụ Simiyọ̀nu; yẹe Lívayi: “Ègube iphe-ẹ̀huka ọ̀phu unu wobatakwanụ̀ru mu nta-a! Nta-a bẹ̀ unu meru gẹ̀ mu bụ̀ru onye eshi ndu Kénanu; yẹe ndu Pérezu ishi; mbụ̀ ndu bu l’alị-a. ?Ọ̀ kwa l’unu maru-a l’anyi parụ̀ nwanshiji? Ọ̀ -bụ̀ru l’ẹ̀phe chigbaberu onwophe byapfuta mu ọ̀gu bẹ̀ mu lẹ̀ ndibe mu a-bụ̀kwaru mkpurupyata!”

³¹Èphe sụ: “?Ọ̀ gbakwanụ̀ru g’ẹ̀phe mee nwune anyi nwanyi gẹ̀ nwanyi-ovuoba?”

Jiékpọ̀u alwaphuta azụ̀ lẹ̀ Bẹ̀telu

35 ¹Ọ̀o ya bụ; Chileke sụ Jiékpọ̀u: “Kwalita lashia mkpukpu Bẹ̀telu je eburu. I -rwua l’i kpọ̀aru mụ̀be Chileke ọ̀ru-ngweja; mbụ̀ mụ̀be Chileke ono, byapfutaru ngu l’ẹ̀ka ono; teke iḡbalaru nwune ngu, bụ̀ Iso-a.”

²Ọ̀ bụ̀ru iya bụ; Jiékpọ̀u sụ ndibe iya; waa ndu ẹ̀phe l’iya bu: “Unu lwua iphe, bụ̀kpoo agwa, unu gude; unu emee onwunu g’unu dụ̀ nso; unu agbanwee uwe unu. ³Ọ̀o ya bụ; unu agbeshi g’anyi je Bẹ̀telu gẹ̀ mu je akpọ̀aru Chileke ọ̀ru-ngweja l’ẹ̀ka ono, bụ̀ iya bụ̀ onye ono, nūmaru olu mu teke mu nọ̀ l’aphụ; bya aburu onye ono, nọ̀-kuberu mu l’ẹ̀kameka ono, ya jekotaru ono.” ⁴Noo ya; ẹ̀phe tũko agwa ono, ẹ̀phe gude ono; yẹe iphe-nchị, ẹ̀phe yeru lẹ̀ nchị yeshia chiru nụ̀ Jiékpọ̀u; o likota lẹ̀ mkpula akpūrata, nọ̀ lẹ̀ mgboru mkpukpu Shẹ̀kemu. ⁵Èphe gweta tũgbua; ndzụ̀-aguḡu, shi l’ẹ̀ka Chileke rwupyabẹ̀ mkpukpu ọ̀phu nọ̀-phegbaaru pẹ̀ mgburugburu; k’ọ̀phu bụ̀ l’o tọ̀ dudu g’ẹ̀phe ha, jeru achị ndibe Jiékpọ̀u ono ọ̀so.

⁶Jiékpọ̀u yẹe ndu ẹ̀phe l’iya swi bya ejerwua mkpukpu Luzu, bụ̀ iya bụ̀ Bẹ̀telu, nọ̀ l’alị Kénanu. ⁷Ọ̀ bụ̀ru l’ẹ̀ka ono bẹ̀ ọ̀ kpuru ọ̀ru-ngweja; bya agwa ẹ̀ka ono Elu Bẹ̀telu. Noo l’ọ̀o ẹ̀ka ono bẹ̀ Chileke goshiru iya onwiya lẹ̀ g’oḡbalaru nwune iya.

⁸No iya; Debora, bụ̀ onye shi eleta Ribeka ẹnya nwuhu; e lia ya lẹ̀ mkpula upfu akpūrata lẹ̀ nsuda Bẹ̀telu. Ọ̀o ya bụ; a gwa ẹ̀ka ono Alọ̀nu Bakutu.^d

⁹Jiékpọ̀u shichaepho Padanu-Arámu lwa; Chileke byapfuta iya ọ̀zo bya agoru ọ̀nu-oma nụ̀ iya. ¹⁰Chileke sụ iya: “Èpha ngu bụ̀ Jiékpọ̀u; ọ̀le ẹ̀pha ngu ta abuheduru Jiékpọ̀u; ẹ̀pha ngu a-buru Ízurelu.” Ọ̀o ya bụ; ọ̀ gwa ya Ízurelu.

¹¹Chileke sụ iya: “Ọ̀o mbẹ̀dua bụ̀ Chileke, bụ̀ Ọ̀kwoolemka. Unu zua azuzụ̀ ka l’otu. L’iimeta ndu a-buru oha ẹ̀ka pẹ̀; bya emetakwapho ohamoha ọ̀zo yekoberu pẹ̀. Ndu eze eshi ngu l’ehu futa. ¹²Alị ono, mu nuru Ébirihamu; waa Áyizaku bẹ̀ mu nūkwaru ngu pho; teme mu nūkwa iya pho unwu nwanwanwaranwa ngu.” ¹³Chileke shi l’ẹ̀ka ọ̀ nọ̀ pfuru yeru iya ono tũgbua ephekerephe.

^d 35:8 Iphe, ọ̀ futaru bẹ̀ bụ̀ ‘Achị ụ̀zu-ekwa’.

¹⁴Jiékpọpu bya apalia mkpuma p̄fube l'ẹka ono, Chipfu nọ pfuru yeru iya ono; bya ekpua ya m̄e l'eli; kpua ya manụ gude gwaa Chileke. ¹⁵Jiékpọpu ḡa ẹka ono, Chileke nọ pfuru yeru iya ono B̄etelu.

Anw̄uhu Rechīelu ȳe Áyizaku

¹⁶Ẹphe shi l̄e B̄etelu t̄uḡbua. Ẹphe rwujēpho mgboru Ifurata; ime meahaa Rechīelu. Ezeda iya kwatak̄p̄o ts̄uahaa ya l'̄ehu. ¹⁷L̄e teke ono, iphe shih̄uru ike g'oom̄e zeda ono b̄e n̄wanyị, eswi iya ime s̄uru iya: “Ḡe ndz̄u ba aḡushi ngu. Ọ kwa nwa n̄woke ọzo b̄e ị n̄wuru.” ¹⁸Ọ bya l'atubuhu unme k'anw̄uhu; ọ ḡa nwa iya n̄woke ono Benoni. E mechaa; nna iya ḡa ya Benjiaminu.

¹⁹Noo ya; Rechīelu n̄w̄uhu; e lia ya l'uzo Ifurata, b̄u iya b̄u B̄etulehemu. ²⁰Jiékpọpu swita mkpuma p̄fube l'eli ilu iya. Mb̄u byas̄u n̄tan̄-a b̄e mkpuma ono n̄okwapho l'ẹka ono egoshi l'oo ilu Rechīelu.

²¹Ízurēlu t̄uḡbukwa ọzo; bya eje akp̄obe ọlo-ẹkwa iya l'azu ọlo-ephekerephe, b̄u Eda. ²²Ọ b̄uru l̄e teke Ízurēlu bu l'alị ẹka ono b̄e Rúb̄enu jepfuru nyee nna iya, nna iya ta al̄udu ọkpobe al̄ulu, b̄u Biliha. Nna iya, b̄u Ízurēlu n̄uma iya.

Jiékpọpu n̄w̄utaru unwoke iri l'̄ebo.

²³Unwu k̄e Lii b̄u: Rúb̄enu, b̄u iya b̄u ọkp̄ara Jiékpọpu; waa Simiyonu; waa Lívayị; waa Jiuda; waa Isaka; t̄eme waa Zebulon̄u.

²⁴Unwu k̄e Rechīelu b̄uru Jiósefu waa Benjiaminu.

²⁵Unwu k̄e Biliha, b̄u ohu Rechīelu b̄uru Danu waa Naf̄utali.

²⁶Unwu k̄e Zilipa, b̄u ohu Lii b̄uru Gadu waa Asha.

Ọ b̄uru ndu ono ḡephe ha b̄u unwu, a n̄w̄ushikotaru Jiékpọpu l'alị Padanu-Arámu.

²⁷Jiékpọpu lwapfuta nna iya, b̄u Áyizaku l̄e Mamure, nọ l̄e mgboru Kiriyaṭu-Araba, b̄u iya b̄u H̄eburonu; l'ẹka Ébirihamu ȳe Áyizaku shi t̄uko b̄uru. ²⁸Áyizaku n̄oru ọkp̄oro apha tete. ²⁹Ọo ya b̄u; ọ t̄ua unme ikpaz̄u iya; ọ b̄uru iya anw̄uhu. Ọ lapfu ndiche ph̄e l̄e g'ọ kah̄ucharu; bya an̄o apha, d̄u igwerigwe. Unwu iya, b̄u Jiékpọpu ȳe Iso woru iya lia.

Oshilokpa k̄e Iso

36 ¹Waa oshilokpa Iso, b̄u iya b̄u Edomu baa:

²Iso l̄uru un̄wanyị ndu K̄enanu. Ẹpha ph̄e b̄u Ada, b̄u nwada Elonu, onye Hetu; waa Oholibama, b̄u nwada Ana; bya ab̄uru nwanwa Zibiyonu, onye Hevu; ³wakwapho Basumatu, b̄u nwada Ishim̄elu; bya ab̄uru nwune Nebayotu.

⁴Ada n̄w̄utaru Iso Elifazu; Basumatu n̄w̄utaru iya Ruw̄elu; ⁵Oholibama n̄w̄utaru iya Jiwushi; waa Jielamu; waa Kora. Ndu ono b̄ukota unwu Iso; ọ b̄uru l'alị K̄enanu b̄e a nọ n̄w̄ushiru iya ya.

⁶Iso bya eduta unyomu iya; waa unwu iya unwoke; ȳe k̄e n̄wanyị; m̄ekpoo iphe, b̄ukota ndibe iya g'ephe hakota; t̄eme waa iphe-edobe iya;

waa anu iya ndu ozo; mekpoo eku, o kpatakotaru le Kenu g'o ha; gude lashia ali eka du enya; me a -gbe l'eka nwune iya Jieko bu. ⁷Eku phe pawaru eka; k'ophu o daghawaru g'ephe atuko buru l'eka lanu. Kele iphe-edobe phe ono meru; ophu ali eka ono asuedu phe ebubu. ⁸Oo ya bu; Iso, bu iya bu Edomu je eburu l'oha ubvu Siye.

⁹Wa oshilokpa Iso, bu nna ndu Edomu l'oha ubvu Siye baa:

¹⁰Waa epha unwu Iso baa: Elifazu, bu iya bu nwa nwoke, Ada, bu nyee Iso nwutaru iya; waa Ruwelu, bu iya bu nwa nwoke, Basumatu, bukwapho nyee Iso nwutaru iya.

¹¹Unwu nwa nwoke ke Elifazu bu Temanu; waa Omaru; waa Zefo; waa Getamu; teme waa Kenazu.

¹²Nwa Iso; mbu Elifazu nweru nyee ya ophu o too ludu okpobe alulu, epha iya bu Timuna. Nwanyi ono nwutaru iya nwa nwoke, aza Amaleku. Ndu ono bukota unwu nwanwa Ada, bu nyee Iso.

¹³Unwu nwa nwoke ke Ruwelu bu: Nehatu; waa Zera; waa Shama; teme waa Miza. Ndu ono bukota unwu nwanwa Basumatu, bu nyee Iso.

¹⁴Unwu Oholibama, bu nyee Iso; mbu nwada Ana bya aburu nwanwa Zibiyonu nwutaru Iso bu: Jiwushi; waa Jielamu; teme waa Kora.

¹⁵Waa ndu-ishi l'oshilokpa Iso baa. Okpara Iso, bu Elifazu nwuru ndu-ishi, bu: Temanu; waa Omaru; waa Zefo; waa Kenazu; ¹⁶waa Kora; waa Getamu; teme waa Amaleku. Ndu ono bu ndu-ishi ali Edomu, shi l'eri Elifazu. Epe bu unwu nwanwa Ada.

¹⁷Ruwelu, bu nwa Iso, nwuru ndu-ishi, bu Nehatu; waa Zera; waa Shama; teme waa Miza. Ndu ono bu ndu-ishi ali Edomu ndu ophu shi l'eri Ruwelu. Epe bu unwu nwanwa nyee Iso, bu Basumatu.

¹⁸Oholibama, bu nyee Iso nwuru ndu-ishi, bu Jiwushi; Jielamu; teme waa Kora. Ndu ono bu ndu-ishi ndu ophu shi l'eri nyee Iso, bu Oholibama, bu nwatibe Ana.

¹⁹G'ephe hakota ono bu unwu Iso, bu iya bu Edomu; bya aburu phe bu ndu-ishi phe.

²⁰Waa unwu Siye, onye Huru, bu onye nwe ali ono baa: Lotanu; waa Shobalu; waa Zibiyonu; teme waa Ana; ²¹waa Dishonu; waa Eza; teme waa Dishanu. Unwu Siye ono, bu l'ali Edomu ono bu ndu-ishi ndu Huru.

²²Unwu Lotanu bu Hori; waa Homamu. Timuna bu nwune Lotanu ke nwanyi.

²³Unwu Shobalu bu Aluvanu; waa Manahatu; waa Ebalu; waa Shefo; teme waa Onamu.

²⁴Unwu Zibiyonu bu Aya; waa Ana. Ana k'owa-a bu onye ophu humaru nggele, ekpo oku l'echiegu teke o shi eche nkafu-igara nna iya, bu Zibiyonu.

²⁵Unwu Ana bu Dishonu; waa Oholibama, bu nwada iya.

²⁶Unwu Dishonu buru Hemudanu; waa Eshubanu; waa Ituranu; teme waa Keranu.

27 Ụnwu Eza bụ Bilihanu; waa Zevanu; ịme waa Ekanu.

28 Ụnwu Dishanu bụ Uzu; waa Eranu.

29 Ndu bụ ndu-ishi ndu Hōru bụ: Lotanu; waa Shobalu; waa Zibiyōnu; waa Ana; 30 waa Dishōnu; waa Eza; ịme waa Dishanu. Oo ẹphebēdua bụ ndu-ishi ndu Hōru; e -shi ị g'ẹphe gude kekashia onwophẹ l'alị Siye ọbu.

Ndu bụ eze l'alị ndu Edōmu

31 Ọwa-a bụ ndu vuadaru ụzo buru eze ndu Edōmu; ịme o nwejeru onye shi ị Ịzuru ị bya aburu eze:

32 Bela, bụ nwatibe Beyo bẹ bụ eze ndu Edōmu. Mkpukpu iya aza Dinuhaba.

33 Bela nwuhuepho; Jiobabu, bụ nwatibe Zera, bụ onye shi Bozura bya aburu eze l'onodu iya.

34 Jiobabu nwuhuepho; Hushamu, bụ onye shi l'alị Temanu bya anochia ẹnya iya buru eze.

35 Hushamu nwuhuepho; Hadadu, bụ nwatibe Bedadu, bụ onye lwu-kperu ndu Midiyanu l'alị Mowabu; bya aburu eze l'onodu iya. Mkpukpu nkiya aza Avitu.

36 Hadadu nwuhuepho; Samula, bụ onye shi Masureka bya anochia ẹnya iya buru eze.

37 Samula nwuhuepho; Shawulu, bụ onye shi Rehobotu, no l'uzo onu ẹnyimu Yufurētisu; bya aburu eze no-chia ẹnya iya.

38 Shawulu nwuhuepho; Belu-hananu, bụ nwatibe Akubo bya aburu eze l'onodu iya.

39 Belu-hananu, bụ nwatibe Akubo nwuhuepho; Hadadu bya aburu eze l'onodu iya. Epha mkpukpu iya buru Pawu; epha nyee ya buru Mehetabalu, bụ nwada Maturedi. Maturedi bukwanuru nwada Mezahabu.

40 Waa epha ndu-ishi l'oshilokpa Iso baa; wakwapho okpa-ipfu; yee ohamoha, epe shigbaa, l'azagbaa epha phe baa. Timuna; waa Aluva; waa Jietetu; 41 waa Oholibama; waa Ela; waa Pinonu; 42 waa Kenazu; waa Temanu; waa Mibiza; 43 waa Magudelu; ịme waa Iramu. Ndu-a g'ẹphe ha bụ ndu-ishi ndu Edōmu; ị g'ẹphe gude bua l'alị ono, epe lwaru ono.

Epe bụ ndibe Iso, bụ nna ndu Edōmu.

Nrwo, Jiósefu rwo

37 1 Oo ya bụ; Jiéko pu buru l'alị ono, nna iya shi buru, bụ iya bụ alí Kénanu.

2 Waa oshilokpa Jiéko pu.

Gẹ Jiósefu noerupho apha iri l'esa bẹ o shi etsojeru unwunna iya eche aturu; mbu unwu nyee nna iya, bụ Biliha; waa Zilipa. O dooru nna phe ejo-ipe, unwunna iya ndu ophuu anoduje eme.

3 No iya; Ịzuru ka eye Jiósefu obu eme ị g'o yeru unwu iya ndu ophuu. Ipe, kparu iya nu buru l'oo nwa, a nwuru iya ị nka. O bya

akwaaru Jiósefu eguru uwe, ama ntumatu, chikashiru mkpo. ⁴Unwunna iya maerupho le nna phe ka iya eye obu eme le g'o yeru ephebedua; ephe kpoo ya ashi; ophu ephe epfujeheduru opfu oma eyeru iya.

⁵Tobudu iya bu; Jiósefu rwoo nrwo bya ezeeru unwunna iya ono nrwo ono. O mee; o kabakpoo phe ro adu ashi. ⁶O suru phe: "Unu gebe ge mu zeeru unu nrwo, mu rworu. ⁷Anyi esweshi upfu ereshi esweshi l'egu. A nonyaa; upfu ereshi nkemu gbalihu pfuru nhamunha; upfu iya k'unu bya anophee nkemu mgburugburu phozegbaaru iya."

⁸Unwunna iya su iya: "?Iiri l'ii-mechaa buru eze anyi too? Mbua-a; ?bu-waa ngu e-mecha buru onye-ishi anyi?" Nrwo ono, o rworu ono; yee opfu ono, o pfuru ono mee; o kabakpoo phe ro adu ashi.

⁹No iya; o byakwa arwo nrwo ozo; bya ezeeru unwunna iya ono ozo. Ono be o suru phe: "Unu gebe ge mu zeeru unu nrwo ozo, mu rworu. Ogiya-a be mu rworu g'enyanyu; waa onwa; waa kpokpode iri le nanu bya ephozeru mu ishi."

¹⁰O zeeru iya pho nna iya g'o zeru iya unwunna iya; nna iya baaru iya mba su iya: "?Iphe owa-a, iirwo owa-a bu gunu? ?Bu le ne ngu; waa mbedia, bu nna ngu; waa unwunna ngu be e-mecha bya ephozeru ngu too?" ¹¹Unwunna iya jaharu iya ijanya; obenu le nna iya kwakoberu iphe ono l'okpoma.

Unwunna Jiósefu ere iya

¹²Noo ya; unwunna iya chita aturu nna phe jeshia echeche le mgboru mkpukpu Shekemu. ¹³Oo ya bu; Izurelu su Jiósefu: "Eshi ophu i maru l'unwunna ngu eche aturu le mgboru Shekemu bukwa gi bya ge mu zia ngu gi je agbaphe phe."

Jiósefu su nna iya l'o du ree.

¹⁴Oo ya bu; o su iya: "Jiko jenu je agbaphee unwunna ngu phe; yee aturu phe; maru ?ehu duchaa phe-a ree? L'ilwa bya akaru mu g'o du." O buru le nsuda Hiburunu be o no zia ya ozi obu. O tugbua jeshia; bya ejerwua Shekemu.

¹⁵O nweru nwoke humaru iya l'eka oogha-phe l'egu eka ono; bya ajia ya su: "?Bu gunu be icho?"

¹⁶O su iya: "Mu elekwa enya unwunna mu. O -buru l'i maru eka ephe no eche aturu phe; jiko tunuru mu onu iya."

¹⁷Nwoke ono su iya: "Ephe shiakwa l'eka-a tugbuwa. Mu numakwaru teke ephe shi epfu su g'ephe je Dotanu."

Oo ya bu; Jiósefu chooru unwunna iya jeshia; je ahuma phe le mgboru Dotanu. ¹⁸Ephe levukpoo ya ro teke o nokwadu uzanya; bya awata achidzu g'ephe e-shi gbua ya.

¹⁹Ephe su nwibe phe: "O-rwo-nrwo-a abyaje-o! ²⁰Unu bya nta-a g'anyi gbua ya chie le nsu lanu l'eka-a. E -mechaa; anyi asu l'oo anu-egbudu gburu iya. G'anyi mawaruro ge nrwo iya ono e-me vua."

²¹Rúbènu nūmae ya phọ bya emeahaa g'ọ gbafuta iya. Ọ sụ phẹ: “Unu g'anyi te egbushi iya egbugbu. ²²G'anyi be gbushi ọchi. G'anyi chiechia ya lẹ nsụ lanụ l'echiegu l'ẹka-a; g'anyi te edenyikwa iya ẹka.” Iphe, Rúbènu gude pfua ya bụ g'ọ dzọọ ya duta iya duphuru nna iya azụ ọzo.

²³Jiósèfu byarwutaepho ẹka ụnwunna iya ono nọ; ẹphe gude iya yefu iya eguru uwe ono, o yeru ono, chikashiru mkpọ ono; ²⁴bya akputa iya je echie lẹ nsụ. Nsụ ọbu ta adudu iphe, dū iya nū; ọphu mini adudu iya.

²⁵Ephe nọ-zetaepho anọo wata eri nri; ẹphe jeshia ele ẹnya bya ahụma ndu ije, shi l'eri Ishimelu; ẹka ẹphe shi l'alì Giladu; ẹphe l'inya-kamelu phẹ; vuru manụ, eshi mkpọ; waa ụnwù, eshikwaphọ mkpọ; waa àrwù, bụ mēru eje ala alì Ijiputu.

²⁶Jiuda sụ ụnwunna iya: “?Bụ urwu gūnu bẹ anyi e-rita iya m'ọ buri l'anyi gburu nwanna anyi bya eworu mee ya domia? ²⁷Unu g'anyi ree ya oshilokpa Ishimelu. G'ọ tọ dukwa iphe, anyi e-je iya ememe; eshi ọphu ọ bụ nwanna anyi; tēme anyi buri mee lanụ.” Ụnwunna iya kweta.

²⁸Ndu Midiyanu ono, agba nghọ ono ghatashiepho; ụnwunna Jiósèfu bya ekufuta iya lẹ nsụ ono; woru iya ree oshilokpa Ishimelu ono ụkporo ẹkpa-ego mkpọla-ọchaa. Ephe kputa iya lashia Ijiputu.

²⁹Rúbènu byaepho lẹ nsụ ono bya ahuma lẹ Jiósèfu ta nọedu iya; o gude ẹhu-eghu woru uwe iya gbajaa. ³⁰O jepfu ụnwunna iya phẹ je asụ phẹ: “Nwata ono ta nọekwa l'ẹka e chieru iya. ?Bukpoo awe bẹ mu e-dobe iphu?”

³¹Noo ya; ẹphe bya achita uwe Jiósèfu bya egbua egbu; woru uwe Jiósèfu ono tsee lẹ mee ya. ³²Ephe chita uwe ono, chikashiru mkpọ ono chiphuru nna phẹ azụ; sụ iya: “Anyi humakwaru iphe-a l'uzo; lekwa ya ẹnya g'i maru ?bụ kẹ nwa ngu tọo tọ bụdu iya?”

³³Jiékopu bya elee ẹnya; ọ buri iya. Ọ sụ: “Ọ kwa uwe nwa mu-o! Ọ dukwa g'ọ bụ anụ-egbudu gburu iya. Oowaa! Nta-a bẹ Jiósèfu bẹ anụ-egbudu lajashiakwaru nanụ nanụ!”

³⁴Jiékopu woru uwe iya gbajaa; bya achita uwe aphụ yee onwiya; bya araa ẹkwa nwa iya ono ujiku olemole. ³⁵Ụnwu iya k'unwoke; mē ụnwada iya bya g'ephe dūa ya obu. Ọphu o kwedu g'a duta iya. O pfua sụ: “Mu agukwa aphụ nwa mu-a jasụ mu alapfu iya lẹ maa.” Ọ buri egube ono bụ gẹ nna iya gude gūa aphụ iya.

³⁶No iya; ndu Midiyanu ono woru Jiósèfu ree Potifa l'alì Ijiputu. Potifa ono bụ onye lanụ l'ime ndu Fero nuru oke-okwa; kẹle ọ bụ ishi ndu ojogu, eche Fero nche.

Jiuda yele Tema

38 ¹Lẹ teke ono bẹ Jiuda haru ụnwunna iya je; ẹphe lẹ nwoke Adu-lamu, aza Hira buru. ²Ọ buri l'ẹka ono bẹ Jiuda nọ hūma nwada nwoke Kėnanu, ẹpha iya bụ Shuwa. Ọ lūta iya; ẹphe l'iya kwaa. ³Ọ tsuta

ime; bya anwua nwa nwoke a guru Eru. ⁴Ọ tsuta ime ozo; bya anwua nwa nwoke; bya agua ya Onanu. ⁵Ọ bya anwufua nwa nwoke lanu; bya agua ya Shela. Ọ buru le Kezibu be o no nwua ya.

⁶Jiuda bya alutaru okpara iya bu Eru, nwanyi. Epha nwanyi ono bu Tema. ⁷Obenu le Eru, bu okpara Jiuda bu onye eme ejo-iphe l'enya Chipfu. Ọo ya bu; Chipfu woru iya gbua.

⁸Ọo ya bu; Jiuda su Onanu: "Duta nyee nwune ngu g'unu l'iya kwaa. Luru iya g'iishi nno togboru nwune ngu ako le mgboko." ⁹Obenu le Onanu maru le nwa, nwanyi ono a-nwuta ta abuduru nkiya. Ọ nodu abujeru; yee nyee nwune iya -nodu akwa; l'ogboshia unwuda l'ali g'eeshi ge nwune iya ta togbo ako. ¹⁰Iphe ono, oomeje ono buru ejo-iphe l'iphu Chipfu; o wokwaru iya pho gbua.

¹¹E mecha; Jiuda su nyee nwa iya, bu Tema g'o laa ibe nna iya je eburu eburu kwabe jasu teke Shela, bu nwa iya evuta. Kele o riru su: "?A maru ?onye k'ono ta anwuhudunu g'unwune iya ndu ophuu nwuhuru." Tema kwe hm laa ibe nna iya je eburu.

¹²A nonyakpoepo; nyee Jiuda, bu nwada Shuwa nwuhu. Jiuda rokotachaepo ike l'anwuhu nyee ya ono; bya ejeshia Timina; l'eka eebushiru iya aturu iya eji. Onya iya, bu Hira, onye Adulamu tsoru iya.

¹³A bya edooru iya Tema le nna ji iya ejekwa Timina je ebushi aturu iya eji. ¹⁴O kweepo doo yefu uwe nwanyi, no l'ulo-maa, o yeru; bya eworu gerebe gerebe ekwa phua onwiya l'iphu g'a ta hube iya ama; bya eje anodu lonu-abata, e shi abahu Enemu, bukwapo uzo, e shi eje Timina. Kele o maru le Shela vutawaru; obenu l'e te kuduru iya g'o bya g'o lupyabe iya ge ya buru nyee ya.

¹⁵Jiuda huma Tema; bya aria l'oo nwanyi-ovuoba; noo kele o phuchiru onwiya iphu; ¹⁶ophu o madu l'oo nyee nwa iya. O duta iya je laguga gbororo bya asu iya g'o bya g'ephe l'iya je akwaa.

Ọ jia ya su: "?Bu gunu be ji-nu mu g'anyi le ngu kwaa obu?"

¹⁷Ọ su iya: "Mu e-shi l'iphe-edobe mu kpee ngu ada-eghu."

O kwe iya hm; bya asu iya: "?Ii-yekwanuru mu iphe l'itumo; ge mu gude jasu l'ikputaru mu iya?"

¹⁸Ọ su iya: "?Bu gunu be mu e-yeru ngu l'itumo obu?"

O su iya: "Oo iphe, agba l'eka ngu, eegudeje hube ngu ama; waa eri, tso iya nu; waa oshi-mpaleka ngu ono, i gude l'eka ono." Ọ chiru iya nu iya; ephe l'iya je akwaa; o woru ime yee ya. ¹⁹Ọ tugbuepho bya eje aphufu ekwa ono, o shi phua l'iphu ono; bya eje eworu uwe nwanyi, no l'ulo-maa, o shi yee woru yepu azu.

²⁰E mecha; Jiuda bya akputa ada-eghu ono kpee onya iya, onye Adulamu g'o je akpee nwanyi ono; chiru iya iphe, o yeru iya l'itumo ono. O jee ophu o humaeduru nwanyi obu. ²¹Ọ jia ndu bu l'eka ono su: "?Denu nwanyi-ovuoba, shi nodu laguga uzo Enemu-a?"

Ephe sù iya: “Nwanyị-ovuọba ta nojekwaru l'ẹka-a.”

²²Oo ya bụ; ọ laa je asụ Jiuda lẹ ya ta ahụmakwaru iya. Teme ọzo bụ lẹ ndu bu l'ẹka ono sụkwaru lẹ nwanyị-ovuọba ta nojeduru l'ẹka ono.

²³Jiuda sù: “G'a hakwaa ya g'o nnowaruro iphe, o gude; a -nonyaa; e gude iya gbaaharu anyi mgbonu. Eshi ophu mu kperu ngu ada-eghu, i gude je achokota iya; ophu i hụmaduru iya.”

²⁴A nọpho iphe, rwuru ọnwaa ẹto; a bya asụ Jiuda: “Tema, bụ nyee nwa ngu bẹ buakwaa nwanyị-ovuọba; mbụ lẹ-a; ọ dukwaa ime. Ọ buru l'ovuọba ono bẹ o vutaru iya.”

Jiuda sù: “Unu kpufuta iya g'e kegbua ya l'oku!”

²⁵A kpufutashia ya; o zia ozi g'e je ezia nna ji iya ono sù iya l'ọ kwa onye nwe iphe-a bẹ yeru iya ime ono. Sù iya: “Maeshikwaru ?i-dụ ike maru onye nwe iphe, agba l'ẹka eegudeje ahube nemadzụ ama-a; waa eri, tso iya nù; waa oshi-mpaleka-a?”

²⁶Jiuda hụma iphe ono bya amaru l'ọo nkiya bya asụ: “Ha! Nwanyị-a kakwa mu apfubekoto; eshi ophu mu sụcharu lẹ mu e-kuru iya nù nwa mu, bụ Shela g'ọ luru. E mecha; ophu ẹphe l'iya alueduru.”

²⁷O rwue ya pho l'ezeda; a maru l'unwu ono dụ iya ẹbo l'ẹpho. ²⁸Lẹ g'oozedaa bẹ onye lanu wofutaru ẹka. Nwanyị, eswiye ime bya ewota ẹba oghu, dụ uswe-uswe libe iya lẹ nkwo-ẹka; bya asụ l'ọo onye ọwa-a bụ ivuzo. ²⁹O wobaepho ẹka ono; nwune iya kwofuta. Nwanyị, eswi ime ono sù: “?Bụ g'i shiru kpakata ọzo baa?” A gụ ya Pẹrezu.^e ³⁰Oo ya bụ; nwune iya onye ophuu, a gbaberu ẹba oghu, dụ uswe-uswe lẹ nkwo-ẹka ono lufuta; a gụ ya Zera.^f

Jiósẹfu yẹle nyee Potifa

39 ¹Tobudu iya bụ; e gude Jiósẹfu jerwua alị Ijiputu. Ọ buru Potifa onye Ijiputu zuru iya ndu oshilokpa Ishimelu ono, gude iya jerwua alị Ijiputu ono. Potifa ono tso lẹ ndu nọ l'oke-okwa. Yẹbedua bụ onye-ishi ndu ojogu, anọduje eche Fero nche.

²Chipfu nọ-kube Jiósẹfu; ọ buru onye iphe ejehuru. O buru l'ulo nnajjuphu iya, bụ nwoke Ijiputu ono. ³Nnajjuphu iya ono hụmaepho lẹ Chipfu nọ-kube iya; teme lẹ Chipfu emeje g'iphemiphe, Jiósẹfu ono eme vuru ire; ⁴Jiósẹfu dụ iya l'obu. O woru Jiósẹfu mee onye-ozii iya; mbụ mee ya onye elekota unuphu ibe iya l'ophu ẹnya; teme o wokwarupho iphemiphe, o nweru yekota iya l'ẹka g'o leta ẹnya. ⁵Eshi teke ono, o woru unuphu ibe iya l'ophu; yee iphemiphe, o nweru enweru yekota Jiósẹfu l'ẹka g'o leta ẹnya ono bẹ Chipfu bya ekebeahaa nwoke Ijiputu ono l'oma shita l'ehu Jiósẹfu. Chipfu kebeahaa ya l'oma l'iphemiphe, o nweru enweru; je akpaa lẹ ndu ophu nọ l'unuphu; mē lẹ ndu ophu nọ l'egu. ⁶Oo ya bụ; ọ hakotaru

^e 38:29 Iphe, Pẹrezu bụ bẹ bụ 'Okwokwo'. ^f 38:30 Zera bụ iphe, ọ futaru bụ 'ọcha-pfuu'.

Jiósèfù èku iya l'ophu g'o leta ɛnya. Ophu ɔ dɛdu iphe, o nweru, ɔkpa-jekwadu ishi iya. Iphe, ɔ maɛrupho kpoloko bu g'o ria nri.

Jiósèfù gbaru mkparawa bya amashi mma ike. ⁷A nɔpɛho nwanshii; Jiósèfù gɔhaa nyee nnajiuphu iya ono; ɔ sɔ iya g'ɔ bya g'ɛphe l'iya je akwa.

⁸Obenu lɛ Jiósèfù jikaru bya asɔkwapho nyee nnajiuphu iya ono: “A-gbɛ teke nnajiuphu mu meru mu onye-ishi iphemiphe, o nwekotaru bɛ ɔ tɔ dɛdu iphe, eeme l'unuphu-a, ɔkpa-jekwadu ishi iya. Iphemiphe, o nweru g'ɔ ha bɛ o yekɔtawaru mu l'ɛka gɛ mu leta ɛnya. ⁹Ophu ɔ tɔ dɛdu onye kabaa mu shii l'ulo-a. Ophu ɔ dukwapho iphe, oowoharu mu ewoha gbahaa gbɛdua; kele i bu nyee ya. ?Dɛnu gɛ mu e-shi mee ɛjo-iphe, du ɛgube ono; mbu mee Chileke iphe-ɛji onoya?” ¹⁰O nɔdu anɔdujekpɛpɛho epfuru iya Jiósèfù mbokumboku; obenu lɛ Jiósèfù te ekwedu g'ɛphe l'iya kwaa; mbukponu g'ɛphe l'iya nɔ-kube ntse.

¹¹O be ujiku lanu; Jiósèfù bahu l'ulo gɛ ya je ozi, duru iya nu. Teke ono bɛ ɔ tɔ dɛdu ndu-ozu ulo ono l'ophu m'onye lanu, nɔ l'ime ulo ono; ¹²o gude iya l'uwe sɔ iya g'ɔ bya g'ɛphe l'iya kwaa. Jiósèfù yefu uwe iya ono haa ya l'ɛka gbado ulo ono gbafu etezi.

¹³O maɛrupho lɛ Jiósèfù yefuru uwe iya haa ya l'ɛka gbafu etezi; ¹⁴o kua ndu-ozu ulo iya ndu ophu; sɔ pɛ: “Unu lenu! Nwɔphu shi l'alɔ ndu Hiburu-a bɛ e dutaru dobe; g'ɔ bya anyi eme iphe-iphere. O bataru l'ɛka-a bya g'anyi l'iya kwaa; mu chishia mkpu. ¹⁵O nɔmaepɛho lɛ mu chiaharu mkpu; ɔ gbadoo mu uwe iya l'ɛka gbala gbafu etezi.”

¹⁶O gude uwe ono gbiriri jasɔ nnajiuphu Jiósèfù bata. ¹⁷O bya eworu iya pfuaru iya sɔ: “Nwohu ono, i zɔtaru, bu onye Hiburu ono bɛ shi eme g'o mee mu iphe-iphere ntanu-a. ¹⁸Mu wataepɛho echi mkpu; ɔ gbadoo mu uwe iya l'ɛka gbala gbafu etezi.”

¹⁹Nnajiuphu Jiósèfù nɔmaepɛho iphe ono, nyee ya pfuru iya ono sɔ lonoo g'ohu iya meru iya ya bu ono; ɔ vuru oku wɔ ɛhu. ²⁰O kpɔta Jiósèfù jeye l'ɔka-mkpɔro, eze atɔ-chije ndu mkpɔro iya.

Ole Jiósèfù nɔ lɛ mkpɔro ono; ²¹Chipfu nɔ-kube iya bya egoshi iya lɛ ya yeru iya obu. O mee; Jiósèfù du onye eche ɔka-mkpɔro ono nche l'obu. ²²Onye eche ɔka-mkpɔro ono woru Jiósèfù mee ishi ndu nɔkota l'ɔka-mkpɔro ono. Iphemiphe, eemekɔta l'ɛka ono buru yɛbe Jiósèfù bɛ e yeru iya l'ɛka. ²³Iphe, nɔwa Jiósèfù l'ɛka bɛ onye eche ɔka-mkpɔro ono ta akpajɛdu ishi g'ee-me iya; noo kele Chipfu nɔ-kube Jiósèfù bya emee; iphemiphe, oome nɔdu evujeru ire.

Onye etsujeru Fero onu lɛ mɛ; yɛle onye eghejeru iya buredi

40 ¹O nweru teke a nɔnyaru; onye etsujeru eze ndu lɔjiputu onu lɛ mɛ; yɛle onye eghejeru iya buredi meswee nnajiuphu pɛ, bu eze ndu lɔjiputu. ²Umazdu labo ono, ejeru iya ozi ono, bu onye-ishi ndu

etsujeru iya onu le mee; waa onye-ishi ndu eghejeru iya buredi pho mee; ehu ghuahanaa Fero obu eghu. ³O ye phe l'oka-mkporo l'ibe onye-ishi ndu ojogu, anoduje eche Fero nche, bu eka a tu-chikwarupho Jiosefu. ⁴Onye-ishi ndu ojogu, anoduje eche Fero nche woru phe ye l'eka Jiosefu; o nodu eleta phe enya.

Ephe nonyaepho l'eka ono; ⁵unwoke labo ono; mbu onye etsujeru eze ndu Ijiputu onu le mee; yee onye eghejeru iya buredi, bu ndu toko nodu le mkporo ono bya atoko rwo nrwo lenyashi ujiku lanu. Nrwo ono nwecharu iphe, o futaru iche iche. ⁶Jiosefu bya l'utsu iya bya ahuma l'ephe adzu iphu. ⁷Oo ya bu; o jia ndu ono, bu ndu no l'oke-okwa Fero, a tukoru ephe le yebe Jiosefu tu-chia l'ibe nnajiuphu iya ono; su phe: “?Bu gunu kparu iphe, unu adzu iphu ke ntanu?”

⁸Ephe su l'ephenebo ono toko rwo nrwo; ophu o dudu onye a-koru phe iphe, nrwo ono futaru.

Jiosefu su phe: “?Tobudu Chileke bu onye akoje iphe, a rworu le nrwo? Jiko unu zeeshikwaru mu nrwo ono, unu rworu ono.”

⁹Oo ya bu; onye-ishi ndu etsujeru Fero onu le mee bya ezeeru Jiosefu nrwo nkiya; su iya: “Mu rworu nrwo ge mu humaru vayinu l'ataphu mu. ¹⁰Vayinu ono nweru ekali eto. O tuchaa ige; bya ajaa ajaja; bya amishia ke wogalaa; bya achashia. ¹¹Mu gude okoro Fero l'eka; bya ewota akpuru vayinu ono pyiru ye l'okoro Fero; bya eworu iya nu iya.”

¹²Jiosefu su iya: “Waa iphe, nrwo ono bu baa. Ekali-oshi eto ono bu ujiku eto. ¹³A -noepho ujiku eto; Fero abya edufuta ngu l'eka-a; bya edobe ngu l'onodu, i shi nodu; l'ibya agbaaharu Fero mee egube ono, i shi emeje teke ono, i shi buru onye etsujeru iya onu le mee pho. ¹⁴Teke iphe-miphe aduru ngu pho le ree; jiko nyatakwa mu. Iphe-oma, ii-meru mu bu g'i pfuaru Fero opfu ehu mu dufuta mu l'oka-mkporo-a; ¹⁵kele o kwa ezita be e zitaru mu l'oshi l'alj ndu Hiburu. O rwukwaa l'eka-a; a bya atua mu mkporo lebe adu iphe, mu meru.”

¹⁶Onye-ishi ndu ophu eghejeru Fero buredi pho humaepho le Jiosefu korwaru nrwo ono ree; o su Jiosefu: “Mbdua rwokwarupho nrwo ge mu vu nkata buredi eto. ¹⁷Le nkata k'eli iya be e yeru iphe, du iche iche, e gheshiru Fero. Enu pheru bya eberu le nkata k'eli iya ono; bya awata avuka iphe, no le nkata ono, mu vu l'ishi ono.”

¹⁸Jiosefu su iya: “Waa iphe, o bu baa; nkata eto ono bu ujiku eto. ¹⁹A -noepho ujiku eto; Fero abya akpufuta ngu; je eworu ngu swigbua l'eli oshi. Enu abya avuka anu ngu.”

²⁰O beepho mboku k'eto ono, gbaru l'eswe a nwuru Fero. O bya eshiaru ndu-ozu iya gephe ha nri obo-iphe. O bya edufuta onye-ishi ndu etsujeru iya onu le mee; yee onye-ishi ndu eghejeru iya buredi dobe l'ataphu ndu-ozu iya. ²¹O bya eworu onye-ishi ndu etsuje onu le mee dophu azu l'okwa iya ozo. O bya agbaaharu Fero mee g'o shi agbaru iya. ²²O bya eworu

onye-ishi ndu eghejeru iya buredi pho swi-gbua l'eli oshi. O nwukotaepo ge Jiófesu sūru phe l'oo-nwu. ²³Obenu l'onye-ishi ndu etsuru Fero onu le mee ono ta nyataeduru Jiófesu; o zohaa ya.

Nrwo Fero

41 ¹A noepo apha labo sugbaa ishi; Fero rwo nrwo. O gbepfuru laguga enyimu Nayilu. ²A bya ele enya; eswi esaa, du ubvu lenya bya adu okporokpo shi lenyimu Nayilu ono rwufutagba; bya anodugba laguga aka ono taaha nri. ³E mecha; eswi esaa ozo, du eji bya ajo ehushikwapho lenyimu ono rwufuta bya anokube ophuu laguga enyimu ono leka ono. ⁴Eswi esaa ophu du eji bya ajo ehusho bya atuko eswi esaa ophu du ubvu lenya bya adu okporokpo pho lwekota. O mecha nno; Fero tehu.

⁵A nonyakwaa; mgbenya tu iya ozo; o rwo nrwo k'eb. K'ogiya ono be o rwo nrwo g'ishi akpe esaa, du okporokpo bya adu ree photaru l'oshi akpe lanu. ⁶E mecha; ishi akpe esaa ozo, du mgbapya mgbapya, phe-rephere uzo enyanwu-awawa mebyishiru bya aphoshia l'oshi akpe ozo. ⁷Ishi akpe esaa ophu du mgbapya mgbapya pho bya atuko ishi akpe esaa ophu du okporokpo bya apho apho pho lwekota. Oo ya bu; Fero tehu; bya amaru l'iphemipe ono bu le nrwo be o shi anwukota.

⁸A futu l'utsu; iphe ono nodu atsū iya l'ehu shii. O zia g'e je ekuaru iya ndu jibya; waa ndu mmamiphe ndu Ijiputu. Fero bya ezeeru phe nrwo ono. Ophu o dudu onye duru ike kooru iya iphe, nrwo ono bu.

⁹Onye-ishi ndu etsujeru Fero onu le mee su Fero: "Ntanu-a be mu nyatakwaru iphe, mu meru, adudu ree. ¹⁰O nweru teke ehushijeru gube Fero egu l'eka anyibe ndu-ozu ngu no; i tua mu l'onye-ishi ndu eghejeru ngu buredi pho mkporo l'ulo ibe onye-ishi ndu ojogu, echeje gube Fero nche. ¹¹O -rwua enyashi ujiku lanu; anyi n'eboto tuko rwo nrwo; nrwo ono ephenebo nwecharu iphe, o bugbaa. ¹²O nweru nwokorobya Hiburu, bu onye ohu onye-ishi ndu ojogu, echeje gube Fero nche, anyi liya tuko nodu l'eka ono. Anyi zeeru iya nrwo ono; o kooru anyi iphe, o bugbaa. Onyenonu be o kochaarū iphe, nrwo nkiya bu. ¹³E mecha; iphemipe ono nwukotaerupho anyi g'o pfuru. Mbēdua be e kuphuru azu l'okwa mu; e woru onye ophuu je aswi-gbua."

¹⁴Oo ya bu; Fero zia g'e je ekua Jiófesu; a bya atufuta iya l'ulo-mkporo ono. O kpuchaa ishi bya agbanwee uwe iya bya ejeshia l'atatiphu Fero.

¹⁵Fero su Jiófesu: "Mu rwo nrwo; ophu o dudu onye duru ike kooru mu iphe, nrwo obu bu. Obenu le mu nūmaru l'obujeru; teke e zeru ngu nrwo; li kooru onye ono iphe, o bu."

¹⁶Jiófesu su Fero: "O to bukwa mbēdua akoje iphe, nrwo bu. O kwa Chileke be a-koru gube Fero iphe, nrwo ono bu le g'oo-ji ngu epho."

¹⁷Fero su Jiófesu: "Mu rwo nrwo ge mu pfuru le mgboru enyimu Nayilu; ¹⁸mu hūma eswi esaa, du okporokpo bya adu ubvu lenya g'o shi

lẹ mini ono rwufuta bya anọdu l'aguga mini l'eka ono taaha nri. ¹⁹Ephe fıtachaa; eswi ẹsaa ọzo, dọ eji bya ajo ẹhu dọ garanyongu bya erwufu-takwapho. Mbụ lẹ mu teke ahuma-swee eswi, dọ-be eji ẹgube ono l'alị Ijiputu! ²⁰Eswi ẹsaa k'ono, dọ garanyongu ono bya ajo ẹhu ono bya atuko eswi ẹsaa kẹ mbụ pho, dọ okporokpo pho takota lwee. ²¹Ephe taẹbechaa phe; ephe dukwapho njo adudu g'ephe dọ; k'ophu bụ l'ọ to dudu onye ekweta l'ọo phe taru eswi ono. Mu tehu lẹ mgbenya ono.

²²“Mu byakwa ekuru mgbenya ọzo; mu watakwa arwo nrwo. O be k'ogiya ono; mu huma ishi akpe ẹsaa, phoru aphopho bya adu ree g'ọ pho takotaru l'oshi akpe lanu. ²³E mechaa; mu humakwapho ishi akpe ẹsaa ọzo, duchaa mgbapya mgbapya; bya aduchaa kẹ zitazita; teme pherephere ọzo ẹnyanwu-awawa zipyashia ya; o nwulwashihu anwulwashihu; g'ọ photakarupho. ²⁴Ishi akpe k'ono, dọ mgbapya mgbapya ono bya atuko ndu ophu dọ ree pho lwekota. Mu bya ezeeru iya ndu jibya; ophu o dudu onye duru ike koru mu iphe, nrwo obu bu.”

²⁵Noo ya; Jiósefu sụ Fero: “Nrwo labo ono bukwa iphe lanu be o bu. Chileke meru g'ọ koru gube Fero iphe, ya abya ememe. ²⁶Eswi ẹsaa pho, dọ ree pho bu apha ẹsaa; teme ishi akpe ẹsaa pho, dọ ree pho bukwarupho apha ẹsaa. Oo ya bu lẹ nrwo ono tukoru buru nrwo lanu. ²⁷Eswi ẹsaa ophu dọ eji bya ajo ẹhu, fıtaru nọ gẹ ndu ophuu fıtachaerupho pho bu apha ẹsaa. Teme ishi akpe ẹsaa pho, dọ mgbapya mgbapya; pherephere, shi ọzo ẹnyanwu-awawa zipyashiru; o nwulwashihu anwulwashihu pho buru apha ẹsaa, ẹgu e-me.

²⁸“O kwa-a iphe, mu pfuhawaru gube Fero-a be o bu. O kwa Chileke go-shiru ngu iphe, yebe Chileke abya ememe. ²⁹Su-a; l'ime apha ẹsaa be nri a-kwatakpo dọ shii l'alị Ijiputu mgburugburu. ³⁰Ole e -mechaa; apha ẹsaa ophu ẹgu e-meshi ike etsota iya. Laatuko apha ẹsaa pho, nri shi dọ shii l'alị Ijiputu pho zohakota. Ẹgu ono abya atuko alị ono nmaa swokoswoko. ³¹Apha, nri shi paa ẹka l'alị ono-a te enweedu onye anyata iya nu; noo kele ẹgu ono a-buru ejo iphe-ehuka. ³²Iphe, meru g'ọ gude gube Fero rwo nrwo ono mgbo labo bu iphe obu be bu lẹ Chileke chipyawaru iya rengurengu lẹ ya e-me iya; teme ophu o duedu g'aa-no-beru; Chileke emee ya.

³³“Nta-a bukwa gẹ gube Fero lee ẹnya hota onye iphe edoje ẹnya bya aburu onye maru iphe mee ya g'ọ buru ishi l'alị Ijiputu. ³⁴Teme l'ị hota-kwapho ndu-ozu, a-no-tsota onye-ishi alị Ijiputu pho; g'ephe keje iphe, ndu Ijiputu kpataru l'opfu ọzo ise wota oke lanu. ³⁵G'ephe nakobe nri ono g'ọ ha l'apha k'ono, nri dọ ono. Teke ephe nakobecharu iya; ephe egude epha gube Fero je edobegbaa ya l'ulo ẹka eedobeje nri, nogbaa lẹ mkpukpu lẹ mkpukpu. ³⁶Le woru nri ono doberu ndu alị-a kwaberu apha ẹsaa k'egu pho, a-bya lẹ Ijiputu-a. Oo ya bu g'egu ete egbuchidu alị-a.”

³⁷Iphe ono dọ Fero yee ndu-ozu iya l'ophu ree. ³⁸Oo ya bu; Fero jja phe su: “?Anyi a-dọ ike ahumaba onye ọzo, a-dọ gẹ nwoke-a; mbụ onye unme Chileke bu l'ehu ẹgube-a?”

³⁹Noo ya; Fero sù Jióşefu: “Eshi ophu Chileke meru g'i makotaru iphe-miphe-a bẹ o to nwekwa onye ka ngu aburu onye iphe edoje enya; ophu o nwekwa onye ka ngu amaru iphe. ⁴⁰Oo gubedua bẹ a-buru ishi l'ibe mu; teme o buru iphe, i pfuru bẹ onyemonye e-meje l'alì-eze mu. Iphe, mu e-gude ka ngu shii kpoloko buepho l'oo mbedua bẹ bu eze.”

Jiósèfu eleta alì Ijiputu l'ophu enya

⁴¹Noo ya; Fero sù Jióşefu: “Nta-a buakwaa ngu bẹ mu yekotaru alì Ijiputu l'ophu l'eka.” ⁴²Oo ya bu; Fero gbata echi-eze iya woru gbabẹ Jióşefu lẹ mkpushi-eka; bya eyee ya akpawuru-uwe; nyabẹ iya iphe-olu, e gude mkpola-ododo mee. ⁴³O bya anu iya ugbo-inya iya k'ẹbo; o nodu agba. Ndu ozo vuta uzo agbo ogboo ekpu iya asuje: “Unu phozeru iya!” O buru iya bu lẹ Fero eworu alì Ijiputu l'ophu woru yekota Jióşefu l'eka.

⁴⁴Fero sù Jióşefu: “O kwa mbedua bu Fero; mbu lẹ-a; o -buru l'i ti pfuduru l'owa-a iphe, ee-me baa; te enwekwa onye nweru iphe, o byaru eme l'alì Ijiputu l'ophu.” ⁴⁵Fero gua Jióşefu Zafunatu-Paneya bya eduta Asenatu, nwada Potifera onye uke ndu Onu kee ya g'o buru nyee ya. Jióşefu bya ejedzuru alì Ijiputu l'ophu.

⁴⁶Jiósèfu nowaru ukporo apha l'apha iri teme o wata ejeru Fero, bu eze ndu Ijiputu ozi. Jióşefu shi l'iphu Fero tugba; bya ejedzuru alì Ijiputu.

⁴⁷L'apha esaa ono, nri du ono bẹ alì meshikpooru kẹ nri ree ike. ⁴⁸Jiósèfu bya atuko nri, a kotaru l'alì Ijiputu l'apha esaa ono, nri du ono kwakokota; dobegbaa lẹ mkpukpu lẹ mkpukpu l'alì Ijiputu. Oobujeru; o -bya lẹ mkpukpu k'owa-a l'o kwakoo nri, a kotaru l'egu, no-pheru iya mgburugburu doo ya. ⁴⁹Jiósèfu kwakopho ereshi, e metaru l'opfu jasụ o kuta l'ikpo, ha g'evevee, no laguga eze-enyimu. Nri obu kwatakpooru paa eka k'ophu a nonyaru; ophu e dejeedu iya lekwo. Noo kele o buwaa aguta aguta.

⁵⁰O rwutashia apha okpa-nri ono; Asenatu, nwada Potifera, onye uke ndu Onu nwutawaru iya unwegirima unwoke labo. ⁵¹Jiósèfu gua onye ophu bu okpara iya Manase; noo kele o suru: “Chileke mewaru; mu zohaaphu, tsoru mu nu; bya azoha okpoku ibe nna mu.” ⁵²Onye k'ẹbo bẹ o guru Ifuremu su: “Oo Chileke bu onye meru ge ya jaa ajaja l'alì, ya shi nodu eje iphe-ehuka.”

⁵³Apha esaa, nri du shii l'alì Ijiputu pho bya abvu. ⁵⁴Apha esaa k'egu pho bya awata; mbu o nwupho ge Jióşefu pfuru ono; okpa-nri bya lẹ mgboko mgburugburu; o buerupho alì Ijiputu bu eka nri du. ⁵⁵Egu mea-phaepho ndu Ijiputu; ephe je araaru Fero kẹ nri. Fero sù ndu Ijiputu l'ophu: “Unu jepfufe Jióşefu. Iphe, o sukpooru g'unu mee; unu emee ya!”

⁵⁶Okpa-nri ono jedzuerupho alì ono; Jióşefu tushashia ulo eka eedobeje nri reaha ndu Ijiputu nri; noo kele egu ono emeshikpo ike lekameka l'alì Ijiputu. ⁵⁷Ohamoha l'ophu nodu abyajẹ l'alì Ijiputu bya azuta Jióşefu nri; noo kele egu ono emeshikpo ike lẹ mgboko mgburugburu.

Unwunna Jiófèfu eje alì Ijiputu je azùta nri

42 ¹Jiékòpu nùmaepfo lẹ nri dọ l'alì Ijiputu; ọ sù unwu iya: “?Bù gunu kparù iphe, unu a-nòdu elegbaa nwibe unu ẹnà?” ²Ọ sù kwapho: “Mu nùmakwaru lẹ nri dọ l'alì Ijiputu. Unu jekwa ẹka ono je azùtaru anyi nri ilile. Ọo ya bù; g'anyi anòdu ndzù; g'ẹgu te egbushi anyi.”

³Unwunna Jiófèfu umadzu iri bya atùgbunaa jeshia azùta nri l'alì Ijiputu. ⁴Ọphu Jiékòpu ekwedu gẹ nwune Jiófèfu, bù Benjaminu tsoru phẹ. Noo kẹle ndzù agù iya l'iphe-kpanganga e-me iya. ⁵Ọ buru iya bù l'unwu Ízurẹlu yì lẹ ndu jeru azùta nri ọbu; kẹle ọkpa-nri ono dọkwapho l'alì Kénanu.

⁶Noo ya; ọ buru Jiófèfu bù ọchi-ọha ndu Ijiputu ono; tẹme ọ buru iya anòduje ere ndu alì ono l'ophu nri. Ọo ya bù; unwune Jiófèfu byarwutaepfo bya eworu iphu kpube l'alì baarù iya ẹja. ⁷Ahùma, Jiófèfu ahùma unwunna iya; ọ hùbe phẹ ama; bya awataro eme umere g'ọ tọ madù ndu ẹphe bù; bya epfuharù phẹ opfu ẹhuka ẹhuka. Sù phẹ: “?Bù awe bẹ unu shì?”

Ephe sù l'ẹphe shikwa alì Kénanu bya azùta nri.

⁸Jiófèfu hùbeepfo unwunna iya ono ama; obenu l'ẹphebedua ta ahùbeduru yẹbedua ama. ⁹Ọ bya anyata nrwo, o rwojeru k'ẹhu phẹ phọ; bya asù phẹ: “Unu bù ndu ngge; unu byaru g'unu hùma ẹka alì anyi dọ nyegenyege!”

¹⁰Ephe sù iya: “Waawakwa nnajìuphu; anyìbe ndu-ozì ngu bọkwa nri bẹ anyi byaru azùta. ¹¹G'anyi haa shikwa lẹ nna lanù. Anyìbe ndu-ozì ngu epfukwa ire-lanù; anyi ta abọkwa ndu ngge.”

¹²Ọ sù phẹ: “Ọo ọka; unu byacharu-a g'unu hùma ẹka alì anyi dọ nyegenyege!”

¹³Ephe sù iya: “Anyìbe ndu-ozì ngu dọkwa iri l'ẹbo tọko shi lẹ nna lanù buru l'alì Kénanu. Onye kẹ nwata bẹ ẹphe lẹ nna anyi nọkwa l'unuphu; onye lanù ta anọedu ndzù.”

¹⁴Jiófèfu sù phẹ: “Ọo gẹ mu pfuru unu-a bù g'ọ dọ; unu bù ndu ngge! ¹⁵Waa g'ee-shi hùta unu ama baa: Ọ -bùru-a lẹ Fero nọ ndzù g'ọ nọ iya-a bù g'iphe, mu epfu-a bù eviya l'unu ta abyadù ahata ọkpa l'ẹka-a tųgbua; abùdu lẹ nwune unu kẹ nwata bẹ e dutaru bya l'ẹka-a! ¹⁶Unu zia onye lanù l'ime unu g'ọ je eduta nwune unu ono; unubẹ ndu ọphuu g'unu ha bẹ a-nòdukota lẹ mkpọro. Ọo ya bù l'ee-shi nno hùta unu ama; maru mẹ ọ bù-a ire-lanù bẹ unu epfu. Teke ọdumeka l'aamaru l'ọo g'ọ doru ẹnà lẹ Fero nọ ndzù bù g'ọ bù eviya; l'ọo ndu ngge bẹ unu bù.” ¹⁷Ọ tọko g'ẹphe ha je atù-chishikota lẹ mkpọro; ẹphe nọo ujiku ẹto.

¹⁸Ọ -rwua lẹ mbọku k'ẹto; Jiófèfu sù phẹ: “Unu -mewaa iphe-a, mu abya epfupfu-a; mu ahaa unu g'unu nọdu ndzù; kẹle mu bù onye atsu

Chileke ebvu. ¹⁹Unu -sù l'unu bu ndu ire-lanù; unu haa onye lanù lẹ g'unu ha g'ò nòdu lẹ mkpòro; unubẹ ndu òphuu egude nri wojeru ndibe unu, nò l'unuphu, ẹgu eme. ²⁰Òlẹ unu dutafutajekwaru mu nwanna unu kẹ nwata òbu; g'e shi ẹgube ono maru l'unu epfu ire-lanù; g'e te egbukwanu unu." Ẹphe kweta l'ẹphe e-me iya nno.

²¹Ẹphe nòdu epfugaru nwibe pẹ sù: "Ò kwa iphe, anyi meru nwune anyi bẹ aanù anyi aphù iya. Anyi hùmaru ẹgube aphù, ọ gùru kpua anyi teke ọrwo anyi g'anyi dobe iya ndzù; obenu l'anyi te eyeduru iya ọnu. Ọ kwa iphe ono meru g'ò gude ẹjọ aphù, dù ẹgube-a byapfuta anyi ntanù-a."

²²Rúbẹnu sù: "?Mu ta asùduru unu g'ò tọ dushi iphe, unu e-me nwata ono; ọphu unu eyeduru ọnu? Nta-a bẹ ishi ọchi iya tų-konuru anyi l'ishi."

²³Ẹphe dobesù l'eshi ọphu a gbanweru Jíósefu opfu agbanwe bẹ ọ tọ nùmaduru iphe, ẹphe epfu.

²⁴O wofu iphu l'ẹka ẹphe nọ kwashia ẹnya-mini bya aghachikwaru pẹ iphu ọzo; bya awata abọ ọja eyeru pẹ ọzo. O zia; a kpufuta Simiyonu l'echilabọ pẹ; kee ya ẹgbu l'atatiphu pẹ l'ẹka ono.

²⁵Jíósefu bya asù g'e yejishicharu pẹ nri l'ẹda pẹ; tẹme l'eeyephucharu pẹ okpoga pẹ azù l'ẹda pẹ; tẹme l'aanù pẹ nri, ẹphe e-ri l'ùzo. A bya emeẹbecharu pẹ iphemiphe ono; ²⁶ẹphe bya apata ẹda nri ono nma-kobechaa l'eli nkafu-igara pẹ bya atugbu; ọ buru pẹ alala.

²⁷O -rwua l'ẹka ẹphe nọ-zetaru k'akwakwa; onye lanù bya atohashia ẹda iya gẹ ya hata nri nù nkafu-igara iya; okpoga iya nòduwaa l'ọnu ẹda ono. ²⁸Ọ sù unwune iya: "Iyii; okpoga mu bẹ a gbekwa yephuru mu azù! Wakwa iya nọ l'ẹda mu-a!"

Meji tsukahù pẹ; tẹme ẹhu nòdu aphukwa pẹ phọ aphuphu. Ẹphe sù nwibe pẹ: "?Bù gunu bẹ Chileke meru anyi ẹgube-a?"

²⁹Ẹphe lwapfuta nna pẹ Jiékọpu l'alì Kénanu; ẹphe tuko iphemiphe, nwuru pẹ nù kọkotaru iya; sù iya: ³⁰"Onye bu nnajjuphu l'alì ono bẹ pfukwaru anyi opfu ẹhuka ẹhuka; bya emee anyi gẹ ndu byaru ngge l'alì pẹ. ³¹Obenu l'anyi sùru iya l'anyi bukwa ndu e gude ire pẹ ẹka; l'anyi ta abukwa ndu ngge. ³²Anyi dukwa unwoke iri l'ẹbo, shi lẹ nna lanù. Onye lanù ta nọedu; onye kẹ nwata bẹ ẹphe lẹ nnana anyi nọ l'unuphu lẹ Kénanu.

³³"Noo ya; nnajjuphu ndu alì ono sù anyi: 'Waa-a gẹ mu e-shi maru mẹ unu bu ndu ire-lanù baa. G'anyi haa nwanna anyi onye lanù g'ò nòdu l'ẹka ono; anyibe ndu òphuu e-wota nri wojeru ndibe anyi, nọ l'unuphu, ẹgu eme. ³⁴Òlẹ g'anyi dutaru iya nwanna anyi kẹ nwata phọ. Ọo ya bụ; ya amaru l'anyi ta abudu ndu byaru ngge; l'anyi bu ndu e gude ire pẹ ẹka eviya. Ọo ya bụ; ya eduru nwanna anyi ono nù-phu anyi azù; anyi ejeahawarọ g'ò dù anyi l'alì-a.' "

³⁵Ẹphe nòdu awufu nri ono l'ẹda pẹ; ẹphe hùma ẹkpa okpoga pẹ g'ò nọgbaa l'ẹda pẹ. Ẹphe lẹ nna pẹ bya atukocha hùma ẹkpa okpoga

ono; ndzụ rwuta phẹ. ³⁶Nna phẹ Jiékoṗu sụ phẹ: “?Unu eme g'unwu mu bvuebe? Jiósefu ta nọhedu; oṗhu Simiyonu anọedu; ẹme unu nọdu emefukwaapho g'unu natafua mu Benjiaminu. Mbẹdua bukpowa oshi ukpara-ẹhu.”

³⁷Rúbenu sụ nna iya: “Gbua unwegirima ibe mu-a ẹphenebo; m'ọ buru ẹ mu te eduphutaduru ngu Benjiaminu azu. Woru iya ye mu l'eka; mu eduphutaru ngu iya azu.”

³⁸Jiékoṗu sụ phẹ: “Nwa mu te etsodu unu eje-o; kele nwune iya nwuhwaru; ọ buwaru iya nwẹkinyi iya. O -nweru ejo-iphe, meru iya l'iphe ọzo ọbu, unu eje ọbu; unu emee gẹ mu gụa aphụ laa maa l'ishi ẹwo mu-a.”

Unwunna Jiósefu alaphu azu l'alị Ijiputu

43 ¹Egu ono nọdukwapo eme l'alị Kénanu g'oome. ²Ndibe Jiékoṗu rigbuepho nri phọ, ẹphe shi l'alị Ijiputu gude phọ; nna phẹ sụ phẹ: “Unu jebanaa je azutabaaru anyi nri!”

³Jiuda sụ iya: “Nwoke ono pfukwaru iya pfushia ya ike sụ l'anyi ta abyakwa ahumaba iphu iya; abudu l'anyi ẹ nwanna anyi ọbu swi. ⁴Ọ -buru l'i kweru haaru anyi nwanna anyi ono g'o tsoru anyi be anyi e-je-kwa-a je azutaru ngu nri. ⁵Ọ -bukwanuru l'i ti kwedu g'o je; be anyi te ejekwa; noo kele nwoke ono suru l'anyi ta ahumabaedu iphu iya; m'ọ bụdu l'anyi ẹ nwanna anyi ono swi.”

⁶Ízurelu sụ: “?Denu g'ọ nwuru unu tugburu je epfuaharu nwoke ọbu l'unu nweru nwanna ọzo; shi nno mee; oke iphe-ẹhuka-a byapfuta mu?”

⁷Ẹphe sụ: “?Tobudu nwoke ono jikpaaharu anyi onu ẹ k'ẹhu anyi; waa k'unuphu ibe anyi? Ọ jiru sụ: “?Nna unu nokwadu ndzụ? ?Unu nwebaaru nwune ọzo?” Anyi kwenu ‘Ee’ bya eyeeru iya onu l'iphe, ọ jiru. ?Anyi makwanuru l'ọo-sụ g'anyi duta nwanna anyi ọbu bya?”

⁸Noo ya; Jiuda sụ Ízurelu, bụ nna iya: “Denaa mu nwata-a g'anyi liya swiru; g'anyi agbeshi jeshia; k'ophu anyibedua; waa gubedua; waa unwu anyi a-tuko nọdu ndzụ; g'anyi ta nwuhushi. ⁹Ọo mbẹdua l'a-noduru ngu iya ẹ mkpaleka. Ọ buru mu be ii-kpa ishi iya. Teke mu te eduphutaduru ngu iya azu; bya apfube ngu l'atatiphu; g'ọ buru mu be aa-nodu ata uta iya jaswaruro. ¹⁰Ọme anyi te eshi teke-a noduta; me anyi ejeakwa mgbo labo lwachawa.”

¹¹Nna phẹ, bụ Ízurelu sụ phẹ: “Ọ -bukpowaru l'ọo ẹgube ono bụ g'e mefutaje iya bukwa iphe, unu e-me bụ g'unu wota mebyi iphe, kachaa ree, shi l'alị-a yee l'eda unu, unu a-nu nwoke ono. Unu meta nwa manụ bamu; waa nwa manụ-ẹnwu; waa etse; waa manụ meru; waa akpuru oshi pisutasho; waa akpuru oshi alumundu. ¹²Unu wota okpoga mkpola-ochaa, ha g'ophu unu gude ogiya ophuu ugbo labo; kele unu e-je anu-phu phẹ ophuu, e yeru l'onu eda unu pho azu. ?A maru ?to bụdu nu emeswe be

ephē mesweru iya? ¹³Ngwa; unu duta nwune unu obu gude jepfu nwoke obu! ¹⁴Gē Chileke, bu Okwoolemka mee gē nwoke ono phuru unu obu-imemini; k'ophu oo-kwe gē nwune unu ophuu; waa Benjiaminu tuko swiru Iwa. O -buru kē mbedua; o -buru l'oo aphu a-tsoṛu mu; g'ō tsoṛu mu rō.”

¹⁵Oo ya bu; unwoke ono bya egweta iphe-anunu ono; bya ewota okpoga mkpola-ochaa ugbo labo; bya eduta Benjiaminu; ephē jeshia alì Ijiputu. Ephē rwua bya apfuru l'iphu Jiófēfu. ¹⁶Jiófēfu hūmaepho l'ephe lē Benjiaminu swi; o sū onye-ozì ọ̀lo iya: “Duta ndu ono gude la ibe mu. Unu aphu anu tērii gude shia ite; kēle mu l'unwoke-a e-riḡbakwa nri-eswe.”

¹⁷Nwoke ono bya emee gē Jiófēfu pfuru; bya eduta phē lashià l'ọ̀lo Jiófēfu. ¹⁸Ndzū wata agū unwoke ono; kēle e dutaru phē je edobe l'ọ̀lo Jiófēfu. Ephē sū: “Iphe, e gude chiru anyi bya edobe l'eka-a a-bukwaru-a k'okpoga mkpola-ochaa pho, e yephuru anyi azu l'eda lē mboku kē mbu pho, anyi byaru pho. O kwa iphe, ocho bu iphe, o-sū l'anyi meru kobe anyi opfu; mee anyi ohu iya; anyi lē nkafu-igara anyi.”

¹⁹Noo ya; ephē jepfu onye-ozì Jiófēfu l'onu mgbo ọ̀lo ono bya asu iya: ²⁰“Jiko nnajiuphu; g'anyi byaru oḡiya ophuu bya azuta nri; ²¹bē anyi lashià bya ejerwua l'ọ̀lo ndu ije; anyi jeshia atoha eda anyi; bya ejeshia ele enya; okpoga onyemonye nodugbawa l'onu eda iya. Mbū; okpoga anyi obu hachaepho g'ō ha. Nta-a bē anyi gudekwa iya wophuta azu. ²²Anyi gudefukwapho okpoga ozo, anyi e-gude zutaba nri. Anyi ta amakwa onye woru okpoga anyi ono yephuru anyi azu l'eda.”

²³O sū phē: “G'ehu dukwa unu guu! Gē ndzū ta agushi unu! Oo Chileke unu; waa kē nna unu bē yeru okpoga l'eda unu. Mu natakwaru-a okpoga unu oḡiya ono.” O je atufuta Simiyonu duta byapfuta phē.

²⁴Onye-ozì Jiófēfu duta ndu ono je edobe l'ọ̀lo Jiófēfu ono; bya ekee phē mini; ephē kwō okpa; bya anu nkafu-igara phē nri. ²⁵Ephē bya akwakobe iphe, ephē gude, ephē a-nū Jiófēfu-a; mbū iphe, ephē a-nū iya mē o lwaepho l'eswe; kēle ephē nūmaru l'oo l'eka ono bē ephē e-ri nri.

²⁶Jiófēfu lwaepho unuphu; ephē wota iphe, ephē shi l'unuphu gude, ephē a-nū iya woru nū iya; ephē buaru iya iphu l'alì gude phozeru iya. ²⁷O bya ajiebekpo phē g'ephe dū sū phē: “?Denu gē nna unu nwoke ogere-nya-a, unu pfuru mu opfu iya-a dū? ?O dzukwadu-a ndzū?”

²⁸Ephē sū iya: “Onye-ozì ngu, bu nna phē bē nokwa-a ndzū; tēme ehu dukwa iya pho ree.” Ephē bya ephoze ishi baaru iya eja.

²⁹O bya apalia enya bya ahuma nwune iya, bu Benjiaminu, onye ophu nene iya nwukpooru gedegede. O sū: “?Bu nwune unu kē nwata, unu pfuru mu opfu iya obu baa?” O sū iya: “Nwa mu; gē Chileke meeru ngu eze-iphe-oma!” ³⁰Imemini nwune iya ono dū iya. Jiófēfu tugbua egwegwa; je acho eka oo-nodu raa ekwa. O bahu lē mkpulabo iya je anodu raa ekwa obu.

³¹Ọ swachaephophu iphu; ọ lufuta ọzo; bya egude ẹka l'obu sù g'e wotaru phẹ nri-a.

³²E doberu Jiófẹfu nkiya iche; bya edoberu unwunna iya phẹ nkephẹ iche; bya edoberu ndu Ijiputu, ephe l'iya erigba nri nkephẹ iche; noo kele ndu Ijiputu bẹ ephe lẹ ndu Hiburu te erigbabejedu nri; kele ọ bụ ẹyi l'alì Ijiputu. ³³Ndu ono bẹ e doru; ephe gharu Jiófẹfu iphu; doo phẹ g'ogereanya phẹ becharu. A -gbẹ l'okpara jasù l'onye ophu bụcha nwata. Ephe ghachaa ẹnya lee nwibe phẹ gude goshi g'ọ dọ-be phẹ biribiri. ³⁴E shiẹpho lẹ teburu kẹ Jiófẹfu hẹe phẹ iphe. Oke-iphe kẹ Benjaminu gude ọzo oke ise kachaa kẹ ndu ophuu shii. Ephe tuko tsoru Jiófẹfu ria nri; bya angua g'ọ dọ phẹ.

Okoro mkpọla-ọchaa Jiófẹfu

44 ¹Noo ya; Jiófẹfu sù onye-ozì ọlọ iya: “Je akwajishichaaru ndu ono nri l'ẹda phẹ; ọo ẹpho g'ẹphẹ a-dù ike vuru bẹ ii-yeru phẹ; tẹmẹ l'iiyephuchaaru onyemonye okpoga iya azù l'ọnu ẹda iya. ²Liiwota okoro mkpọla-ọchaa mu ono woru ye l'ọnu ẹda onye kẹ nwata; tẹmẹ wakwaphọ okpoga, o gude bya azuta nri.” O bya emee gẹ Jiófẹfu pfuru iya.

³Nchi bọhuepho; ndu ono tųgbua lashia; yee nkafu-igara phẹ. ⁴Ephe shi lẹ mkpukpu ono tųgbua; ọle ephe teke atųgbu-mihudu lẹ teke Jiófẹfu sùru onye-ozì iya: “Chipyabe ndu ono nta-a; teke i gbapfueru phẹ pho; sù phẹ: “?Denu g'ọ nwuru unu gude ejo-iphe pfua ugwo iphe-oma, e meru unu? ⁵?Tobudu okoro, nnajiphu mu anguje mini; tẹmẹ ọ nodu egudeje iya aphu ophulenyà bẹ unu gude nno? Iphe ono, unu meru ono bukwa ejo-iphe bẹ unu meru!”

⁶Ọ gbapfu phẹ bya eworu iphe ono pfushikotaru phẹ. ⁷Ephe sù iya: “?Denu g'ọ nwuru gube nnajiphu anyi pfuru iphe, dù nno? Tųswekwa! Anyibe ndu-ozì ngu ta adukwa onye turu ama eme iphe, dù nno! ⁸Tẹmẹ anyi shi l'alì Kėnanu wolatakwaruro unu okpoga, anyi humaru l'ọnu ẹda anyi. ?Denu g'anyi e-shi zita mkpọla-ododo; ọzoo k'ocha l'ọlọ ibe nnajiphu ngu? ⁹Ọ -buru l'ọ duru onye lanu l'ime anyibe ndu-ozì ngu, a humaru iya l'iphe iya; g'e gbua onye obu egbugbu; anyibe ndu ophuu abukpooruro ohu gube nnajiphu anyi.”

¹⁰Ọ sù phẹ: “Ọ dù ree; g'ọ dù g'unu pfuru. Onye a humaru, gude iya nù bẹ a-buru ohu mu; unube ndu ophuu ta adukwa onye bya ata unu uta.”

¹¹Onyenonu bya ezia ẹda iya l'alì egwegwa; bya atohaa ya. ¹²Onye-ozì ono bya awata iya achọcho; shi l'onye ophu bụcha ogerenya jasù l'onye ophu bụcha nwata. A huma okoro ono l'ẹda Benjaminu. ¹³Ephe woru uwe phẹ gbajashia bya ebogbaa nkafu-igara phẹ ivu phẹ; bya adakobe laphushia azù lẹ mkpukpu ono.

¹⁴Jiófẹfu nodukwadu l'ọlọ teke Jiuda yee unwunna iya bataru; bya azeephopho kẹ bee l'ataphu iya. ¹⁵Jiófẹfu sù phẹ: “?Denu g'ọ nwuru

unu meru iphe, du nno? ?Unu ta amadu l'onye gbaru ge mu aphuje ophulunya?"

¹⁶ Jiuda su: "Bu gunu be anyi a-du ike pfiaru gube nnajiuphu mu? ?Denu g'anyi e-shi su l'anyi pfuberu-eka-oto? Chileke mewaru g'ejo-iphe ndu-ozu ngu gbafta iphe. Anyi buwaa ohu gube nnajiuphu anyi; anyibe-dua; waa onye a humaru okoro ono l'eka."

¹⁷ Obenu le Jiosefu suru: "Tuswekwa! Mu ta abyakwa eme iphe, du nno; oo onye a humaru okoro ono l'iphe iya be a-buru ohu mu. Unube ndu ophu lashikporo le chiriri werere lapfu nna unu."

¹⁸ Noo ya; Jiuda bya ejepfu iya bya asu iya: "Gube nnajiuphu mu; kwenu ge mube onye-ozu ngu pfuru nwakpuru opfu lanu ye gube nnajiuphu mu le nchi. Oo eviya l'unu le Fero buwaa iphe lanu; ole jiko nu; gumere mube onye-ozu ngu te emeshi nu g'ehu ghua ngu egu. ¹⁹ Gube nnajiuphu mu jiru anyibe ndu-ozu ngu su: '?Unu nweru nna; waa nwune ozo to?' ²⁰ Anyi su gube nnajiuphu mu le nna anyi bukwa nwoke ogerenya; teme lo nweru nwata okoro, a nwuru iya le nka. Nwune iya nwuhuwaru; o buwaru yebdua nwekinyi iya ghuduru l'epho ne iya; teme nna iya ye iya obu shingushingu.

²¹ "Tobudu iya bu; i su anyibe ndu-ozu ngu g'anyi dutaru ngu iya gi huma. ²² Anyi su gube nnajiuphu anyi le nwata ono ta atugbukwa atugbu l'eka nna iya no. O -buru lo tugburu be nna iya a-nwuhukwa. ²³ Obenu li suru anyibe ndu-ozu ngu: 'O -buru le nwune anyi ke nwata te etsoduru anyi bya eka-a be anyi ta ahumabaedu iphu ngu.' ²⁴ Anyi laphuepho azu lapfu onye-ozu ngu, bu nana anyi. Anyi bya epfiaru iya iphe, gube nnajiuphu anyi pfuru.

²⁵ "Noo ya; nna anyi su: 'Unu tugbua je azutaba nri!' ²⁶ Anyi su iya: 'Anyi te ejekwa; abudu le nwanna anyi ke nwata be anyi eya swi; oo ya bu anyi eje; kele anyi ta ahumabaedu iphu nwoke ono; abudu l'anyi le nwanna anyi ke nwata swi.'

²⁷ "Onye-ozu ngu, bu nna anyi su anyi: '?O kwa l'unu maru-a le nyee ya bu unwegirima unwoke labo bo nwutaru. ²⁸ Ophu onye lanu anoedu; mu su l'anu-egbudu lajashiwaru iya; e-shi teke ono ophu mu ahumabaeduru iya. ²⁹ O -buru l'unu dutafuaru onye owa tugbua; iphe-kpanganga -mee ya be unu e-mekwa g'ishi ewo mu gude aphu kpuba l'ali.'

³⁰ "Oo ya bu; o -buru le nwata ono te etsodu anyi laphu azu jepfu onye-ozu ngu, bu nna anyi; teme o -buru le nna anyi, bu onye wotawaru ndzu nkiya tuswia le ke nwata-a ³¹ humaru l'anyi le nwata ono ta aswidu be oo-nwuhukwa. Anyibe ndu-ozu ngu e-shi nno mee ge nna anyi guru aphu gude ishi ewo iya kpuba l'ali; ³² kele mube onye-ozu ngu no-dokwaru nwata ono l'itumo l'eka nna mu. Mbule mu suru nna mu le teke mu te eduphutaduru iya ya azu; g'o buru mu be aa-nodu ata uta iya jaswaruro.

³³ "Oo ya bu; jiko ge mube onye-ozu ngu no-chinuru nwata ono l'eka-a buru ohu ngu. Haa nwata ono g'ephe l'unwune iya ndu ophu swiru lasha; ³⁴ kele-a; ?denu ge mu e-shi lapfu nna mu; m'o buru le nwata ono be

anyi l'iya ta aswidu? Jiko te ekwekwa ge mu je ahuma egube aphu, a-tso-ru nna mu!”

Jiosefu eme g'unwunna iya maru iya

45 ¹Noo ya; ophu Jiosefu adudu ike sede onwiya ozo l'ataphu iphe, bu ndu-ozu iya, pfu-kuberu iya nu. O chia mkpu; su: “Unu mee g'onnyemone tugbua lufu l'ataphu mu!” A tuko wufu; ophu o dudu onye ephe l'iya nokwadu l'eka ono. Tobudu iya bu; Jiosefu gbete keke ono bya emee g'unwunna iya maru onye ya bu. ²O bya arashikpo ekwa ike k'ophu ndu Ijiputu numaru iya; teme ndibe Fero numakwa iya pho.

³Jiosefu su unwunna iya ono: “O kwa mbedua bu Jiosefu obu! Mbu-a; ?nna mu nokwadu ndzu to?” Ophu unwunna iya adudu ike ye onu yeru iya; noo kele ndzu rwupyaberu phe l'ataphu iya.

⁴Noo ya; Jiosefu su unwunna iya: “Unu jiko kpiritaru mu ntse!” Ephe kwe hm bya akpiritaru iya ntse. O su phe: “O kwa mbedua bu nwanna unu, bu Jiosefu; onye ophu unu reru; e gude iya lashia ali Ijiputu-a. ⁵Ole g'aphu te jishi unu obu; ophu ehu anodushi egu unu egu l'unu reru mu; noo kele o o ge mu dzoo unu ndzu meru g'o gude Chileke zia mu ge mu vuru unu uzo. ⁶Okpa-nri mewaru apha labo l'ali-a; teme l'ime apha ise, abya nu be o to dudu onye a-kobe iphe l'ali; ophu o buro k'akpata iphe, shi iya nu. ⁷Obenu le Chileke ziru mu ge mu vuru unu uzo; k'ophu mu e-me g'awa unu phodu le mgboko; waa ge mu a-dzota ndzu unu l'uzo, du biribiri.

⁸“Oo ya bu le-a; o to bukwa unubedua ziru mu ge mu bya l'eka-a; o kwa Chileke. Teme o buru iya meru mu onye akpo-zijeru Fero uzo; bya emee mu onye elekota ibe iya l'ophu; waa onye-ishi ndu Ijiputu l'ophu. ⁹Nta-a bukwa g'unu tugbua egwegwa lapfu nna mu je asu iya le mube nwa iya, bu Jiosefu sukwaru le Chileke mewaru mu nnajiuphu ndu Ijiputu l'ophu. G'o lwatashikwa lwapfuta mu; g'o to jekwa akpo upfu; ¹⁰l'eka oo-buru bu l'ali Goshenu; l'eka oo-no-kube mu ntse; yebedua yee unwegirima ibe iya; waa unwu nwanwa iya; waa aturu iya; waa eswi iya; mewaro iphemiphe, o nwekporu enweru g'o ha. ¹¹Loo-buru l'eka ono; mu a-zu iya; noo kele apha ise, egu e-mefua nokwadu l'iphu. Odumeka be okpa-nri a-dapfukwa yebedua yee ndibe iya l'ophu; waa iphemiphe, o nwekporu enweru g'o ha.

¹²“Unubedua humawaru l'onwunu; teme nwune mu Benjiaminu humakwapho l'oo mbedua epfu opfu eyeru unu eviya. ¹³Unu kokotaru nna mu k'egube ubvu, a kwaberu mu l'ali Ijiputu; teme waa k'iphemiphe, unu humakotaru l'onwunu. Unu je egwegwa je edutaru mu nna mu!”

¹⁴Noo ya; o gbaka nwune iya, bu Benjiaminu eka l'olu bya awaa ekwa; Benjiaminu bya azukobe iya wata ara ekwa nkiya. ¹⁵O bya etsutsua unwune iya ono onu g'ephe ha; bya araru ekwa kpua phe. E mecha; ephe l'unwune iya ono wata abo uja.

¹⁶Noo ya; nzi ono rwuepho l'ibe Fero l'unwunna Jiósefu byaru; ehu tsoo Fero yee ndu-ozí iya g'ephe ha uto. ¹⁷Fero su Jiósefu: "Pfuaru unwunna ngu su phe g'ephe wota ivu phe tukobe l'eli anu phe gude lasha alí Kénanu ¹⁸je eduta nna phe; waa ndibe phe l'ophu gude lwafuta iya. Mu a-nu phe alí Ijiputu eka kachaa ree. Mbú l'oo eguru iphe, shi l'alí ono be ephe a-nodu eri. ¹⁹Temé l'iisukwa phe pho g'ephe pata ugbo-inya ndu Ijiputu gude pata unwegirima phe; yee unyomu phe; waa nna phe gude bya. ²⁰Su phe g'ephe ta ayoshi oshi k'eku phe; noo kele iphe, kachaa ree l'alí Ijiputu bú nkephe."

²¹Unwu Ízurelu bya emee nno. Jiósefu bya anu phe ugbo-inya, dú ge Fero pfuru; bya anukwa phe pho nri, ephe e-ri l'ije ono. ²²O bya anuchaa phe uwe ophúú. O be le Benjiaminu; o nu iya eka mkpola-ochaa eto; waa uto uwe ise. ²³Iphe, o nuru g'a nu nna iya bú: Nkapfu-igara iri, e dojiru iphe, kachaa ree le Ijiputu edoji; teme waa ne nkapfu-igara iri, e dojiru ereshi; waa buredi; mewaro iphe ozo, bú iphe, nna iya e-rije l'uto teke oo-nodu abya. ²⁴Oo ya bú; o zia unwunna iya ono g'ephe tugbua lasha. O su phe g'ephe ta swokwa uswo l'uto.

²⁵Oo ya bú; ephe shi l'alí Ijiputu tugbua lapfushia nna phe, bú Jiéko- pu l'alí Kénanu. ²⁶Ephe su iya: "Jiósefu nokwa ndzu! Mbú l'oo yebdua bú onye-ishi ndu Ijiputu l'ophu." O tufu Jiéko- pu ehu; ophu o kwetaduru l'oo eviya. ²⁷Obenu l'ephe bya atukoephe iphemiphe, Jiósefu pfuru phe pfushikota; o humae- pho ugbo-inya, Jiósefu nuru g'e gude bya apata iya; unme lwa nna phe azu l'oru iya. ²⁸O su: "Nta-a be mu kwetawaru le nwa mu Jiósefu nokwadu ndzu. Mu e-je ahuma iya enya teme mu anwuhu."

Jiéko- pu ala Ijiputu

46 ¹Noo ya; Ízurelu bya egweta iphe, bú nkiya tugbua. O rwuepho mkpukpu Biye-Sheba bya egweeru Chileke nna iya, bú Ayizaku ngweja.

²Noo ya; Chileke bya epfuru opfu yeru Ízurelu l'enyashi shita l'ophule- nya su iya: "Jiéko- pu! Jiéko- pu!"

O za iya enu. ³O su iya: "Oo mbdua bú Chileke; mbú Chileke ke nna ngu phe." Su: "Ge ndzu ala Ijiputu ta agushi ngu; noo kele mu e-me ngu g'i buru oha, paru eka leka ono. ⁴Mu e-tsoru ngu je alí Ijiputu; teme mu eduphutakwa ngu pho azu ozo. Temé oo Jiósefu ono gedegede a-nodukpo swiru ngu teke ii-nwuhu."

⁵Noo ya; Jiéko- pu paru Biye-Sheba haa tugbua. Unwu Ízurelu bya apata nna phe, bú Jiéko- pu; waa unwu phe; waa unyomu phe l'ugbo-inya ono, Fero nuru g'e gude pata iya ono. ⁶Ephe rwutakwapho iphe-edobe phe; waa eku, ephe setaru l'alí Kénanu. Jiéko- pu yee oshilokpa iya l'ophu lasha Ijiputu. ⁷O bya edutakwapho unwu iya nwoke; waa unwu nwanwa iya nwoke; waa unwu iya nwanyi; waa unwu nwanwa iya nwanyi. O tuko iphe, bukota awa iya l'ophu rwuta gude lasha Ijiputu.

⁸Waa epha unwu Ízurelu, laru alí Ijiputu baa; mbu Jiékoṗu; yee oshilo-kpa iya:

Rúbenu, bu okpara Jiékoṗu.

⁹Unwu ke Rúbenu bu Hanoku; waa Palu; waa Hezuronu; waa Kami.

¹⁰Unwu ke Simiyonu bu Jimelu; waa Jiaminu; waa Ohadu; waa Jiakinu; waa Zoha; teme waa Shawulu; onye o nwuru; mbu nwanyi, shi l'alí Kénanu.

¹¹Unwu ke Lívayi bu Geshonu; waa Kohatu; teme waa Merari.

¹²Unwu ke Jiuda bu Eru; waa Onanu; waa Shela; waa Pérezu; waa Zera. Eru waa Onanu tuko nwushihuwa l'alí Kénanu. Unwu Pérezu bu Hezuronu; waa Hamulu.

¹³Unwu ke Isaka bu Tola; waa Puwa waa Jiobu; teme waa Shimuronu.

¹⁴Unwu ke Zebulun bu Seredu; waa Elonu; teme waa Jahulelu.

¹⁵Ndu ono g'ephe ha bu unwu, Lii nwutaru Jiékoṗu le Padanu-Arámu; a -gufukwa Dayina, bu nwa iya nwanyi. Unwu nwa nwoke iya ono yee ke nwanyi du umadzu ukporo l'iri l'eto mpakota iya.

¹⁶Unwu ke Gadu bu Zefonu; waa Hagi; waa Shuni; waa Ezubonu; waa Eri; waa Arodi; teme waa Areli.

¹⁷Unwu ke Asha bu Imuna; waa Ishiva; waa Ishivi; teme waa Beraya. Nwune phe ke nwanyi bu Sera. Unwu Beraya bu Heba; waa Malukelu.

¹⁸Ndu ono bu unwu, Zilipa, nwutaru Jiékoṗu; mbu onye Lebanu kuru nu nwa iya nwanyi, bu Lii g'o buru ohu iya. Iphe, ephedua tukoru du bu umadzu iri l'ishii.

¹⁹Unwu, Rechielu, nyee Jiékoṗu bu Jiósefu yee Benjiaminu. ²⁰L'alí Ijiputu be Jiósefu no nwuta Manáse waa Ifuremu. O buru nwanyi, nwuru Jiósefu unwegirima ono bu Asenatu, bu nwada Potifera onye ishi-uke ndu Onu.

²¹Unwu ke Benjiaminu bu Bela; waa Beka; waa Ashibelu; waa Gera; waa Nemanu; waa Ehi; waa Roshi; waa Mupimu; waa Hupimu; teme waa Arudu.

²²Ndu ono bu unwu, Rechielu nwutaru Jiékoṗu. Ephe du umadzu iri l'eno le mpakota iya.

²³Nwa ke Danu bu Hushimu.

²⁴Unwu ke Nafutali bu Jiahuzelu; waa Guni; waa Jieza; teme waa Shilemu.

²⁵Ndu ono bu unwu, Biliha, nwutaru Jiékoṗu; mbu onye Lebanu kuru nu nwa iya nwanyi, bu Rechielu g'o buru ohu iya. Ephe du umadzu esaa le mpakota iya.

²⁶Ndu tso Jiékoṗu laa Ijiputu; a -gufukwa unyomu unwu iya; mbu ndu ophu bu oshilo-kpa iya gedegede du umadzu ukporo eto l'umadzu ishii. ²⁷A -bya eyekobe iya unwu labo ke Jiósefu, a nwutaru Jiósefu le Ijiputu; oshilo-kpa Jiékoṗu, laru Ijiputu du umadzu ukporo eto l'iri le mpakota iya.

²⁸Noo ya; Jiékoṗu bya ezifū Jiuda g'o vuru ʒzo jepfu Jiósefu; je eduta iya g'ephe dzuda l'alì Goshenu. Ephe jee jasū l'alì Goshenu oḅu; ²⁹Jiósēfu byanu edozichaa ʒgbo-inya iya; bya ejeshia alì Goshenu gē yeḷe nna iya, bụ Ízureḷu dzuda. O bya egoshi iya onwiya bya agbakya ya ẹka l'olu; kuka ya l'olu l'eka ono wata ẹkwa; raa ya noo odu.

³⁰Ízureḷu sū Jiósēfu: “Gē mu nwuhwaro nta-a; eshi oḅu mu gudewaa enya mu ephenebo huma l'ì nọkwadu-a ndzū!”

³¹Noo ya; Jiósēfu sū ʒnwunna iya; waa ndibe nna iya l'ophu: “Mu ejepfu Fero je asū iya l'ʒnwunna mu; waa ndibe nna mu l'ophu, shi buru l'alì Kėnanu bē lwapfutawaru mu nū. ³²Ndu ono bụ ndu eche aturu; mbu l'ephe bụ ndu azū iphe-edobe; tēme waa l'ephe tukowa iphe phe; mēcha aturu phe; mē eswi phe; mēkpoo iphe phe g'ọ ha rwuta. ³³Teke Fero kuru unu bya asū: “Bū gūnu bụ akanya, unu maru esese?” ³⁴Unu sūkwa iya l'unubē ndu-ozì iya shikwa teke unu bụ nwata buru ndu azū iphe-edobe; ẹgube gē nna unu oche phe shihawaa bataru iya. Oo ya bụ leekwe g'unu buru l'alì Goshenu; noo kēle ndu eche aturu dū ndu Ijiputu ashì.”

47 ¹Jiósēfu bya ejepfu Fero je asū iya: “Nna mu yē ʒnwunna mu; waa aturu phe; waa eswi phe; yē iphe, ephe nweru enweru g'ọ ha bē shiakwa l'alì Kėnanu byarwuta Goshenu.” ²O bya ahota ʒnwunna iya ono ʒmadzu ise; bya eduru phe jepfu Fero.

³Fero bya aja ʒnwunna Jiósēfu sū phe: “?bū gūnu bụ akanya, unu maru esese?”

Ephe sū Fero: “Anyibe ndu-ozì ngu bukwa ndu eche aturu. O kwapho ẹgube ono bụ gē nna anyi oche phe shi bukwaru iya pho.” ⁴Ephe sūkwa iya pho: “Anyi byaru ebutota l'eka-a; noo kēle okpa-nri parū ẹka l'alì Kėnanu; oḅu aturu anyibe ndu-ozì ngu enwedu ẹka o-tajē nri. Jiko hanaa g'anyibe ndu-ozì ngu buru l'alì Goshenu.”

⁵Fero sū Jiósēfu: “Nna ngu; waa ʒnwunna ngu byapfutaakwaru ngu. ⁶Tēme alì Ijiputu buwaru ngu bē o nọ l'eka. Hata ẹka kachaa ree l'alì-a woru nū nna ngu; yē ʒnwunna ngu g'ephe buru. Mbū-a; woru alì Goshenu nū phe g'ephe buru. O -buru l'ì maru ndu oḅu ejeshi ozi ike l'echilabo phe l'iimee phe ndu a-noduje echeru mu iphe-edobe nkemu.”

⁷Noo ya; Jiósēfu bya eduta nna iya, bụ Jiékoṗu; bya eduru jepfu Fero. Jiékoṗu bya agoru onu-oma nū Fero; ⁸Noo ya; Fero bya asū Jiékoṗu: “Ì nọwaru apha ole?”

⁹Jiékoṗu sū Fero: “Apha, mu nọwaru lē mgboko bē rwuakwaru ʒkporo apha ishii l'apha iri. Apha, mu nọwaru hakwa nwanshì; ọle ọo ephe ehuka bē mu gude ejeje; o nọdu eme gē mu ta nọ-rwu gē ndiche mu phe nọ-rwuru lē mgboko.” ¹⁰Jiékoṗu bya agoru Fero onu-oma; bya aburu iya atugbu.

¹¹Oo ya bụ; Jiósēfu bya emee gē nna iya; waa ʒnwunna iya buru lē Ijiputu. O nū phe alì Ijiputu ẹka kachaa ree g'ephe buru, bụ iya bụ alì

Ramesesu, bu egube Fero suru g'o mee ya. ¹² Jiosefu nodu azukwapho nna iya; waa unwunna iya; waa iphe, bukota ndibe nna iya l'ophu le nri. Oo epho g'unwegirima phe habe bu g'onu-bejeru phe nri.

Jiosefu yele okpa-nri ono

¹³ Nri bvukotawa l'ali ono mgburugburu; noo kele egu ono paru aka. Ali Ijiputu me ali Kenuu tuko gbajoshihu; o buru shita l'okpa-nri ono. ¹⁴ Ndu Ijiputu; yee Kenuu tuko okpoga, no l'ali phe gude pfu-gbua Jiosefu aswa nri, ephe zataru. Jiosefu vutakota okpoga ono je akube l'ulo Fero. ¹⁵ Okpoga ndu Ijiputu yee Kenuu -bvuepho; ndu Ijiputu lwafuta Jiosefu bya asu iya: "Nu anyi nri! ?Denu g'o nwuru anyi a-nodu l'ataphu ngu nwushihi? Okpoga anyi be anyi kpagbuakwaru le nri."

¹⁶ Jiosefu su phe: "Eshi ophu okpoga unu buwaru; unu kputajenu ru mu iphe-edobe unu; ge mu gude ree unu nri." ¹⁷ Oo ya bu; ephe nodu akputajeru Jiosefu iphe-edobe phe; mbu inya phe; me aturu phe; me egbu phe; me eswi phe; me nkafu-igara phe. O nodu egudeje nri gbanweta phe iphe-edobe phe; shi nno zukota phe apha ono l'ophu.

¹⁸ Apha k'ono -bvuepho; ephe byafuta iya l'apha ophu tsotaru iya nu bya asu iya: "Anyi te ewohakwaru gube nnajiuphu anyi iphe l'eshi ophu okpoga anyi buwaru; teme iphe-edobe anyi bukotawaru nkengu; nta te nwehekwa iphe, anyi e-gude pfua gube nnajiuphu anyi; abudu ishi onwanyi; waa ali anyi kpoloko. ¹⁹ ?Denu g'o nwuru anyi a-nodu l'ataphu ngu nwushihi; anyibedua l'ishi onwanyi; waa ali anyi? Zua ali anyi; waa ishi onwanyi; gi nuje anyi nri. G'ali anyi buwaruro ke Fero. Teme anyibedua l'ishi onwanyi abukwarupho ohu iya. Nu anyi akpuru iphe-akuku; g'anyi ta nwuhushi; k'ophu ali-a ta abuduru echiegu."

²⁰ Noo ya; Jiosefu bya azutakotaru Fero ali Ijiputu l'ophu. Ndu Ijiputu gephe ha rekota ali phe; noo kele egu ono shi menuka phe. Ali ono bukotaru ke Fero. ²¹ Jiosefu mee ndu Ijiputu; shita l'ishi iya ophuu jasu l'ishi iya ophuu ohu. ²² Ali lanu, o zuduru l'ali ono l'ophu bu ali ndu-uke; noo kele oo Fero anu phe nri. Teme nri k'ono, Fero eketaje nu phe ono nodu asujeru phe. Noo iphe, meru g'o gude ophu ephe ereduru nkephe.

²³ Jiosefu su phe: "Eshinu mu zuru unu; waa ali unu ntanu-a nu Fero; wakwa akpuru-iphe, unu a-ko-be l'ali baa. ²⁴ Ole unu -kpatachae ya pho; unu keje iya uzo ise nu Fero oke lanu. Uzo eno k'ophuu be unu e-dobe g'o buru ophu unu a-ko-phi azu l'ali. Teme o bukwaru iya pho be unu; waa ndu unu l'ephe bu; waa unwegirima ibe unu e-rije."

²⁵ Ephe su iya: "I dzoru anyi ndzu! Jiko g'anyi du gube nnajiuphu anyi l'obu! Anyi a-bukpooruro ohu Fero."

²⁶ Jiosefu bya eworu ekemu tua l'ali Ijiputu. Teme ekemu ono be eeme-kwa byasu ntanu-a. O suru l'oke lanu l'uzo ise l'iphe, a kpataru l'opfu be aa-nuje Fero. O buepho ali ndu-uke be ta abudu ke Fero kpoloko.

²⁷Ndu Ízurelu bya eburu l'alì Ijiputu l'alì Goshenu. Ephe buru l'eka ono daa eku; bya azua ka l'otu.

²⁸Jiékoṗu bua l'alì ndu Ijiputu mgbarapha iri l'esa; jasú teke o nọ-rwuru mgbarapha ukporo esaa l'apha esaa. ²⁹O rwujeepho Ízurelu l'anwuhu; o kua nwa iya, bu Jióséfú bya asú iya: “O -buru l'i yeru mu obu; jiko chinuru eka ye mu lehe riaru mu angú; l'ii-goshi mu l'i yeru mu obu bya aburu onye apfushi-je ike l'iphe, i pfuru; l'i tii lidu mu l'alì Ijiputu. ³⁰Mu -nwuhuepho lapfu nna mu oche phe; patakwa mu pafu l'alì Ijiputu je elia mu l'eka e liru ephenedua!”

Jióséfú sù iya: “Mu e-mekota g'i pfuru.”

³¹O sù iya g'o riaru iya nte l'oo-me iya. Jióséfú bya eriaru iya nte obu. Jiékoṗu zè l'iphe-azèe ya phoze ishi gude baaru Chileke eja.

Onu-oma, Jiékoṗu ago anu Manáse; waa Ifuremu

48 ¹Noo ya; o be ujiku lanu; g'iphemiphe ono mechaaru; a bya ezia Jióséfú lè nna iya bè iphe emekwa. O duta unwu iya ephenebo; Manáse; waa Ifuremu gude jeshia. ²A sùepho Jiékoṗu: “O kwa Jióséfú nwa ngu byapfutaru ngu nta-a.” O rokota ike; bya agbeshi nodu anọ l'iphe, o o zeje azèe.

³Jiékoṗu sù Jióséfú: “Chileke, bu Okwoolemka byapfutakwaru mu lè Luzu, nọ l'alì Kénanu; bya agoru onu-oma nu mu l'eka ono; ⁴sù mu: ‘Le-kwa; mu e-me ngu g'i zua azuzù; bya emee g'unu du l'otu. Mu e-me ngu g'i buru oha eka ngu; teme mu anu ngu alì-a g'o buru oke-iphe oshilokpa ngu jasú lè tuutuutuu lè mimiimii.’”

⁵Jiékoṗu sù iya: “Unwegirima labo, i nwutaru l'alì Ijiputu teme mu bya pho; mbu Ifuremu waa Manáse bè mu wotaru g'unwu, mu nwuru lonwomu; egube Rúbenu; waa Simiyonu bu unwu mu ono. ⁶Unwu ozo, aa-gbè nta-a nwutaru ngu a-buru unwu nkengu. Oke alì ophu ephenedua a-hata bè e-shi l'eka unwune phe, bu Ifuremu; waa Manáse. ⁷Gè mu shi alì Pada-nu alwa bè aphu jiru mu obu teke Rechielu nwuhuru l'alì Kénanu g'anyi nokwadu lè gbororo lè mgboru alì Ifurata. Mu woru iya lia l'aguga uzo; l'alì Ifuratu, bu iya bu Bètulehemu.”

⁸Ízurelu huma unwu Jióséfú bya asú iya: “?Bu ndu ole baa?”

⁹Jióséfú sù nna iya: “O kwa unwu, Chileke nuru mu.”

Ízurelu sù iya: “Dutaru mu phe gè mu goru onu-oma nu phe.”

¹⁰Teke ono bè Ízurelu aphuwaa ragaraga; kele o kahwaru. O to o phu-rweedu aphu-rwe. Jióséfú duritaru iya unwu iya ono ntse; nna iya bya etsutsua phe onu; bya anmata phe akpa.

¹¹Ízurelu sù Jióséfú: “Mu te eshikwa arikwadu lè mu e-mecha humaba ngu akpuru-nya ozobaa; Chileke mechaa bya ahaa mu; mu humafua unwu ngu yekobe iya.”

¹²Jióséfú bya eduritaru phe lè mgboru ikpere nna iya; bya ephureta kpube iphu l'alì. ¹³Noo ya; Jióséfú bya esekputa ephenebo l'eka. Ifuremu bè o sekpu

l'ekutara; o no dukwanu Ízurelu l'ekicha; o sekpuru Manáse l'ekicha; o no du Ízurelu l'ekutara. O gude phe egube ono byakube Ízurelu ntse. ¹⁴Obenu le Ízurelu byaru lagoru onu-oma nu phe; o gbanga eka iya ephenebo; woru ekutara iya byabẹ Ifuremu, bu onye ke nwata l'ishi; bya atụ-kobe Manáse, bu okpara ekicha.

¹⁵O bya agoru Jiósefu onu-oma su:

“Ge Chileke ono,
nna mu oche phe,
bu Ébirihamu;
waa Áyizaku tsoru uzo iya ono
kebe unwegirima-a l'oma.

Mbu Chileke ono,
bu Onye-nche mu
e -shi teke a nwuru mu
byasu nta-a.

¹⁶Oo ya bu Ojozi-imigwe ono,
dzotakotaru mu nu
l'eka iphe, bu ejo-iphe,
byapfutaru mu nu ono.

Ge kujekwa epha unwegirima-a
laa l'epha mu;
waa le ke nna mu oche phe,
bu Ébirihamu; waa Áyizaku.

Temẹ epe adukwapho lotu
le mgboko-a.”

¹⁷Jiósẹfu humaephe le nna iya woru ekutara tu-kobe Ifuremu l'ishi; ehu gbangahu iya. O je azu nna iya l'eka; go lotu iya eka l'ishi Ifuremu lota tu-kobe l'ishi ke Manáse. ¹⁸Jiósẹfu su nna iya: “Waawakwa nna; o kwa onye k'ogeranya baa! Wokwaru ekutara byabẹ yebedua l'ishi!”

¹⁹Nna iya jika su iya: “Mu maru-a nno nwa mu; mu maru-a le yebedua be a-jaakwapho buru oha ophu; temẹ oha ono apakwaapho eka. Obenu le nwune iya ke nwata be a-ka iya shii; temẹ oshilokpa nkiya be a-buru ikpoto oha.” ²⁰O goru onu-oma nu phe mboku ono su:

“Ndu Ízurelu e-gudeje
epha ngu goru onu-oma su:
'Ge Chileke mekwaa ngu
g'i du ge Ifuremu yee Manáse.' ”

O shi egube ono mee;
Ifuremu ka Manáse shii.

²¹Ízurelu su Jiósẹfu: “Mu abyaakwa anwuhu; ole Chileke be a-no-kubekwa unu duphu unu azu l'alị nna unu. ²²Ozo bu le-a; mu nuwaru ngu oke alị lanu g'i gude kangoo unwunna ngu ndu ophu. Alị ono be mu gude ogu-echi waa apfu lwuta l'eka ndu Amoru.”

Jiékpọ́u ago ọ́nu-ọ́ma anụ ụ́nwu iya

- 49¹ Noo ya; Jiékpọ́u bya ekua ụ́nwu iya; sụ phẹ:
 “Unu dzukọ́be gẹ́ mu kọ́oru
 unu iphe, a-nwụ́ru unu
 l'atatiphu!
- 2 Unu dzukọ́be bya
 angabẹ́ nchi;
 unubẹ́ ụ́nwu Jiékpọ́u!
 Unu ngabẹ́ru nna unu,
 bụ́ Izurelu nchi!
- 3 Rúbẹ́nu; ọ́o gụ́bedua bụ́
 ọ́kpara mu;
 bya abụ́ru ike mu;
 mbụ́ l'ì bụ́ nwa ivuzọ́,
 mu nwụ́ru teke ike dụ́ mu.
 Ọ́o ngu bẹ́ a kachaa akwabẹ́
 ùbvù; bya abụ́ru ngu bẹ́
 kakọ́ta ọ́kpehu.
- 4 Eshinu ìinoduje atụ́ kpereree
 g'akpara-mini l'eme iphe,
 erwubeduru ngu nụ́;
 bẹ́ ì tị́ kaẹ́du ndu ọ́phuu shii;
 noo kẹ́le ì zẹ́ru l'iphe-azẹ́e
 nna ngu;
 mbụ́ je eworu iphe,
 mu azeje azeje merwua.
- 5 Simiyọ́nu; waa Lívayi
 bụ́ unwune.
 Éphe egudeje ogu-echi
 phẹ́ emekpa ndu ọ́zo ẹ́hu.
- 6 Mu ta abyakwa ayíru l'ìdzù,
 ẹ́phe achi; ọ́phu mu abyakwa
 anọ́du l'echilabọ́ phẹ́;
 noo kẹ́le ẹ́phe gude ẹ́hu-eghu
 gbushia nemadzụ́;
 bya egbubushia oke-eswi
 akwara azụ́ ọ́kpa k'iwashì.
- 7 G'ẹ́hu-eghu phẹ́ vuru ọ́nu;
 noo kẹ́le ooghughajẹ́ru
 phẹ́ ẹ́ka.
 G'obu-ọ́ku phẹ́ vuru ọ́nu;

- noo kele ọpanukaje phe
eka l'ehu.
- Mu a-chikashi-dzuru phe
l'ali Jiékopu;
mbụ dokashidzuru phe
l'ali Ízurelu l'ophu.
- 8 Jiuda; ụnwunna ngu
a-nọduje ekele ngu ekele.
Eka ngu a-zúchaa ndu
ọhogu ngu
l'ẹkpiri ke pfurii.
Ụnwunna ngu g'ephhe ha
ephozeru ngu.
- 9 Gụbe Jiuda bụ nwa oduma
ẹgbara.
Gụbe nwa mu;
i shiwaa l'eka i gbushiru iphe,
i riru lwa.
Nta-a be o gbushiwaru ikpere
ze azee g'oduma;
mbụ g'akahụ oduma;
?bụ onye suru iya ekute?
- 10 Jiuda ta abụ-buhuduru
eze abụ-buhu; ọphu
mgboro-eze ono abyadu
alufu iya alufu le mgbaka
okpa; gbiriri jasụ teke onye
o kuru ishi l'eka a-bya.
O -byaepho be oha l'ophu
a-ngaberu iya nchi.
- 11 Nkapfu-igara iya be
oo-libeje le vayinu.
Nwa nkapfu-igara iya be
oo-libeje l'ekali vayinu
ono ọphu mishiuru
mebyi ke wogalaa.
Oo-saje uwe iya le
mini akpuru vayinu.
Akpuru vayinu ono,
enwuje ke pfuu
ge mee ono be
oo-gudeje asa

- akpawuru-uwe iya.
- 12 Mee e-me; enya
achaa ya vaa.
Era-eswi emee;
eze acha iya phuuphuu.
- 13 Zebulun be e-buru le
mgboru eze-enyimu.
Aguga enyimu iya a-buru
odu ugbo-mini.
Oke ali iya e-erwu Sayidonu.
- 14 Isaka bu nkapfu-igara,
okpehu du;
mbu gude eda labo,
a nmakoberu iya
l'okpurukpu ze azee.
- 15 O humapho g'eka
oodzu ike du-be ree;
waa g'ali iya ono du-be guu;
o phozeta nmakota ivu-erwa
iya jikoru l'ukuvu;
bya ejeahaa ozi,
e kebutaru iya g'o je.
- 16 Danu be a-noduje ekpe
ndu nkiya ikpe,
pfuru oto;
mbu egube ono,
okpa-ipfu Izurelu ndu
ophuu ekpeje iya pho.
- 17 Danu a-du g'agwo,
no l'aguga uzo;
mbu g'ogiji,
no l'aguga gbororo,
abujeru:
O -taa inya l'ichirupfu okpa
l'o tufu onye agba iya
nu l'azu.
- 18 Gube Chipfu;
mu ele enya teke
ii-dzota mu.
- 19 Gadu be ndu o-lwua-olaa
a-dapfu;
ole ooghakobe chipyabe

- phẹ.
- 20 Asha bẹ a-ọ́du akọ
 ọkpobe nri.
 Nri, ọo-ọ́du akọ bụ nri,
 atso uto,
 gbaru ndu eze l'eriri.
- 21 Nafutali bụ ele,
 agbaphe g'ọ dụ iya.
 Ọonwuje nwa,
 ama ntumatu.
- 22 Jiósefu bụ vayinu,
 amije ntumatu;
 ọ bụ vayinu,
 nọ-kube mgboru ẹka
 mini dụ,
 amije mebyi shii.
 Ẹkali iya baa ụba tuko
 igbulọ sweta.
- 23 Ndu ọgba-apfu gude
 ẹhu-eghu byapfuta
 iya ọgu.
 Ẹphe gbaru iya apfu;
 shi nno mekpaa ya ẹhu.
- 24 Ọle apfu iya keerupho
 jingujingu g'o keru;
 teme e mee okpu ẹka iya;
 o shihu ike.
 Ọ buru shita l'ike k'onye bụ
 Okalibe ke Jiékoju;
 mbụ onye ono,
 bụ onye-nche;
 waa onye mgbobuta ke
 Ízurelu.
- 25 Onye ike ono shi l'ẹka bụ
 Chileke ke nna gube Jiósefu,
 bụ onye eyejeru ngu ẹka;
 mbụ onye ono,
 bụ Okwoolemka,
 bụ onye emejeru ngu
 iphe-oma.
 Oomejeru ngu iphe-oma
 ophu shi l'imigwe;

- bya emejekwaru ngu
pho iphe-oma ophu shi
le mini ime-alì.
Teme o buru iya bu onye
egudeje nwa;
waa eche nwa era meeru
ngu iphe-oma.
- 26 Onu-oma ophu nna ngu
goru ngu kakwa k'oke-úbvú
ndiche shii;
mbu l'o kakwa iphe-oma
ophu úbvú,
shi teke ndiche noduta
anuje shii.
- G'iphe-oma ono g'o hakota
bukwaru ke Jiósèfu;
mbu g'o bukotakwaru ke
yèbe onye ono,
a hofutaru l'echilabo
unwune iya dobe iche ono.
- 27 Benjiaminu bu ejo-nkuta-owska,
egu alabushi akurepho.
O -rwua l'utsu l'o gbua iphe taa.
O -rwua l'uzenyashi l'o kee iphe,
o lwutaru l'ogu.”

28 Ndu ono bukota okpa-ipfu Izurelu ephe n'iri l'èbo. Teme iphe ono bukotaru iphe, nna phe pfuru yeru phe teke o goru phe onu-oma. O gopurpho onyenonu onu-oma, rwuberu iya nu.

Anwuhu Jiékòpu

29 Noo ya; o bya ekeru ekpe nu phe su: “Mu abyawaa alapfu ndiche mu phe. Unu likwa mu l'eka e liru nna mu phe l'ogba, no l'alì Efuronu, bu onye Hetu. 30 Ogba ono yele alì ono no l'alì Makupela ono, no le mgboru Mamure l'alì Kénanu; be Ebirihamu zutaru l'eka Efuronu onye Hetu dobe; g'o buru eka ee-lije odzu. 31 O buru eka ono be e liru Ebirihamu; yee nyee ya, bu Sera; teme e likwapho Ayizaku; yee nyee ya, bu Ribeka l'eka ono; teme mu bya elia Lii l'eka ono. 32 Alì ono yee ogba, no iya nu be a zuru ndu Hetu.”

33 Jiékòpu keghechaepho ekpe nu unwu iya; bya aze-zeta aze; tua unme ikpazu; o buru iya alapfu ndiche iya phe.

50 1 Jiósèfu bya apata onwiya tua l'eli nna iya; kwaru ekwa kpua ya; bya etsutsukwaa ya pho onu. 2 Noo ya; Jiósèfu bya ezia ndu

dokinta, ejeru iya ozi g'ephe dozia odzu nna iya, bu Ízurelu g'o to rehu. Ndu dokinta ono bya edozia odzu ono egube ono. ³Ọ buru ụkporo abali labo be ephe gude dozia odzu ono; tee ya mmanu, g'o to rehu. E mecha; ndu Ijiputu bya akwaa ekwa iya ụkporo abali eto l'abali iri.

⁴Eswe akwakwa iya -bvupho; Jiófesu su ndu-ozí Fero: “Ọ -buru le mu du unu l'obu; unu pfiaru Fero su iya ⁵le nna mu mekwaru; mu riaru iya nte su le ya abyawaa anwuhu; ole ge mbedua jekwa elia ya l'ilu, o turu doberu onwiya l'ali Kėnanu. Oo ya bu ge mu jenu je elia nna mu; ge mu alwaphuta azu.”

⁶Fero su iya: “Tugbua je elia nna ngu l'eka o pfuru g'i riaru iya nte l'ije elia ya.”

⁷Oo ya bu; Jiófesu tugbuna jeshia eli nna iya. Ndu ozi Fero g'ephe ha tuko wufu tsoru iya. Ndu bu ogerenya l'ibe Fero; waa ndu bu ogerenya Ijiputu l'ophu; ⁸teme waa ndibe Jiófesu l'ophu; waa unwunna iya; me ndu bukpuo ke nna iya g'ephe hakota. Unwegirima ibe phe me iphe-edobe phe be ephe hakotaru l'ali Goshenu. ⁹Ugbo-inya; me ndu agba l'inya be ephe l'ephe swikwapho. Ephe dukpuo igwerigwe tuko swiru.

¹⁰Ephe rwua eka eechije bali le Atadu, no le mgboru enyimu Jiordanu; ephe raa ekwa iya rashia ya ike. Jiófesu bya anodu l'eka ono kwaa nna iya ono ujiku esaa. ¹¹Ndu Kėnanu, bu l'eka ono numapho ekwa aphu, aara le mgboru eka eechije bali le Atadu; ephe su: “Ndu Ijiputu ataswi-bejekwa okpoma raa ekwa aphu.” Noo iphe ono meru g'o gude e kua eka ono, no-kube enyimu Jiordanu ono “Abelu-mizuremu”.

¹²Noo ya; unwu Jiokopu mee g'o suru g'ephe mee. ¹³Ephe pata iya je l'ali Kėnanu je elia ya l'ogba, no l'ali Makupela le mgboru Mamure, bu eka Ebirihamu zutaru Efuronu onye Hetu g'o buru eka ee-lije odzu; yee ali, tso iya nu. ¹⁴E lichaepho nna iya; Jiófesu lwaphuta azu l'ali Ijiputu; yee unwune iya; mewaro ndu ozo, tso iya je eli nna iya ono.

Jiófesu epfu opfu oma eyeru unwunna iya

¹⁵Unwunna Jiófesu humapho le nna phe nwuhuwaru; ephe su: “Ọ -buru le Jiófesu be iphe, anyi meru iya-a eghukwadu egbu be oo-pfukwa anyi ugwo iya.” ¹⁶Noo ya; ephe zia ozi g'e je ezia Jiófesu su iya: “Nna ngu byakwa l'anwuhu bya atua ekemu-a su: ¹⁷Unu e-pfuru Jiófesu le mu arwokwa iya arworwo g'o gukwaaru unwunna iya nvu l'eka ephe mesweru iya; ye l'iphe-eji, ephe meru; kele o kwa ejo-iphe be ephe meru iya.” O bukwanuru iphe, anyi arwo ngu nta-a bu g'i gunaa nvu l'emeswe, anyibe ndu-ozí Chileke nna ngu mesweru ngu.” Ephe zichapho Jiófesu ozi ono; o wata ekwa.

¹⁸Unwunna iya tugbukwapho wu-pfu iya je adaa kpurumu l'atatiphu iya bya asu: “Iilena l'anyi tukookwaru buru ohu ngu.”

¹⁹No iya; Jiófesu su phe: “Ge ndzu ta agushi unu; kele o to budu mu bu Chileke. ²⁰O bu eviya l'unu chiru idzu g'unu mee mu ejo-iphe; obenu

le Chileke meru iya; o bya aburu iphe-oma; k'ophu e shi egube ono dzota ndzu ndu du igwe, bu iya bu iphe, nwuru nu-a. ²¹Oo ya bu ge ndzu ta agushi unu. Mu a-nodua anu unu nri; unu l'unwegirima unu." O bya emee ya; o doo phe enya l'ehu te eghudu iya eghu; bya epfuru opfu-oma yeru phe.

Anwuhu Jiosefu

²²Jiosefu buru l'ali Ijiputu; yee ndibe nna iya l'ophu. O noru ukporo apha ise l'apha iri; ²³bya ahuma nwanwa unwu Ifuremu. Teme Jiosefu hetakwapho unwu Makiya, bu nwatibe Manase l'utapfu iya teke a nwuru phe.

²⁴Noo ya; Jiosefu su unwunna iya: "Mu abyaakwa anwuhu. Ole mu maru le Chileke e-mecha bya eyeru unu aka dufuta unu l'ali-a; duta unu laphu azu l'ali, Chileke kweru Ebirhamu; waa Ayizaku; waa Jiekopu ukwe iya ono; bya eria nte yeru phe iya ono." ²⁵Jiosefu mee g'unwu Izurelu riaru iya nte. O su phe: "Mu maru le Chileke e-mecha bya eyeru unu aka. O -rwua teke ono; unu chitakwa okpu mu gude lufu l'eka-a."

²⁶Oo ya bu; Jiosefu nwuhu g'o nochuerupho ukporo apha ise l'apha iri. E dozia odzu iya g'o to rehu; bya eye iya l'okpoko-odzu dobe l'ali Ijiputu.